

Matalikilo 2:

# Buumi Bulakula

Basikulembulula: Sarah Small,  
Jon Paul Witt,  
Alan Scantlebury  
alimwi a Jo Kimball





# **Matalikilo 2**

## **Buumi Bulakula**

*'Bayakwiitwa kuti masamu abululami,  
Kusyangwa kwa MWAMI  
Mukutondezya mumuni wakwe.'*

*Izaya 61:3*



## **Matalikilo 2: Buumi Bulakula Bulembo Butaanzi, Mukazibaziba 2018**

Nguzu zybulembi © Dignity 2018. Nguzu zyoonse zyakwabililwa.

### **Mubakwabe ba Dignity**

Mulembele: 6 Barlow Moor Road, Didsbury, Manchester, M20 6TR, UK

Emelo: hello@dignityonline.org.uk

Luwaile: +44(0)7340753937

### **Kulumba**

Babulondo balumba Jesu ku buumi mbwaatupa kuti twiinde mubbuku eeli. Babulondo balumba akusyoma muntu oonse wakatola lubazu ku mulimo ooyu.

### **Mulimo wa Dignity**

Dignity babelekela aamwi abaabo mumbazu zyili kule alimwi bakulwaizya maumi acincide aliwmi azyooko kuti zyilete lwanguluko kuzwa ku bucete kwiinda mubulongwe a Jesu. Eeci tucikonzya kucijana kapati kwiinda Mutubunga twa Buumi, ooto tusolwedelwa azyooko zybana Kristu tubamba bantu kukonzya kweenda muni muni lya Jesu akutondezya luyando kuli baabo babazungulukide. Kwiinda mumaumi eesu tubona bantu bapona maumumi akondelezya alimwi akubaa lubazu mumaleele abuzuba abuzuba. Amumvwe kunji kuli [www.dignityonline.org.uk](http://www.dignityonline.org.uk)

### **Kabunga kabamba Matalikilo**

Basikulembulula: Sarah Small, Jon Paul Witt, Alan Scantlebury alimwi a Jo Kimball

Babali Bakubona Bulubizi: Rachel Warner, Mark Vermes alimwi a Abigail Cummings

Bapandulula: Habeenzu Nchimunya Joseph

### **Twaambo tuzwa mu Bbaibbele**

Ibbaibele 1963 The Bible in Tonga (Zambia) © United Bible Societies, 1963

### **Zyitondezyo Zyabweende**

Zyitondezyo zyabweende zyakabambwa aba Metro Icon Studio 5 akulembwa aba SyncFusion.

Zyitondezyo zyakazumizyigwa kubelesegwa.

# Matalikilo

**Matalikilo** nciyo cigwasya bantu kuzyiba akukomena mu bulongwe bwabo a Leza alimwi cilabakulwaizya kubamba cooko cabo. Cakalembelwa kupa zyibelesyo zisumpukide zyikonzya kubelesyegwa mumasena aindene indene amutubunga twazyianza munyika. Matalikilo ajisi mabbuku one, alimwi kalijisi zyiyo zyambunga zyakukwabana zyili kkumi azyotatwe.

**Matalikilo** akalembwa abalembi beenzu basikulyaaba kuzwa munyika alimwi akubikkwa antoomwe akulembululwa aba Dignity.

**Matalikilo 1: Buumi Bwatalika** libambidwe baabo bapya na batakwe lusyomo. Kuzwa kumatalikilo maubauba lilasolwedela bantu munzila zyitaanzi zya lusyomo akuzyiba Leza.

**Matalikilo 2: Buumi Bulakula** ciyaka matalikilo aawo lusyomo mpolunga lwakomena akupa luzyibo lwa njiisyo zygwasyilizya bubelesi bwa Bbaibbele amupailo.

**Matalikilo 3: Buumi Bulalenga** cibikkila maano kubona basiciiya mbobakonzya kucinca zyintu zyibazungulukide. Muna Kristu uuzwide ulalengulula buumi mbwapedwe mucooko alimwi abwabamwi.

**Matalikilo 4: Buumi Bulakomena** cilanganya mbuli muna Kristu uusimide mbwabede. Eeli bbuku lilazumanana amakani oonse azyibeela, kwasindinganya akwakwazamuna.

# Bulembi

**Matalikilo 2: Buumi Bulakula** cakalembwa abalembi basikulyaaba ba mumabazu anyika. Balembia bakayungizya ku bbuku eeli balilembedwe mayina aabo mbuli mwaccililene.

**Ba Pete Davies** ukwete Cher eelyo balijisi bana 4 bapati abazyukulu basankwa 2. Bakaswaanganina ku London Bible College, ooko boonse nkobakatola lwiiyo lwa Digili mu Bufundisi. Bakaswanga cikombelo ca Ruthin Christian Fellowship, ooko nkobacizulilwa. Pete uyandisya Rugby kakuli Cher uyandisya Uffizi Gallery wa mu Florence!

*Cibeela 9*



**Ba Andy Economides** mukanazi wa masi walo weendelezya zykombelo ku UK, Europe amu Afrika. Ulapa akukwelelezya bana Kristu mu busololi buzwide, mukupa lugwasyo akulanganya bacete abapengede.

*Ciiyo ca 6 cibikkidwe a Cipati ca 1 mubbuku lya Andy litegwa True Relationships<sup>1</sup> nguzu zyili pedwe*



**Ba Kurt Francis Ba Kurt Francis** mbagwasiliziyi mubukambausi ku Ruthin nChristian Fellowship ku Wales. Bakwete ba Ann, bajisi bana balombe botatwe eelyo ono mba Kaapa balimvwa. Bamvwa kabotu kubala akuba aciindi abalongwe amukwasyi alimwi muzyiindi balalobola.

*Cibeela 5*



**Ba Randall Hardy** bakatalika kusyoma muli Kristu ciindi nobakali kwiiya ku Manchester, ku Ngilandi. Bakwetwe kuli ba Randall alimwi bakayobozya myaka minji mumukwasyi wabo ujisi bana 6, balayiisya acikolo ca bana Kristu alimwi aa ng'anda. Balakondwa kukwabana amukwasyi wabo, kubala, kulima mbeu, misyobo azyakacitika.

*Zyibeela 1 a 3*

---

<sup>1</sup> Economides, Andy, (2013) *True Relationships* Emsworth: Soteria Trust peeji 9 -17



**Ba Jo Kimball** bakazulilwa mumbunga ya Dignity kuzwa mu 2008, kweenda kapati mu Zambia kuti babeleke atubunga twa buumi amaunga aleta kucinca. Mbeendelezi alimwi mbakulwaizi bakondwa kubona bamwi kabazwidilila akwiiya ncoocaamba kuyandwa kuli Jesu.

*Cibeela 11*



**Ba Debs Marks** wakakkala kwa bunji bwa myaka yakwe ku Manchester, UK. Ukwetwe kuli Colin eelyo mwanaakwe Lizzy wakaya ku cikolo cipati lino lino. Debs ulayandisisya kugwasya cikombelo kutegwa cigwasye basikutija muziyisi zyabo kuti bakonzye kuswaana a Jesu eelyo ulabeleka ku kabunga kagwasyiliza kupa mwakukkala ku bacete basikutija kwabo.

*Cibeela 10*



**Ba Gwen Mason** ulikwetwe alimwi ujisi bana basimbi 2. Gwen uzwa ku Sierra Leone ooko nkwa kagwasya bamakaintu kutalika mpindu. Lino ukkala ku Manchester alimwi wakagwasya basikutija kwabo kujana mwakukkala, kugwasyiliza kujana milimo ya basicikolo bakubushi abasikwiiya Bufundisi mubusena bwa buna Kristu. Ulayandisya kulembela Mwami akugwasya bantu.

*Cibeela 2*



**Ba Alan Pugmire** bakali babelesi mu cikombelo kwa myaka iinda ku 50. Kwa myaka iili 40 bakakkala ku Manchester alimwi bajisi lubazu lupati mu Cikombelo ca Manchester. Wakaleka mulimo mu 2002 pesi ulazumanana abubelesi abukambausi. Ngu muka mufwu kuzwa mu 1999 ujisi bana 3 bakwete abazyukulu 8. Muciindi natajisi cakucita ulayandisya kweendeenda akulanganya mbeu yakwe.

*Cibeela 7*



**Ba Sarah Small** bakakomenena mu Yorkshire mpoona bakabala zya Busyomi a Bbaibbele mu Manchester. Kutobelanya amyaka iili kkumi njobakabeleka ncito ya kulyaaba mu UK amu Africa, lino balisangene mumakanze amudolopo mu UK. Balanganya busololi bwa cikombelo, milimo ya kulyaaba alimwi abuumi bwa mukwasyi abana 2

eelyo bakazwa akumanizya kuyungizya lwiiyo lwa Bbaibbele.

*Zyibeela 4 a 13*



**Ba Bernard Witika** mbasololi ba kabunga eelyo bajisi mulimo mupati. Bakayiya akubeleka mbuli musololi a sikusyanga zykombelo mu Lusaka eelyo kabatana itwa a Leza kuya mu minzi mwalo mobakakomenena paka kuswaana Jesu. Ba Bernard balayandisisya kubona bamwi kababoola kuli Jesu.

*Cibeela 12*



**Ba Jon Paul Witt** mbobakapanga Dignity alimwi bakabeleka acikombelo mu zyisi zyinji. Mbantu bayeeya, bataanzi, bavwangeli alimwi mbasikutola mulumbe. Ba Jon bakwete ba Judith eelyo bajisi bana 3. Bakkala akati ka Zambia a UK. Kuyandisisya kwa ba Jon nkwakubona bantu kabazyiba Jesu eelyo kutegwa cilete kucinca muzyooko zyabo.

*Cibeela 8*

# Zyili Moomu

Bwakubelesya Bbuku Eeli.....	1
Kulela kabotu bana notuli ku Tubunga twa Buumi .....	7
1: Ino Muuya Uusalala Nguni? .....	9
2: Muzuziyigwe a Muuya Uusalala.....	21
3: Kulengwa Mubube Bwa Leza .....	31
4: Bube bwa Leza Nduyando.....	41
5: Mucelo wa Muuya - Bube .....	49
6: Kuleleka Batuzungulukide.....	59
7: Bulwazi Bujaya – Cinyonyoona .....	69
8: Ncocaamba Kulekelela – Luse.....	81
9: Tuzulilwa kuli Leza – Kunununwa .....	91
10: Tulasalala Kumbele Lya Leza – Kululamikwa.....	101
11: Kutambulwa mumukwasyi wa Leza .....	113
12: Luzyalo kuli Bamwi Kubaa.....	125
13: Cibeela Cakumamanino .....	137

# Bwakubelesya Bbuku Eeli

Eeli bbuku libambilidwe kubelesyegwa mu njiisyo zya mutubunga. Pele alikke mweendelesi wa ciyo ngoweedele kuba abbuku eeli. Mweedele kumanizya cibeela acimwi mu muwoola lyomwe kusika kuli obile. Kuti na mwayanda kwiindilizya, nkokuti inga lyoonse kamumanizya cibeela comwe mumwiki zyobile.

Cilizibidwe kuti bantu babala bbuku eeli bakabala kale bbuku lya **Matalikilo 1: Buumi Bwatalika**. Eeci caamilizya kuti imwi mizeezo tipandulwidwe alimwi mubbuku eeli. Kuti na bamwi bantu basangana kabunga kenu mbuli bana Kristu bapya mweedele kujatikizya amizeezo izwa mu **Matalikilo 1: Buumi Bwatalika** ambabo. Imwi nzila ya kucita ceci nkubamba kabunga kambi. Bbuku lya Dignity **Syanga** inga lyamugwasyilizya.

## Bwakusolwedela ciyo

Nciyandisi kubona masimpe kuti bantu boonse batola lubazu mu njiisyo. Takuli biyo kuya bubala akupa malailile pe. Tusyoma kuti umwi aumwi muntu ulijisi bwiindene mbwakonzya kutola lubazu alimwi Leza ulatuuyisya kwiinda muli baabo bali muni lyesu. Muli kaako, ziyiyo zyililembedwe munzila yakuti bantu boonse bayakuyandika kutola lubazu. kuli zyamumutwe, mibuzyo, tusobano, twaano amibandi iya kuyanda muntu oonse kutola lubazu.

Mbuli musololi wa kabunga mweedele kotalisya mubandi akubona kuti mubandi weendelezya mucimo ceelede, pesi tamweedele kucita zyoonse lwenu.

Mweedele kukulwaizya bantu bafwa nsoni abaumwine kuti basole kunana ciindi nobakonzya. Mweedele kukulwaizya bantu basicoongo abankanwe kuti bape ciindi kuli bamwi kutegwa abalo bape mizeezo yabo.

## **Ncomuyandika mucibeela coonse**

Zyibeela zyibambidwe kuba zyuubauba akutayanda zyibelesyo zyinji.

Muyakuyanda:

- Bbuku eeli ku mweendelezi wa ciyo
- Ibbaiibbele (cilagwasya kuti bantu basyoonto buyo bakonzya kuleta ma Bbaiibbele abalo, pesi tacili ciyandisi)
- Zyilembyo amapepa, ziyvwula kubelesyegwa muzyakucita. Mukulwaizye bantu kuziyileta kuzwa ku maanda aabo.

Nakuli cimbi ciyandika, ciya kulibonya ku matalikilo aciyo nacyandikila nzi. mweelede kulibambila zyintu eenzyi mucindi.

## **Zyitondezyo zya kumugwasya**

Kumugwasilizya kweendelezya ziyiyo twabikkilizya zyitondezyo zyakumwaambila cakucita ku cibeela acimwi. Zyitondezyo zyilitondezyedwe anselelo abupanduluzi bwazyo. Ono amujane ciindi cakuziyiba citondezyo acimwi ncocaamba eelyo mwiinde muzyiyo zyisyoonto mpoona mubone mbozyibelesyegwa. Eeci ciya kuubyaubya mulimo nomweendelezya ciyo.



### **Kulibambila**

Mukubonenesya kuti acimwi ciyo ceenda kabotu kabotu kuli tuntu tutasyupi tomweelede kucita mukulibambila. Eezi ziyatikizya kubonenesya kuti mwajanina limwi zyintu ziyandika ku ciyo akubikka beendelezi basikulyaaba antoomwe kamutaninga swaana. Mweelede kuzylanga kwacaala mazuba masyoonto akuswaana kutegwa mube aciindi cakucita ceelede kucitwa.



### **Muzeezo**

Acimwi cibeela citalika amuzeezo. Eeci nceci mutondezya ncomweelede kuyiisya kabunga alimwi aceco boonse ncobeelede kuziyiba bamanizya ciyo. Mweelede kubikka mizeezo eeyi lyoonse

mumutwe akulibuzya namulakkwanisya kugwasya bantu kwiizyiba. Ncibotu kotalisya kwaabila kabunga eeci.



### **Cipeto Camumutwe**

Muntu oonse aiye cipeto camumutwe alimwi akonzye kucaamba kusikila ku masimpilo aciyo. Mweelede kubayiisya kwiinda mukubalisya cipeto camumutwe alimwi amukonzyanyo wamu Bbaibbele ku kabunga. Mwamana alimwi mucibale pesi mubale tubeela tusyooto, mubone kuti kabunga kalatobeleya. Mwiindulule oobu, mbiccaana mbiccaana mubale zyibeela zyilamfu kabunga z yokati tobelezye kusikila limwi boonse bacizyibe lwabo. Mukulwaizye bamwi kusola kwiindulula muli lwabo.



### **Caano**

Twaano ninzila mbotu ya kotalisya zyiyo akwiya cimwi cinyenzi. Boonse balakondwa kuteelela twaano alimwi ncubauba kuyeeya! Mwaambila kabunga twaano, mweelede kubona kuti mwatuswaanganya ku buumi kwiinda mukubaa mambonwa. Kuti kakuli omwe mukabunga kenu ucizyi kwaana inga cabota kumulomba kuti aane twaano. Mweelede kumwambilila limwi ciyo kacitana sika kutegwa alibambile.



### **Luzyibo Iwa mu Bbaibbele**

Acimwi ciyo cilijisi cibalo cakubala comwe kuzwa mu Bbaibbele, zyimwi zyjisi zyinji. Kuti mukabunga kenu kakuli bantu bacizyi kapati kubala inga mwabalomba bamubalila. Mweelede kubaambilila limwi kutegwa balibambila na baamba kuti tabayandi. Muyeeye kuti bamwi bantu tabacizyi kubala aboobo kubalombela kumpela lya bantu kuti babale mpoona bakaka inga kwaba kugasampula.



### **Kukanana**

Kuli zymwi zyibeela zyelela kubalisya kuzwa mubbuku. Nomwiinda muli zyeenzi mweelede kwiima-ima ciindi aciindi, kapati kwamana twaambo tupati-pati, mubabuzye bantu nabamvwa ncomwaamba. Natibamvwa, mweelede kwinduluka cibeela na kubandika cimwi cintu kutegwa mubagwasye kumvwa.



### **Kubandika na Mibuzyo**

Kwiingula mibuzyo akubandika zyintu cigwasya bantu kwiiya akuzyiba cintu muli lwabo beni. Eeci cilabagwasya kuciyeeya eeco cintu. Mwabona citondezyo ca mubuzyo nciyandisi kubuzya kabunga mubuzyo akukulwaizya bamwi baineene-indene basyoonto kuti bape bwiinguzi. Aabona mibuzyo nja mibandi mutubunga tuniini. Kuti na ciyo cimwaambila kucita boobo, mweelede kwabanya bantu mutubunga twa bantu 3 na 4 eelyo mubape ciindi cakubandika mubuzyo. Mbunga yaboola antoonwe mupe ciindi kukabunga akamwi kuti kape kaambo na twaambo tobilo tupati-pati tobabandika.

Na kuli mibuzyo minji naaba mikonzyanyo ya mu Bbaibbele njomuyanda mukulwaizye muntu mukabunga akamwi kuti aifotole mibuzyo kubelesya luwaile lwakwe na kamulibambilila limwi kwiinda mukwiilemba mutupepa tunji.



### **Cakucita**

Bantu balaiya kwiinda mukaba amambonwa alimwi akucita cimwi. Zyakucita zyilagwasya kuti eeci cicitike. Mweelede kusanganya muntu oonse muli zyakucita akukulwaizya kucita mambonwa nobacita cakucita!



### **Mupailo**

Eeco Leza ncaamba ku bantu cacigaminina nciyandisi kapati. Tuyanda kukulwaizya kabunga kenu kuti kakapaila akupaililana nocakonzyeka. Kufwumbwa mwabona citondezyo eeci mweelede kwaambila bantu kuti bapaile. Kuli nzila zyinji zyakupaila zyibeleseyedwe mubbuku eeli lyoonse. Aabona kabunga kalalombwa kupailila aamwi, aabona mutubunga tuniini alimwi aabona bobile-bobile. Aabona bantu baambilwa koompolola kuli Leza alimwi muzyiindi zyimwi bantu balombwa kupaila mukawiiwi. Nciyandisi kubona kuti mwasiya ciindi cinji cakupaila akukulwaizya bantu kuteelela caamba Leza.



### **Cakucita iino mvwiki**

Aimwi mvwiki ilijisi mulimo wa kucitila ku ng'anda. Mweelede kupandulula kabotu kabotu kutegwa bantu bakonzye kumvwa alimwi mpoona mukulwaizye bantu kucita eeci iino mvwiki. Kumatalikilo aciiyo coonse, mweelede kupa bantu ciindi cakupa bwiinguzi nabakaubeleka mulimo ngobakapedwe.



### **Kamboni**

Nciyandisi kutondezya luyando Iwa Jesu kuli baabo batuzungulukide. Inga twacita ooku munzila zyinji zyiindene. Acimwi ciiyo citupa muzeezo wa mbotunga twacita eeci. Mweelede kupandulula kabotu kukabunga akukulwaizya boonse kucita milimo eeyi mu mvwiki. Mbuli mbotutondezya luyando Iwa Jesu kuli baabo batuzungulukide tusyoma kuti Jesu uyakucinca maumi akuleta Iwaangulukoko. Inga cabota kukulwaizya bamukabunga kuba abulembo bwa bantu mbobakanana limwi mbuli lubazu Iwa milimo eeyi akubakulwaizya kubapailila.

**Bweende bwa ciindi**

Mumasena aamwi twabikkilizya amuzeezo wabulamfwu bwa ciindi ca cakucita na ca mubandi mbuyelede kulampa. Eeci ciya kumugwasya kweendelezya ciiyo muciiindi ceelede.

**Zyibalo zyamu Bbaibbele amikonzyanyo**

Mwabona zyina anambala kazyengeledwe mbuli boobu

Intembauzyo 1:4-6 cimutondezya cibalo kuti cizwa mu Bbaibbele.

Eeci lwaco caamba kuti mweelede kubala bbuku lya Ntembauzyo, cipati ca 1 cisyoonto zya 4 kusikila ku 6.

# Kulela kabotu bana notuli ku Tubunga twa Buumi



Muntu oonse uuba ku kabunga abone kuti bana bakwe bali kabotu ku ng'anda alimwi balangwa aa muntu usyomeka naaba kubaletelezya bana babo.



Basololi batubunga bayeezye bantu ba mutubunga kubonenesya kuti bana babo bali kabotu ku ng'anda alimwi balangwa aa muntu usyomeka eelyo balitambwidwe kukabunga.



Kufwumbwa ooyo mukabunga ubeleka aa bana atabeleki alike pele aumwi na bobile bantu. Na mbobile bantu, tabeelede kuzwa ku mukwasyi omwe. (Beelede kuzwa ku mikwasyi iindene.)



Aabo babeleka aa bana mukabunga beelede kuti bakali kuvwula kusika ku kabunga antela kwa myezi yotatwe.



Basololi batubunga abantu bamu tubunga tabeelede kufotola bana ciindi nobali mumilimo ya Tubunga twa Buumi.



Kuti na bana kabaabana cakulya ku miswaangano ya tubunga, mubone kuti cili kabotu kulya.



Batubunga baswaya mikwasyi muzyooko abaunke bobile-bobile, mukonzyanyo baalumi 2 baswaye mwaalumi na bamakaintu 2 baswaye mukaintu.

# Bulembo

# Ino Muuya Uusalala Nguni?



'Mwanoondiyanda, kamubamba m'ilao yangu. Amebo ndiyookumbila Taata, uyoomupa Mugwasyi umbi kuti akale anywebo lyoonse. Ngonguwe Muuya wabwini, oyo inyika ngwiitakonzya kutambula, nkaambo tiimuboni nekuba kumuziba. Nywebo mulimuzi, nkaambo ulikede anywebo, alimwi unookede mulindinywe.'

Johane 14:15-17



### **Kulibambila**

Ncomuyandika mu cibeela eeci:

- Muzeezo wa cakucita 1: Muyakuyandika cintu cilemu, mukonzyanyo mbuli cisamu, bbwe naaba saka lya mapopwe.
- Muzeezo wa cakucita 2: Muyandika luwaile lujisi bbatili litakwe magunyu gunyu alimwi acakubelesya kubikka mulilo mu bbatili.

Sena:

- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?



### **Kutambulwa**

Mubatambule boonse ku kabunga akubalumba kuti baboola. Kuti kakuli bamwi baboola kusangana kabunga mweelede kutaanguna kubaambila zyina lyenu mpoona akulomba bantu boonse kuti baambe mazyina aabo ku kabunga. Mweelede kupandulula citi tole busena mukabunga.

Mwaambe mupailo mufwaafwi, mupailo buyo wa kulumba.



### **Muzeezo**

Muzeezo wa cibeela eeci iino mvwiki ngwa kuzyiba Bbaibbele ncolyaamba kujatikizya Muya Usalala, eelyo aceeco ncoocaamba eeci kuli ndiswe mbuli buumi bupya mbobukomena.



### **Cipeto Camumutwe**

Mubaliseye ku kabunga ziyipeto zya mumutwe a bwiiminizi bwa mu Bbaibbele. Muzyibale alimwi mutubeela tusyoonto, mubone kuti kabunga kakonzya kubala kwa kutobelezya. Buce buce amubale muzyibeela zylamfwu eelyo kabunga kakatobelezya kusikila boonse

5  
tuvwalu-  
vwalu

5  
tuvwalu-  
vwalu

bakonzye kucaamba cibalo. Mukulwaizye bantu basole kuciindulula lwabo beni.

*Mwanoondiyanda, kamubamba milao yangu. Amebo ndiyookumbila Taata, uyoomupa Mugwasyi umbi kuti akale anywebo lyoonse. Ngonguwe Muuya wabwini, oyo inyika ngwiitakonzya kutambula, nkaambo tiimuboni nekuba kumuziba. Nywebo mulimuzi, nkaambo ulikede anywebo, alimwi unookede mulindinywe.*

*Johane 14:15-17*



### **Caano**

Amubale cibalo citobela ciitwa kuti 'Mupati pati wa mu Cooko' ku kabunga:

Malonda Nee wakali muna Kristu wa ku China wakapona kuzwa mu 1903 kusikila mu 1972. Wakanjila mubusololi kunze acikombelo, wakali kukulwaizya bana Kristu kuswaangana antoomwe mutubunga tusyooonto syooonto. Wakali sangeni mubwendelezi bwa kabunga kapati kabelesya maiwe kalo kazyikombelo zya mumaanda kwa myaka isika ku 30. Mu 1949 kwakali Bubambuluzi bwa Zyooko mu China oomo mwalo buna Kristu, antoomwe abusyomi bumwi mobwakanyangwa nguzu. Nee wakabelesya myaka yakwe yamamanino iili 20 muntolongo. Wakalemba mabbuku manji, alimwi iliinda kuzyibwa ndeeli 'Buumi Bwini bwa buna Kristu'. Oomu mwalo upandulula mbocili cibotu kuli baabo bajana buumi bupya muli Jesu kumvwa akucita mbowaamba Muya Usala, ooyo upona muli mbabo.

Mukutondezya eeci wakaambila bana bukwetene bamwi balo bakasanduka kuba bana Kristu eelyo nakaswaide munzi muzyuulu.

Ndakaunka, mumupeyo uumwi, kwa ciindi cilamfwu kuya kupumuna ku cuulu ooko kwa kupumwida nkokwakali kusyupa kujana, eelyo kecili nkuko cakeelela kuti ndale mu ng'anda iimwi alimwi nkelida kumbi zyakulya, eeyo yabili yakali ya sikubamba zyimbayambaya amukaintu wakwe. Kwa mvwiki zyobilo zyitaanzi mukuswaya kwangu, kunze buyo kwa kulomba cileleko ca cakulya acimwi, taakwe nekaamba nociba cimwi kuli basimalelo aangu kujatikizya Mulumbe Mubotu; mpoona bumwi buzuba coolwe cangu cakaboola ca kubaambila Mwami Jesu. Bakalilibambilide kumvwa akuzya kuli nguwe mubusyomi bwa kulekelelwa zyibi zyabo. Bakazyalululwa, mpoona mumuni uupya alukondo zyakaboola mumaumi aabo, nkaambo ooku kwakali kusanduka kwa ncobeni. Ndakabweza ciindi cakupandulula cakacitika kuli mbabo kabotu kabotu, eelyo mpoona, mbokwakali kaya butontweda, ciindi cakuti ndibasiye cakasika eelyo ndakajokela ku Shanghai.

Muciindi ca myezi ya mupeyo mwaalumi wakajisi ciyanza cakunywa waini antoomwe azyilyo zyakwe, alimwi wakali kwiindilizya munzila. Neekazwa, mukujokela kwa mupeyo, waini wakalibonya alimwi atebule, eelyo oobo buzuba, mbuli mbwakazyibide, mulumi wakakotama kupailila cakulya pesi taakwe majwi akazwa. Nakamana kusola kwa ciindi comwe na zyobilo kakwiina acicitika wakacebukila mutumbu wakwe. 'Ncinzi calubila?' wakabuzya. 'Nkaambo nzi ncotutakonzyi kupaila sunu? Bweza Bbaibbele uyandaule mbolyaamba akunywa waini.' Ndakabasiilide bbuku lyomwe, pesi nokuba kuti mukaintu wakali kukonzya kubala taakwe ncaakazyi a Jwi, eelyo wakavwunauna mapeeji kuyandaula mumuni wa ciiyo. Tibakacizyi bwa kubuzya Bbuku Iya Leza alimwi ticakali kukonzyeka kubuzya mutumwa wa Leza, nkaambo ndakali

sakene alimwi kwakali kukonzya kuba myezi minji kuti bakandibone. 'Konywa buyo waini wako,' wakaamba mukaintu. 'Tuya kukatola kaambo ku mukwesu Nee cakusaanguna.' Pesi mwaalumi wakajana kwaalilwa kujosya kulumba ku Mwami. 'Zwisya aawa!' wakaambisya; eelyo nakacita oobo, antoomwe bakapailila cakulya.

Eelyo mwaalumi nakakonzya kuswaya Shanghai wakandaambila caano. Mukubelesya citondezyo cizyibidwe mu mulaka wa ku China: 'Mukwesu Nee,' wakaamba, 'Mupati pati wa mu Cooko takandizumizya kunywa!' 'Cabota kapati, mukwesu,' ndakaamba. 'Ulamumwida lyoonse Mupati pati wa mu Cooko!' Bunji bwesu tulizyi kuti Kristu mwali mumaumi eesu. Tulasyoma kuti Muya wa Leza ukkala muli ndiswe, nkabela aaka kasimpe takakwe bube bupati ku kicito yesu. Mubuzyo ngooyu, Sena tulimuzyi mbuli muntu uupona, alimwi sena tumuzyi kuti 'Mupati pati'?<sup>2</sup>



### **Luzyibo lwamu Bbaibbele**

Amubale Johane 14:15-21 ku kabunga:

*<sup>15</sup>Mwanoondiyanda, kamubamba milao yangu. <sup>16</sup>Amebo ndiyookumbila Taata, uyoomupa Mugwasyi umbi kuti akale anywebo lyoonse. <sup>17</sup>Ngonguwe Muuya wabwini, oyo inyika ngwiitakonzya kutambula, nkaambo tiimuboni nekuba kumuziba. Nywebo mulimuzi, nkaambo ulikede anywebo, alimwi unookede mulindinywe. <sup>18</sup>Nsikooyoomusia mbuli bamusyaala, ndileza kulindinywe. <sup>19</sup>Kwasyaala ciindi ciniini, inyika tiicindiboni limbi, pele nywebo mulandibona, Nkaambo ndi muumi, anywebo munooli baumi. <sup>20</sup>Elyo zuba muyooziba*

---

<sup>2</sup> Nee, Watchman, (1961) *The Normal Christian Life* Eastbourne: Kingsway Publications, peeji 77

*kuti ndili muli-Taata, anywebo muli mulindime, amebo ndili mulindinywe. <sup>21</sup>Oyo ujisi milao yangu, akwiibamba nguundiyanda, Awalo uundiyanda uyooyandwa Taata, amebo ndiyoomuyanda, ndiyoolitondezya kulinguwe.*



Caano cesu acibalo ca mu Bbaibbele zyoonse zyitondezya kuti ciindi notwatambula buumi bupya kuzwa kuli Leza, ulalipa lwakwe kuli ndiswe mumusyobo wa Muya Usalala. Ulaboola kuzya kukkala muli ndiswe akutusolwedela akututondezya akutugwasya mukukomena mulusyomo lwesu lupya. Muna Kristu wa ku China walo wakali kwiita Muya Usalala kuti ‘Mupati pati wa mu Cooko’ cakwe: uumwi ukkala muli nguwe umwaambila cakucita, kumugwasylizya bwa kukkala bwindene. Mbuli bana Kristu tulizyi kuti Leza muciiindi comwe ngumwi alimwi mbatatu: Leza Taata, Jesu mwana alimwi a Muya Usalala. Tuya kwiiya kunji kujatikizya ceci mu bbuku 3 Iya Matalikilo.

### **Njiisyo ya Jesu kujatikizya Muya Usalala**

Cibalo cesu ca mu Bbaibbele cizwa mu Mulumbe wa Johane, oomu mwalo njiisyo zya Jesu zya Muya Usalala mozyijanwa. Kunze ooku Jesu wakakanana ‘Kuzyalwa kwa ku Muya Usalala’ a ‘Muya Usalala mboupa buumi’. Waita Muya Usalala kuti mulonga wa maanzi apona eelyo ‘alakonzya kweenda muli mbabo.’

Eelyo ciindi nocakaswena cakuti Jesu afwe, tacigambyi kuti wakajana coolwe cakuyiisya basiciiya bakwe mulimo Muya Usalala ngo wakali kuya kucita mumaumi aabo. Jesu wakabasyomzya alimwi, kati unakubapailila alimwi Muya Usalala uyakutumwa kuli mbabo kufwaumbwa aunka. Mu cibalo cesu ca mu Bbaibbele Jesu waita Muya Usalala kuti mukanazi uumwi (amulange cisyoono ca 16-17).

Eelyo bbala ‘mukanazi’ lilapandululwa munzila zyinji, kanji kanji mugwasyi, pesi mulongwe alimwi mukulwaizyi. Lyaamba kuti ‘wakuba aawe’ na ‘silweendonyoko’. Mwenzyeenzye kweenda ku busuena nkomutana sikide amana kuyoosya. Inga cabota kuba amugwasyi uzyi busena alizyili mumo. Mugwasyi inga tamutondezya buyo nzila ya kutozya, pesi inga wamutondezya azyilijazyo zysisidwe, kumubambila cakulya akwakoona. Ooyu ngo mukonzyanyo wa mugwasyi Jesu ngwa kaambila basiciiya bakwe kuti uya kubatumina.

Jesu wakali mugwasyi wa basiciiya bakwe, ino Muya Usalala weelela kubweza busena bwakwe. Bube bwa Leza tabukonzyi kupiminwa nguzu ku bube bwa Jesu; mubuntu bwa Muya Usalala wakali kukonzya kukkala mu myoyo ya bamusyoma. Muya Usalala wakali kukonzya kuyiisya basyomi bapya ziyatikizya ziyujatikizya, wakali kubatondezya kasimpe. Muya Usalala ngu Leza ukkala muli ndiswe buzuba abuzuba.



## **Cakucita**

Inga mwabelesya comwe na zyoonse zya kucita eenzyi.

15

tuvwalu-  
vwalu

## **Muzeezo 1**

Muyakuyandika cimwi cilemu mbuli cibeela ca cisamu, bbwe na saka lya mapopwe.

- Mulombe sikulyaaba omwe ku kabunga singuzu.
- Mumwaambile sikulyaaba kuti muyanda kuti abweze cintu cilemu comwe ncomwaleta munyendo mfwaafwi.
- Kufwumbwa buyo muntu amana kucisola eeci mulombe uumbi sikulyaaba.
- Ino muciiindi eeci amulombe boonse basikulyaaba babweze cintu cilemu antoomwe.
- Mumubuzye sikulyaaba mutaanzi na nkwiindana nzi kuliko

mukunyamuna mukuli ooyu lwakwe alikke aciindi nobali bobile. Kulombozoya nkwa kuti bwiinguzi bwabo bube bwa kuti ncubauba kugwasyanya kunyamuna cintu.

E Mupandulule kuti Muuya Uusala mugwasyi wesu; ulaa ndiswe ciindi coonsemukunyamuna mukuli yesu akutugwasyilizya buzuba abuzuba mumaumi eesu.

## **Muzeezo 2**

Nzila iimbi njomunga mwacita ooku nkutondezya kabunga luwaile lwa munkomo lutakwe mulilo.

- Mubabuzye mulimongolunga lwacita luwaile oolu nolutakwe mulilo.
- Ono mubikke luwaile ku malaiti lutalike kunywa mulilompoona muluyasye. Mubuzye kabunga ncolunga lwacita ono luwaile?
- Lwiindano ndwa kuti nolujisi mulilo inga lwacita milimo minji eeyo njolubambilidwe. Nokutakwe mulilo zyisyoonto zytunga twacita andulo!

Mupandulule kuti Muya Usalala ninguzu zya Leza muli ndiswe, zylakonzya kumana eelyo twelede kubonenesya kuti twazyiyungizya lyoonse 'twazuzyigwa' alugwasyo lwa Muya Usalala.



## **Muya Usalala mu Cizuminano ca Kaindi**

Muya Usalala taujanwi buyo munjiisyo zya Jesu; mubwini nkouli mu Bbaibbele lyoonse. Tusanguna kuubala mubbuku taanzi lya Bbaibbele, Matalikilo 1:2. Nkouli ku matalikilo aa nyika 'mumulengalenga aa maanzi' mbuli Leza nalenga nyika. Tulaubala alimwi kauboola ku bantu, Bashinshimi abami kutegwa bacite imwi milimo, pesi kutali ku musyomi oonse mu Cizuminano ca Kaindi. Bashinsimi bobile balatwaambila cacigaminina mbuli Muya Usalala

mbowakali kukonzya kubeleka muciiindi ciboola. Ezekeieli wakaamba mbuli mbowakabamba bantu ba Leza kusalala, kubabamba kuti bamumvwide alimwi akubikka Muya muli mbabo. (Inga mwacibala eeci muli Ezekeieli 36;25-30). Aumwi Mushinshimi utegwa Joweli wakakanana ciindi ciboola oomo Muya wa Leza mowakatilwa ku basyoma. (Inga mwacibala eeci muli Joweli 2:28 – 29).

### **Muya Usalala mu Cizuminano Cipy**

Tulabala kapati zya Muya Usalala Mucizuminano Cipy. Johane Mubbizyi wakaboola kwambilizya kuti ngu Jesu wakali kukonzya kuzuzikizya zyishinshimi eenzyi kwiinda mukubbizya a Muya Usalala. Majwi aa Johane alilembedwe mu Milumbe Mibotu, eeco calo caapa bupati bwawo. Kunze kwa kubuka kuzwa ku bafwu, Jesu wakaambila basiciiya bakwe kuti balindile mu Jelusalema nkaambo wakali kuyanda kubatumina ‘cipego taata ncakabasyomezya’ (Luka 24:49 alimwi a Incito 1:4) – zytondezyo zyakuzuzikizya zyishinshimi zya Joweli, Ezekeieli a Johane Mubbizyi.

Buzuba Muya Usalala nowakasika kuli basiciiya bwakaitwa kuti mbuzuba bwa Pentecost. Mubuzuba oobo bbunga lya bantu lyakali swaangene mpoona Petro, uumwi wa basiciiya ba Jesu, wakaambila bbunga:

*Ndilyonya Petro wakabaambila kuti, Amusanduke,  
mubapatizigwe umwi umwi muzina lya Jesu Kristo, mujatilwe  
zibi zyanu, nomwati tambule cipego ca-Muuya  
Uusalala. Nkaambo cisyomezyo cili kulindinywe, akubana  
banu, akuliboonse abali kule, mbatikaite Mwami Leza wesu.*

*Incito 2:38-39*

Muzyibe kuti lino oonse muna Kristu wakakonzya kutambula Muuya Uusalala wakasyomezyedwe; alimwi, zyisyomyo zya Leza

zyakakonzya kusika kuli boonse bakajanika (kusanganya abatali ba Juda) aabo Leza mbakali kukonzya kwiita, muciiindi eeco alimwi aciindi ciboola. Eeci cilakonzyeka akuli ndiswe sunu. Muuya Uusalala ncipego ca Leza ku bana Kristu, cipego calo ncazumanana kutupa ciindi coonse mbuli mbwaponi muli ndiswe akutugwasya kukomena.



### **Mubandi**

Mutubunga twa bantu 3 na 4 mubelesye tuvwalu vwalu tuli 10 mukandike mibuzyo iicilila:

10  
tuvwalu-  
vwalu

- Sena kuli nomwakasololedwe kale a Muuya Uusalala? Mibuzyo iicilila ilagwasya bantu kuyeeya eeci kapati. Sena kuli nobaka:
- Kaunkide kuya kucita cimwi cintu pele jwi lyakabakasya?
- Limvwa kuti balyaambilile cimwi cibi kuli Leza?
- Limvwa ca nguza kapati kuti bacite cimwi cintu ncobata vwuli kucita?
- Kulwaizyigwa kubala Bbaibbele naaba kupaila?
- Limvwa kuti Kubota bacinze zyimwi zyintu mubube bwabo?
- Jisi kulimvwa kusololelwa a Muuya Uusalala?
- Mukulwaizyigwa buti aceeco ncomwaiya ca Muuya Uusalala sunu?



### **Mupailo**

Mbuli kabunga, mupaille kuti umwi aumwi akomene mukuzyiba mulimo wa Muuya Uusalala ancoubeleka mumaumi eesu.

5  
tuvwalu-  
vwalu

Lino mube bobile bobile. Amwaambile bantu kuti baambilane aumwi ngobali limwi nabalimvwa kuti bakatambula kale Muuya Uusalala. Mpoona mubakulwaizye bapaililane.

- Kutu uumwi katali bwini nawakatambula kale Muuya

Uusalala mumubuzye na ulayanda kutambula eelyo na ulayanda mubikke janza ali nguwe mpoona mupaile kuti Muuya Uusalala umuzuye. Mumwaambile kuti mupailile aamwi.

- Kuti na uumwi wakatambula kale Muuya Uusalala, mupaile kuti zuzyigwe alimwi anguwe eelyo uya kumvwa jwi lyawe kabotu kabotu mpoona acite ooko nkwaamvwa.



### **Cakucita iino mvwiki**

Mvwiki amvwiki kuli mulimo ngo tweelede kucitila ku maanda. Iino mvwiki mujane ciindi ca kulomba Muuya Uusalala kuti umusolwedele, mpoona mujane ciindi ca kuteelela ncowaamba. Mupaile kuli nguwe eelyo mulombe kuti umugwasye kumusolwedela mu zyintu ziomucita. Nkouli aumwi mulimo wa kubala ngo mweelede kucita na mulijisi Bbaibbele.



### **Kamboni**

Mbuli mbomujana ciindi ca kupaila akuswiilila ku Muuya Uusala iino mvwiki, muzyibe kuti muli aawe ciindi nomuli aa bantu. Muulombe kuti umugwasye kwaambila baabo mbomuswaanya iino mvwiki, mpoona muswiilile mbuli mboumulailila bwa kucicita eeci. Inga mwabuzya bamwi bana Kristu Muuya Uusalala zyawakabasolwedela kale.

### **Cakubala Cakulisalila**

Kuti na bantu balijisi coolwe cakuba aa Bbaibbele (naaba mulongwe ujisi Bbaibbele) nkokuti zyakubala a Muuya Uusalala zyinji. Mubakulwaizye babweze cifwanikiso ca peeji eeyi mu mawaile aabo naaba kulemba bumboni bwa zyibalo mu mabbuku aabo kutegwa bakabale ku ng'anda. Zisyoonto zytobela azyalo zyilatuyiisya kunji kujatikizya Muuya Uusalala:

Johane 7:37 – 39 Uyiisya Muuya Uusalala kuba mbuli maanzi apona.

Johane 13:31 – 16:33 Jesu waamba Muuya Uusalala azyisyomyo zyaakapa kujatikizya muzeezo ngoujisi mumaumi abasyoma eelyo nakapiluka kuli wisi. Antoomwe:

- Johane 14:26 – Muuya Uusalala mbuli mwiiyi
- Johane 15:26 – Muuya Uusalala ncowaamba ali Leza
- Johane 16:13 – Muuya Uusalala mbuli musololi

Ba – Roma 8:14 Muuya Uusalala ulatusololela mbuli bana ba Leza

Ba – Efeso 4:29 – 32 Tucenjezyegwa kuti bube bwesu bulakonzya kunyemya Muuya Uusalala uuli muli ndiswe

1 Tesalonika 5:19 Tucenjezyegwa kutazima mulilo wa Muuya Uusalala

## Muzuzyigwe a Muuya Uusalala



'Aboobo tamweelede kufubaala,  
muleelede kumvwisya mbulubede  
luyando lwa-Mwami. Mutakolwi bukoko  
buleta budakwi, pele amuzule Muuya.'

Ba-Efeso 5:17-18



### **Kulibambila**

Ncomuyandika mu cibeela eeci:

- Ntambo ndamfwu iikonzya kubelesyegwa mukuzundana, ambweni iilampa ntaamu 3.

Sena:

- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?
- Mwasala kale basikulyaaba bali 6 baticite mulimo eelyo mwabaambila ncobeelede kucita?



### **Kutambula Abwiinguzi**

5

tuvwalu-  
vwalu

- Mubalumbe boonse kukuboola ku kabunga.
- Mutalike amupailo mufwaafwi, utakatazyi.
- Mubuzye kabunga na kakacita ‘Cakucita iino mvwiki’ alimwi a milimo ya ‘Bukamboni’ kuzwa ku mvwiki yakainda.
- Mutambe bantu baambe cili coonse ncobakaiya na kuzyiba kuzwa ku ncito eenzyi.



### **Muzeezo**

Muzeezo wa cibeela eeci iino mvwiki ngwa kuzyiba kuti tusaanguna kuzuzyigwa Muuya Uusalala eelyo notwatambula cipego ca buumi bupya, alimwi tuyandika kuba akukulusya Muuya Uusalala buzuba abuzuba kutegwa buumi bupya bukomene. Ccita buyo kuti katuzwide Muuya Uusalala, kufwumbwa mbotubede, naaba ncotwasola kucita, cili buyo mu nguzu zyesu, eelyo taakwe ankocitutola.



### **Cipeto Camumutwe**

5

tuvwalu-

Mubalisye ku kabunga zyipeto zya mumutwe a bwiiminizi bwa mu Bbaibbele. Muzyibale alimwi mutubeela tusyooonto, mubone kuti kabunga kakonzya kubala kwa kutobelezya. Buce buce amubale

vwalu muzyibeela zyilamfwu eelyo kabunga kakatobelezya kusikila boonse bakonzye kucaamba cibalo. Mukulwaizye bantu basole kuciindulula lwabo beni.

*Aboobo tamweelede kufubaala, muleelede kumvwisya mbulubede luyando lwa-Mwami. Mutakolwi bukoko buleta budakwi, pele amuzule Muuya.*

*Ba-Efeso 5:17-18*



### Caano

Mubale caano citobela eeci ku kabunga:

Mwaalumi wakali kulota kwa ciindi cilamfwu kuba amootokala wakwe. Lino wakakonzya kuyobwedela mali manji, akujana iimwi yakali kuboneka kuba kabotu. Wakatola ciindi cilamfwu kulanga lannga mootokala, kulanga njini alimwi wakajana ciindi cakukonzya kuusunka akuweenzya.

Lino mulimo wakamana; wakabbadela eelyo wakapegwa makkii amootokal mupya wa Toyota. Kwakali zyintu zyinji ziyakayeeya kucita mukuti lino waba aa mootokala. Inga wakonzya kweenzya kuya ku ncito kuleka kubelesya cimbayambaya ca mucooko, alimwi buya inga wakonzya kubweza balongwe. inga wakonzya kuya ku dolopo lino mpoona akubona balongwe abamukwasyi, kuya ku misobano akuya kubona banamacaaca bapya. Zyikonyeka kucitwa tizyakali kugola.

Cakusaanguna ncakacita nkuswaya dolopo abalongwe basyoonto buyo ku mamanino aamvwiki. Bakafwuma kunyamuka kabotu kabotu mbokunga Lweendo lwakali lulamfwu, alimwi kwakali kutontola kweenda mafwumo fwumo. Bakasika mudolopo akuaba aciindi cibotu; pele nobakali kuyanda kunyamuka kujoka bakaba

apenzi. Mootokala wakatalika buya kabotu, bakeenda kwa Lweendo lusyoonto, mpoona kunze adolopo wakaide kuzungaana akuzimina limwi. Mwaalumi wakakopana loko. Inga mootokala mupya wamulekelezya buti mbwakazwa akuula?

Wakatumina mwaalumi wakamusambalila kuti nkooko abuzye na yakali jisi mapenzi aboobo, kakuli balongwe bakwe bakalitalikide kale kuyandaula muntu ukonzya kugwasya kulizya mootokala. Buce buce mubambi wakajanika kuti aulange mootokala. Wakaambaula a mwaalumi, kumubuzya kujatikizya mootokala. Buce buce mubambi wakatalika kuseka: mootokala taukonzya kuya kumbele pe wakaamba, nkaambo mungwimba wakali manide!

Mwaalumi wakasampuka; taakwe nakayeeyede kunywisya mootokala wakwe, kunze buyo kwa zyintu zya mambonwa zyakali kuyanda kucita awe. Mukubinda mungwimba wakabonwa, mootokala wakanywisyigwa mpoona balongwe bakaba munzila kuya ku ng'anda alimwi.

Eeci cakali ciiyo cibotu ku mwaalumi: nokuba kuti mootokala wakaulwa kauli mupya alimwi kaubeleka kabotu, wakali kukonzya buyo kucita boobo wamana kunywisigwa mungwimba akulanganyizyigwa. Oobo mbocibede andiswe amaaumi eesu mapya muli Leza – inga bwazumanana buyo kukomena kuti twacaala katuzwide a Muuya Uusalala.



### **Luzyibo lwamu Bbaibbele**

Mubale Ba-Efeso 5:8-20 ku kabunga:

*<sup>8</sup>Nkaambo kuciindi cakamana mwakalyoofwede, pele sunu muligwemukididwe mu-Mwami. Amweende mbuli bana balugwemuko, <sup>9</sup>nkaambo micelo yalugwemuko mbobubotu*

*boonse abululami alusinizyo. <sup>10</sup>Amusunkulule, kuti muzibisye zintu zibotezya Mwami. <sup>11</sup>Mutanooyanzani amilimo yabuyo yamumudima, pe, amwiiyubunune kumeso aabantu, <sup>12</sup>Nkaambo kulausya bweeme nikuba kwaamba milimo njibacita cakusisikizya. <sup>13</sup>Pele zintu zyoonse ziyubununwa amumuni kumeso aabantu zilaba atuba, nkaambo coonse cibika atuba mumuni. <sup>14</sup>Nkikaako ncikwaambwa kuti, Sinsimuka, nosikoona, ubuke kuzwa kubafu, nkabela Kristo uzookumunikila.*

*<sup>15</sup> Amucenjele loko mbumweenda. Muteendi mbuli bafubafuba, pe, amweende mbuli basimaanu. <sup>16</sup>Amujatisye loko ciindi canu coonse, nkaambo kakuti mazuba aasunu mabi, <sup>17</sup>aboobo tamweelede kufubaala, muleelede kumvwisya mbulubede luyando lwa-Mwami. <sup>18</sup>Mutakolwi bukoko buleta budakwi, pele amuzule Muuya. <sup>19</sup>Amulayane lyoonse antembauzyo anyimbo zya-Leza amalelebu, akuya bwiimba akutembaula Mwami mumyoyo yanu, <sup>20</sup>alimwi zintu zyoonse zili buti amuzilumbe lyoonse kuli-Leza Taateesu muzina lya-Mwami wesu Jesu Kristo,*



Paulu wakalemba lugwalo ku Ba-Efeso. Wakalulembela kuti lugwasyilizye kuyaka lusyomo lwabo akupa lugwasyo lwaku muuya. Ciyeyelwa kuti paulu wakakkala ku Efeso kwa myaka 3. Muciindi ecoo wakaambila bantu kujatikizya cipego ca Leza ca buumi bupya kwiinda muli Jesu. Alimwi wakabayiisya kuti ooyu mulumbe wakali wa muntu oonse, kutali buyo Ba – Juda. Bunji bwa baabo bama Giliki, aabo balo bakali kukomba misyobo misyobo ya mituni, tuleza, bakabaa lusyomo muli Jesu.

Ba – Efeso, mbuli ndiswe, bakasiya mudima akuzya ku mumuni. Bakaboola mung’anda ya Leza kutali mbuli bazike na babelesi pesi

mbuli bana ba Leza. Bakazuzyigwa a Muuya wakwe Uusalala pesi ooku takuli kunji. Beelede kukkala mu Muuya. Beelede kuzuzyigwa a Muuya Uusalala ciindi aciindi kutegwa basalale, batambule busololi alimwi akupanga bubotu, kuona kabotu akasimpe.

Paulu waamba kasimpe kakuti kaindi Ba – Giliki bakali kule kapati kuli Leza wa masimpe. Kuyunjizya, bukkale bwabo bwakali bwa kukazya. Katutana swaana Jesu twakali kule a Leza pesi twakazwa mumaumi eesu akaindi akunjila mucilongwe cipya a Leza Taata wesu.

Twakazyalululwa alimwi twakatambula Muuya wa leza Uusalala. Lino tuli bana ba Leza, pesi tweelede kukomena alimwi muli Leza. Lino tweelede kuzuzyigwa a Muuya ciindi aciindi, kutegwa tukomenzwe cilongwe cesu a Leza akuba mbuli nguwe.



### **Mubandi**

10  
tuvwalu-  
vwalu

Sena kuli nomwakayandide kwandaana? Ambweni kuyanda kucinca cimwi cintu mubube bwenu, kuyanda kwiiya cimwi cipya na kucinca ncito na cianza cibi.

Ino cakeenda buti?

Mwaambile kabunga kabe mutubunga tuniini – niini twa bantu 3 – 4 mpoona mubale Ba – Efeso 5:8-20 alimwi. Mubaambile basale zyintu eezyo zysisangene abuumi bwesu bwa kaindi alimwi azyisangene abuumi bwesu bupya mumumuni.



Atubone mbuli Muuya Uusalala mbowakacinca maumi abasiciiya. Mubale Incito 4:31-37 ku kabunga:

<sup>31</sup>*Lino nobakamana kukomba, cibunganino cabo*

*cakazunganizigwa, elyo boonse bakazuzigwa Muuya Uusalala, nkabela bakatalika kwaamba makani aa-Leza akaanzambwene.*

*<sup>32</sup>Nkabela inkamu yoonse yabasyomi kiili amoyo omwe amuuya omwe. Kakutakwe muntu akati kabo uwakaamba kuti, Zintu nzenjisi nzizyangu ndemwini, pele zyoonse zyakali zyabanamaleya. <sup>33</sup>Nkabela baapostolo bakali kulungulula canguzu loko makani aabubuke bwa-Mwami Jesu, alimwi luzvalo lupati lwakali abo boonse. <sup>34</sup>Lino kakutakwe muntu akati kabo uwakabula cintu, nkaambo kakuti boonse abakajisi myuunda na maanda bakazyuuzya, <sup>35</sup>bakaleta mali aamakwebo, baabika kumaulu aabaapostolo, elyo umwi aumwi wakaabilwa mbubonya mbwaakabulide.*

*<sup>36</sup>Lino Josefa, uwakaulikwa kubaapostolo izina lya-Barnaba (nkukwaamba kuti Mwana waluumbulizyo), mu-Levi uuzwa kucisi ca-Kupro, <sup>37</sup>mbwaakajisi muunda, wakauuzya, wakaleta mali aawo, waabika kumaulu aabaapostolo.*



Eeci cibalo citwaambila kuti basiciiya ‘bakazwide Muuya Uusalala.’ Eeci cakacinca maumi aabo munzila isimpide. Lino bakakonzya ‘kukanana jwi lya Leza cakutayoowa.’ Bakakonzya kuba baabi akwaabana zyintu zyobakajisi kutegwa ‘kubule muntu uubulide akati kabo.’ Mukuzuzyigwa a Muuya Uusalala cakaambilizya kuti bakali kukonzya kuswena ku nguzu zya Leza abusololi kutegwa bapone maumi aandeene kuli yaayo ngobakali kupona kunze.

Atuzumananne kuzuzyigwa a Muuya Uusalala. Muuya Uusalala uyakukonzya kutupa kucita ceeco ncotutakonzyi kucita mubuteteete bwesu. Uumwi ujanika mu Cizuminano Cakaindiutegwa Zerubbabel wakalilibilikide kutalika kuyaka ciyako cipati kuyakila Leza, pesi wakapegwa mulumbe utobela, “Takuli ku

micito na nguzu, pele Muuya wangu,” mbwaamba Mwami Singuzu zyoonse.’ (Zakariya 4:6). Tulakonzya kucita zyinji kwiinda mu Muuya wa Leza kwiinda mbotunzya muli lwesu. Mbuli mwaalumi amootokala wakwe, inga wacita zyinji anjiyo kuti wainywisya mungwimba!



### **Cakucita**

(Mweelede kubamba basikulyaaba benu kamutaninga cita cisobano eeci.)

10  
tuvwalu-  
vwalu

Tuya kusobana cibano. Muzeezo wa cisobano eeci ngwa kututondezya kuti Muuya Uusalala nguutupa nguzu zya kukonzya kucita zyimwi zgotutakonzyi mu nguzu zyesu. Cipa acoolwe ku kabunga kuti kakonzye kulumbaizya Muuya Uusalala.

Muyakuyandika ntambo kutegwa musobane cisobano ca kukwelana. (Mucisobano ca kukwelana mabunga 2 ayelede kukwelana mukuzundana kumpela lya ntambo.)

Nkamu 1 itegwa ‘Tulaa nguzu.’ Mubaite baboole kumbele mpoona eelyo nobacita boobo kutegwa balizunze manguzu aabo. Balisyomede mpoceela kuti balazunda mumusobano akaambo kanguzu zyo bajisi. Balavwula kuliita zyina lyabo ca nciki.

Nkamu 2 itegwa ‘Nguzu zya Muuya’. Mubaite baboole kumbele pesi kabalidonaika, kabatondezya kuzyiba kuti iimwi nkamu ilijisi nguzu nokuba balizyi bwini kuti bakatola ciindi cilamfwu kulifoola. Balaliita zyina lyabo pele kutali ca nciki.

Nkamu zyobilo zyiya kuzundana kukwelana. Uti zunde ulabonwa kwiinda mukukoma zyiindi zgotatwe.

**Ciindi Citaanzi 1:** Mubone kuti nkamu zyatalika kuzundana

cakufwambaana. Nkamu 2, ‘Nguzu zya Muuya’ yazundwa. Nkamu 1, ‘Tulaa nguzu’ balilumbaizya ku nguzu zyabo akuli zyoonse zyoobaka cita. Baamba zyintu mbuli zyeeyi, “Tamulangilwi kutuzunda. Mulalangilwa kutakata ono.”

Musololi wa ‘Nguzu zya Muuya’ wapa majwi akusinizya, kwaamba zyintu mbuli zyeeyi, “Tweelede kucita kwiinda waawa, inga titwazundwa. Eeci tatulicitili lwesu. Tweelede kukwelesya. Leza ulatugwasya.”

**Ciindi Cabili 2:** Bazulilwa mu ‘Nguzu zya Muuya’ bajana kuyumizyigwa kupya akulyaaba. Bukotama mu mupailo Cabinda kabatana kwela ntambo. Bakwela cabili mpoona canyandya muntu oonse ‘ba Nguzu zya Muuya’ bazunda ‘ba Tulaa Nguzu’. Musololi wa ‘Nguzu zya Muuya’ wapa majwi abukulwaizyi ku mbunga yakwe. ‘Ba Tulaa Nguzu’ baboneka kunyongana akutyompwa.

**Ciindi Catatu 3:** Bazulilwa mu ‘Nguzu zya Muuya’ bapaila alimwi mpoona ono bazunda mumuzundano wa kukwelana cakubinda. Amubone kuti boonse beebelezya babasekelele. Mukulwaizye mbunga yoonse yompolole kulumbaizya kuli ‘Ba Nguzu zya Muuya.’



10  
tuvwalu-  
vwalu

### **Mupailo**

Mwaambile mbunga kuti ibe mutubunga twa bantu 3 na 4. Lino mubakulwaizye bapaililane, kulomba Muuya Uusalala kuti uzule muli mbabo akubagwasya kuponena mu nguzu zyawo.

Mujale ciindi ca mupailo kwiinda mukupailila mbunga yoonse ooyu mupailo.

Ooyandwa Mwami,  
Tuyanda kukubelekela. Tuyanda kukukkomanisya.  
Tuzuzye a Muuya Uusalala. Tuzuzye lyoonse.  
Ameni.



### **Cakucita iino mvwiki**

Mvwiki amvwiki kuli mulimo ngo tweelede kucitila ku maanda.  
Mubikke buzuba abuzuba cakuba mubube bwa Leza. Mumulombe  
amuzuzye a Muuya Uusalala alimwi, akumusolwedela  
akumutondezya mbuli mbomunga mwaba mbuli nguwe.  
Mwaambile kabunga kenu ka Matalikilo zyamucitikila.



### **Kamboni**

Basiciiya bakacincigwa akaambo kakuzuziyigwa aMuuya Uusalala.  
Mbuli mbo muzuziyidwe, muyeeya zyimwi zyizo zya mubili wenu  
zyiyandika kucinca mppona mubone kuti ooku mwakucita.  
Mutondezye bantu bamuzungulukide milimo yenu alimwi abube  
bwenu mbobucincigwa a Muuya Uusalala.

3

## Kulengwa Mubube Bwa Leza



'Pele swebo toonse mbutuli amasyu mavumbulule, tuli mbuli ciboniboni, tulabonya bulemu bwa-Leza, aboobo tuli mukuya busanduka akuba mbubonya mbwabede mwini. Tuli mukuya butabukila mubulemu, nkaambo bulemu bwesu bulazwa ku-Mwami Muuya.'

2 Ba-Korinto 3:18



### **Kulibambila**

Sena:

- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?



### **Kutambula Abwiinguzi**

5

tuvwalu-  
vwalu

- Mubalumbe boonse kukuboola ku kabunga.
- Mutalike amupailo mufwaafwi, utakatazyi.
- Mubuzye kabunga na kakacita 'Cakucita iino mvwiki' alimwi a milimo ya 'Bukamboni' kuzwa ku mvwiki yakainda.
- Mutambe bantu baambe cili coonse ncobakaiya na kuzyiba kuzwa ku ncito eenzyi.



### **Muzeezo**

Muzeezo wa cibeela eeci iino mvwiki ngwa kuzyiba kuti toonse twakalengwa mucinkozya ca Leza. Nokuba boobo, eeci cifwanikiso cakavwuntamikwa muli ndiswe, eelyo inga cakukulusyigwa buyo kuti natwatambula akukomena mu buumi bupya. Jesu nce cifwanikiso ca Leza cini cini, mpoona Muuya ulatucinculula buzuba abuzuba kuba mu cinkozya ca Jesu.



### **Cipeto Camumutwe**

5

tuvwalu-  
vwalu

Mubalisye cipeto ca mumutwe abumboni bwa mu Bbaibbele ku kabunga. Mubale alimwi mutubunga tuniini niin, mubone kuti kabunga kalaindulula kubala. Buce buce mubale ku tubunga tupati pati antoomwe akabunga kakainduluzya mane boonse bakonzye kwaamba cipeto ca mumutwe coonse. Mukulwaizye bantu basole kwiinduluka muli lwabo.

*Pele swebo toonse mbutuli amasyu mavumbulule, tuli mbuli ciboniboni, tulabonya bulemu bwa-Leza, aboobo tuli mukuya busanduka akuba mbubonya mbwabede mwini. Tuli mukuya butabukila mubulemu, nkaambo bulemu bwesu bulazwa ku-Mwami Muuya.*

2 Ba-Korinto 3:18



### **Caano**

Mubale caano citobela eeci ku kabunga:

Bwakali buzuba bwa mumuni, pele, bukasaala. Happy wakalikondedwe taakali Mainza eelyo wakeenda mumugwagwa. Wakazwide akuzwa amunzi mukuzyiba kuti kwa ciindi buyo cisyoono lilabbila zuba kataninga sika nkwakali kuya. Bwakali bumwi bwa mazuba ainda kupya ngaakali kukonzya kuyeeya, aboobo wakabwezelezya azyigabba zya meenda, pesi zyoonse zyakanyina meenda. Aboobo wakakondwa kubona masamu kazingulukide kazyiba kakazyibidwe kuti nkabotu kunywa meenda. Kunze kwa kumana nyota yakwe aawa, wakali kuyanda kuzuzya zygabba zyakwe akusyoma kuti ziyi kumusinsya kugolela lweendo lwakwe.

Eelyo Happy nakasika amasamu, wakaalumba ku mumvwule. Agolela meenda wakafugama kuti ateke azula buyo mukanwa. Cakufwambaana wakaleka akulanga cigambya, wakakatazyigwa kuli ncaKabona. Wakaliubwene kale mumvwule wakwe, pesi kutali bonyi boobu. Tiwakali buyo kuli bonya kabotu, wakali kwengedwe eelyo mabala akali kumweka loko. Kanji kanji maiwe aleenzya meenda naaba bantu na banyama balakopa atala tala, kupanga kuti kubule muvwule uulibonya. Sunu kwaina muwo, naaba bamwi bantu na banyama banywa mukazyiba. Mumuni abusena akaimvwi Happy wakali kutondezya bwini bwa cintu mbocibede. Taakwe nakabwene

cimboni –mboni na kabeela kalubulo kamweka, wakagambwa kulibona kabotu kabotu mbuli mbwakali kubona bamwi.

Kulanga mbuli mbwakalibonyezyede bwa cini cini Happy wakamweta mweta ku busyu bwakwe – eelyo mbuli mbocakaba, cimwule cakwe cakamumwetwida acalo. Cakatobela wakafwinkila mpoona acalo cimvwule cakwe cakainduluzya. Happy wakatambika janza lyakwe, mpoona acalwe cimvwule cakwe cakatambika. Wakalanga kulumwensyi, mpoona kululyo eelyo cimvwule cakwe cakatobelezya. Wakamba amaanza aakwe, nokuba kuti cimvwule cakwe cakatobelezya Happy wakaima, pesi kwakaindi buyo kaniini mpoona wakakamba alimwi. Wakaboneka kukatazyigwa. Nakakamba maanza aakwe akapanga coongo – cimvwule cakwe nocakakamba maanza aaco takapanga coongo. Mpoona Happy wakacilanga cimvwule cakwe cakaanza mbwene akuti ‘Halo’. Cimvwule cakwe cakamulanga cakaanza mbwene, mulomo waco wakajuka, milomo yakaboneka mbuli kuti yakali kubamba bbala, pesi yakaumwine buyo.

Happy wakakkala akuyeeya kwa kaindi. Mpoona wakazyiba kuti cimvwule cakwe nocakali kuboneka mbuli nguwe akutobelezya micito yakwe, taansyi mbubo bwini mbwakabede. Ticakali kukonzya kupanga coongo. Ticakali kukonzya kuli citila zyintu lwaco. Cakali mbuli nguwe, pesi munzila zynji kutasika ali nguwe. Ndyoona buyo wakamwaa muwo ku busyu bwakwe akubona mivwimbi atala lya meenda. Tanga lya ng’ombe lyakaboola kuzya kunywa meenda mucizyiba. Lino cimvwule cakwe ticakacili kubosya akumweka, pele cakali mwaikide akutalibonya kabotu. Happy wakanyamuka akuzumanana Lweendo lwakwe amubuzyo omwe mumizeezo – sena inga kaya kucibona cimvwule cakwe kabotu kabotu alimwi?



## Luzyibo lwamu Bbaibbele

Mubale 2 Ba- Korinto 3:12-18 ku kabunga:

*<sup>12</sup>Lino mbuli mbutujisi bulangilizi buli boobu, tulaamba kaanzambwene loko, <sup>13</sup>Tatuli mbuli Musa iwakabika cilisitilizyo kubusyu bwakwe, kuti bana ba-Israyeli batadunamine eco cakati indilile. <sup>14</sup>Myoyo yabo yakaliyumide, nkaambo nikuba kusikila sunu eco cilisitilizyo nciconya mpocicili kuciindi ncibabala ibbuku Iya-Mulongo wakalekale, Tabayubunwidwi kuti cakaloba muli-Kristo. <sup>15</sup>Pele kusikila sunu kufumbwa ciindi ncibabala ibbuku Iya-Musa, cilisitilizyo cilikede kumyoyo yabo. <sup>16</sup>Anukuti kufumbwa ciindi ncibapilukila Mwami, cilisitilizyo cilagwisigwa, <sup>17</sup>Mwami ngu-Muuya, nkabela koonse nkwabede Muuya wa-Mwami kuli bulubusi. <sup>18</sup>Pele swebo toonse mbutuli amasyu mavumbulule, tuli mbuli ciboniboni, tulabonya bulemu bwa-Leza, aboobo tuli mukuya busanduka akuba mbubonya mbwabede mwini. Tuli mukuya butabukila mubulemu, nkaambo bulemu bwesu bulazwa ku-Mwami Muuya.*



Cibalo cesu citwaambila kuti tulacincululwa kuba mucinkozya ca Leza. Sunu, zyifwanikiso zylabweza misyobo yandeene. Muli cimwi ciindi ambweni inga zyakali zya kulemba, zya kuzila naaba zyintu zya kufwala na mabwe akutenda. Sunu tulijisi zyifwanikiso zya kufotola alimwi amisyobo minji ya zymwi zyikonzya kweenda. Zyoonse zylilijisi cintu comwe cikonyenye cakuti zyikonzyanya amuntu na cintu. Mucaano ca Happy tujana kuti kuboneka kwakwe kwakali mbuli nguwe, pesi kutasika bwini mbuli nguwe. Kubambwa mucinkonzya ca muntu caamba kukonzyanya aawe, pesi notwaamba kubambwa mucinkozya ca Leza cilainda akukonzyanya buyo mububoneke, caambilizya kuti tubambidwe *kuba* mbuli nguwe aswebo.



## Cakucita

Mwaambile kabunga kandaane muli bobile bobile. Baimikile akulangana. Umwi wabo ngusikucita cimwi pele umwi ndigilazi.

5

tuvwalu-  
vwalu

Mwaambile basikucita zyimwi kuti bacitite micito iindene (eeyi inga yaba ya kusinizya na ya kusobana buyo mbuli mbobayanda) mbuli magilazi mbwatobezezya akusola akubayiiya. Kwainda ciindi bacincane milimo mpoona basole alimwi.

Tacili cubauba lyoonse kuba cifwanikiso caumwi! Tweelede kubikkila maano mukubatobezezya muli zyobacita.



Kutegwa tuzyibe ncocaamba kuba kulengwa mucinkozya ca Leza, calagwasya kutalikila eeni mpolitalikila Bbaibbele. Mumabbuku mataanzi aa Bbaibbele, mu [Matalikilo 1:26](#) tubala kuti mubuzuba bwa cisambomwe bwa kulenga kwa Leza wakati, “Atulenge muntususu mucinkozya cesu, mubube bwesu.” Mu [Matalikilo 1:27](#) tubala kuti, ‘mucinkozya ca Leza wakabalenga; mwaalumi amwanakazi.’ Twakabambwa kuti tukonzyanye a Leza.

Aboobo eelyo Adamu a Eva, mwaalumi amwanakazi mutaanzi, bakalengwa mucinkozya ca Leza bakali mbuli Leza munzila zyinji pesi muli zyoonse tibakeelene anguwe. Mukonzyanyo omwe ngwa kulisalila, na kusala. Leza natakamukasya Adamu kulya mucelo omwe kuzwa ku cisamu ccita buyo kuti natakapedwe lwanguluko lwa kusala kucita na kutacita oobo. Pesi nokuba kuti bakali jisi kulisalila, nguzu zyabo zyakusala zyakali jisi mpozyigolela munzila zynji nkaambo tibakali kukonzya kuzyiba bulumbu bwa kusala kwabo. Mukwiindanya, Leza kusala kwa Leza takukwe magolelo kayi ngu singuzu zyoonse muli zyoonse.

Nkaambo bakalizyi kuti bakali konzyenye a Leza pesi bakali bace kuli

nguwe, ncakakonzya kumucenga Eva Satani. Ino bubeji bwa Satani mbwa buti (Matalikilo 3:5)? Takuli kuti kwiinda mukulya ku musamu ukasyidwe inga baba aluzyibo lwa kuzyiba cibotu acibi, pele oolo luzyibo lwakali kukonzya kupa ‘kuba mbuli Leza’. Mbakamana buyo mucelo ooyu mukaintu wakwe, Adamu wakalangana akusala kwa kucita mbubwena naaba kulibonya kumuyandisisya. Nakamana kulya, boonse bakazyiba kuti ani bakali mantaanda, pesi mubone kuti – tibakazyi ncobakeelede kucita. *Aboobo* taakwe nobakaba mbuli Leza. Nokuba kuti bakaba aluzyibo lwa cibotu acibi, taakwe nabakasongwaala kukonzya kulubelesya kabotu oolu luzyibo. Bakacaala mbace kuli Leza.

Kabanyongene akuzulwa, bakamuya Mulengi wabo. Nkabela, wakalilibambilide ku buzuba oobu. Wakabaambila kuti kutasyoma kwabo kwakabaletela mapenzi, kwatyola cifwanikiso cakwe ncakabikkide muli mbabo, mbuli cigabba na mutiba wapandaulwa mutubeela beela. Nokuba boobo wakabaambila kuti wakali jisi muzeezo wakubavwuna ku ndubizyo zyabo, kubamba ceeco cakajaigwa. Muzeezo ooyu wakali wakutuma Mwanaakwe, Jesu.

Mulugwalo lwakwe luya ku Ba-Korinto Paulu ulati Jesu nci, ‘fwanikiso ca Leza utalibonyi’ (Ba-Korinto 1:15). Muli Jesu, cifwanikiso eeco Leza ncakalenga mubantu cakakulusyigwa, alimwi kwiinda muli Jesu amumulimo wa Muuya Uusalala muli ndiswe, eeco cifwanikiso inga cakukulusyigwa muli toonse. Tuba citondezyo ca Leza cipona anyika, cibeela ca mubili wakwe eeco boonse ncobanga babona akuzyiba.

Cipeto ca Mumutwe caamba mulimo wa Muuya Uusalala mboukukulusya cifwanikiso ca Leza. Paulu wakalemba kwaamba busyu bwa Mosezi mbobwakamweka ciindi nakaswaangana aa Leza ku cilundu ca Sinai cakuti limwi bantu bakamulomba kuti

alivwumbe. (Inga mwacibala mu Kulonga 34:28-35.) Mpoona wakakonzanyanya kuswaana kwa Mozesi a Leza kuba mbuli cilongwe ca muna Kristu a Leza eelyo nasyoma. Nkwiinda mu Muuya Uusalala motukonzya kubamba cilongwe cesu a Leza Taata. Paulu waamba kuti tuli mbuli cimbonimboni ciyanda kutondezya lukondo lwa Leza. Milimo wa Muuya Uusalala kutukukulusya, ntaamu yomwe aciindi, kuba cifwanikiso ca Leza ciluzi.

Cifwanikiso cikonzyenye Mucizuminano ca Kaindi mwalo Leza mwali mbuli sikubotya golide a nsiliva; amubone mukonzanyo Intembauzyo 66:10 a Malachi 3:2:3. Muciindi eeco bafuzi balakkala ca bubombe kulindila mpoto ijisi lubulo lupya kutegwa makwisiyilili aboole atala. Mbuli mbocicitika eeci, sikubotya ulaateka akulindila aambi kuti anyamuke atala. Ccita paka akonzye kubona cimvule cakwe cikkalikene mulubulo lusungulukide nati zyibe kuti mulimo wakwe wasimpa. Eeci citondezya mulimo wa Muuya Uusalala mu maumi eesu. Mulimo wakwe uya kumana buyo eelyo akukonzya cifwanikiso ca Jesu Kistu muli ndiswe.



5

tuvwalu-  
vwalu

### **Mubandi**

Cibalo ca sunu cituyiisya kuti twakalengwa mucinkozya ca Leza, alimwi ulabeleka kujosya cifwanikiso eeco muli ndiswe. Nokuba boobo kuti natuyanda kuba mbuli nguwe tweelede kusanguna kuzyiba kuti ino uli buti.

Mutubunga twa bantu 3 na 4, mubuzye bantu bape mizeezo yabo kujatikizya Leza mbwabede.

Mubaambile babandike eeco jesu ncabaambila ali Leza calo cikonzya kuti tacizyibidwe kuli ndiswe.



## Mupailo

Mubale mupailo utobela uuzwa mu Intembauzyo 139:23-24:

10

tuvwalu-  
vwalu

<sup>23</sup> *Undilingule, O Leza, uzibe moyo wangu,  
Undisunke, uzibe miyeeyo yangu,  
<sup>24</sup> Bona na muli inzila imbi mulindime;  
Undeenzye munzila iitamani.*

Mubaambile boonse bakkale cakutabamba coongo kwa ciindi cilimbocide mpoona bayeeye eeci ncocaamba.

Mubale Intembauzyo 139:23-24 alimwi.

Kwainda ciindi cisyoono mwaambile bantu bapailile mutubunga twabo tusyoono alimwi akupailila uumwi munzila njoona. Kuti kamuzyi azyimwi zyibalo caamba kubotesyegwa a Muuya Uusalala, muzyisanganye azyalo mumipailo.



## Cakucita iino mvwiki

Iino mvwiki, muswaangane aumwi wa mukabunga ngo mutikanane limwi zyimwi nzila oomo cifwanikiso mocinga caindana amuntu mwini lwakwe. (Mutayeeyi buyo azyimvwule, inga mwayeeya azyifwanikiso na zyakulemba mbuli mukonzyanyo.)

Lino mukanane zyimwi nzila oomo Adamu a Eva mobakali mbuli Leza nobakalengwa, pesi kabateelene anguwe. Kwiinda mucibi ca Adamu a Eva bantu bakaba aluzyibo lwa cibotu acibi; pesi bakaceya kwiinda Mulengi wabo munzila zyimwi. Mubandike nzila 2 na 3 zyiindene zyumunga mwayeeya zyjisi lwiindano oolu eelyo myeeye bube mbozyijisi mubuumi bwenu.

Mumibandi yenu mutalubi kuti Leza tayandisiyi buyo ciwa mbocilibonya, uyandisya myoyo yesu.




## **Kamboni**

Kubambululwa mucinkozya ca Leza inga caba cintu cicisa. Muli Jakobo 5:16 Bbaibbele litukulwaizya kulyaambilila zinyonyoono zyesu kuli umwi aumwi akupaililana. Mubandike abamwi bana Kristu kujatikizya luzyibo ndomujisi lwa kubambululwa ntaamu antaamu kuya ku cinkozya ca Leza. Mubakulwaizye kwiinda mukubaambila bumboni bwa cintu cimwi nocakacitwa a Muuya Uusalala. Mubaambile bamukulwaizye kwiinda mukumupailila kutegwa muzuzye Leza amubambe kuba mbuli Jesu munzila njo mupana buzuba abuzuba.

lino mvwiki muunke mukacite cimwi cintu ncomuyeeya kuti inga cagwasya kumubamba na kumubamba kuba mucinkozya ca Leza. Mulangisye kapati acibeela citondezya bube bwa Leza na cakucita calo cikonzya kumusyupa kucebuka. Mupaile kuti Muuya Uusalala ubeleke muli ndinywe umugwasye kuba mbuli nguwe.

## Bube bwa Leza Nduyando



'Nkaambo obuya Leza mbwaakayandisya nyika, wakapa Mwanaakwe simuzyalwa alike, kuti umwi umwi uumusyoma atafwidilili, pele abe abuumi ubutamani.'

Johane 3:16



### **Kulibambila**

Sena:

- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?



### **Kutambula Abwiinguzi**

5

tuvwalu-  
vwalu

- Mubalumbe boonse kukuboola ku kabunga.
- Mutalike amupailo mufwaafwi, utakatazyi.
- Mubuzye kabunga na kakacita ‘Cakucita iino mvwiki’ alimwi a milimo ya ‘Bukamboni’ kuzwa ku mvwiki yakainda.
- Mutambe bantu baambe cili coonse ncobakaiya na kuzyiba kuzwa ku ncito eenzyi.



### **Muzeezo**

Luyando Iwa Leza, nje nzila mpati njotukonzya kupanduluzya mbwabede. Tuli luzyi luyando lwakwe munzila zyinji. Wakatuma mwanaakwe kuzya kutufwida. Notwakali bazike mucinyonyoono, Jesu wakatufwida. Wakatuyanda katutana muyanda swebo. Bamuccilila balazyibwa aluyando oolu, alimwi eeci ncecikomana muli ndiswe mbuli cibeela cimwi cesu mubuumi bupya.



### **Cipeto Camumutwe**

5

tuvwalu-  
vwalu

Mubalisye cipeto ca mumutwe abumboni bwa mu Bbaibbele ku kabunga. Mubale alimwi mutubunga tuniini niin, mubone kuti kabunga kalaindulula kubala. Buce buce mubale ku tubunga tupati pati antoomwe akabunga kakainduluzya mane boonse bakonzye kwaamba cipeto ca mumutwe coonse. Mukulwaizye bantu basole kwiinduluka muli lwabo.

*Nkaambo obuya Leza mbwaakayandisya nyika, wakapa Mwanaakwe simuzyalwa alike, kuti umwi umwi uumusyoma atafwidilili, pele abe abuumi ubutamani.*

*Johane 3:16*



### **Caano**

Mubale caano citobela eeci ku kabunga:

Mumyaka ya muma 1930 ku Amerika kwakali kukkali mwaalumi ulaa zyina Iya John Griffith. Wakali jisi mukaintu amwana mulombe muniini eelyo ncito yakwe yakali yakweenzya muncini uzumizya ztitima kulanduka mulonga wa Mississippi.

Bumwi buzuba John wakabwezelezya mwanaakwe kuya ku ncito kutegwa akumutondezye bbiliki akumwaambila kujatikizya zytima zyakali kulanduka alindilyo. Mwanaakwe wakakondwa kuba ciindi awisi, kwiiya mulimo wakwe.

Nakamana kutondezya mwanaakwe, John wakamvwa mulosi wa citima kule ale mpawo wakazyiba kuti citima citamuki ca Memphis cakali munzila. Wakabalikila ku kaanda nkakali kubelekela kutegwa akatyanke zyibulo, wakasiila mwanaakwe malailile akuti acaale aawo mpakabede. Mukubula coolwe mwanaa John takateelela pe eelyo wakasoka wamutobela wisi, wakawa akuwida eeni mpocakali kulangilwa kunyonena cibulo kutegwa bbiliki lijilwe.

John wakacibona cakacitika eelyo wakalanga mwanaakwe mubuusu, wakalangana amuzeezo mubi. Takajisi ciindi cakufwutula mwanaakwe akukwela cibulo caambilizya kuti citima inga calanduka kabotu, wakeelede kusala: buumi bwa mwanaakwe, na maumi abantu bali 400 bakali mucitima.

Oobo buzuba wakaba akusala kwiinda kusyupa, wakaaba

mwanaakwe kutegwa bantu bakali munyendo bafwutuke. Bakazumanana mulweendo lwabo kabatazyi kuti ino John wiinda munzi kutegwa bapone.<sup>3</sup>



### **Luzyibo lwamu Bbaibbele**

Mubale 1 Johane 3:16-18 kukabunga:

*<sup>16</sup>Lino luyando lwa-Leza tulalubona boobu, nkaambo wakatutulila buumi bwakwe, nkabela aswebo tuleelede kutula buumi bwesu nkaambo kabeenzuma. <sup>17</sup>Pele oyo uujisi imbono zyaansi ano, nekubaboobo naabona mweenzinyina uubulide ulamujalila luzyalo lwakwe, ino luyando lwa-Leza lulakala buti mulinguwe? <sup>18</sup>Nobana bangu, luyando lwesu lutabi lwamajwi buyo niluba lwalulumi, lube lwamulimo alwalusinzyo.*



Luyando ndibbala ndyotuvwula kumvwa. Ulakonzya kuba ‘muluyando’, kuyandwa abamukwasyi na balongwe, inga mwayanda kabunga kamwi ka basimisobano, musyobo wa zyakusama na musyobo wa cakulya. Bbala lijisi milimo minji azyakwaamba aboobo ncibotu kuzyiba nokuceya ncotwaamba notwambaula luyando lwa Leza.



### **Cakucita – Makani Mabotu**

Zyinji nzila zyoyunga twatondezya luyando lwesu ku bantu bamwi. Muzandule kabunga akati mpoona mubabuzye batondezya mweelwe wa luyando lwabo kukabunga kamwi. Amuyeeeye zyimwi nzila momunga mwakanana luyando anzila momunga mwatondezya luyando. Mube bankutwe eelyo mube azya mangwinini!

5  
tuvwalu-  
vwalu

---

<sup>3</sup> Christian Research Institute (2010). *John Griffith, the Bridge Operator* [MUKASABWE] Lilajanwa: [www.equip.org/hank\\_speaks\\_out/john-griffith-the-bridge-operator/](http://www.equip.org/hank_speaks_out/john-griffith-the-bridge-operator/) [Basomwa pa 12 Januwale 2018]



## Mubandi – Ino Luyando Iwa Leza Ninzi?

Asyoonto asyoonto mubale 1 Ba-Korinto 13:4-7 ku kabunga:

10

tuvwalu-  
vwalu

*<sup>4</sup>Luyandisyo lulakazika moyo akufwa luzyalo, Luyandisyo talukwe ibbivwe, talulikankaizyi, talulisumpuli, <sup>5</sup>talukwe cisapi, talulilangilili cintu, talufwambi kujata bukali, taluyeyi inkoto yabubi. <sup>6</sup>Talukondelwi zitaluleme pe, lulakondelwa lusinizyo. <sup>7</sup>Lulakolela makani oonse akuba alusyomo lyoonse, lulijisi bulangilizi lyoonse akuba acamba kumapenzi oonse.*

Mwandaanye kabunga mutubunga tuniini – niini mpoona mukanane mibuzyo itobela:

- Ino eeci cibalo cituyiisya nzi kujatikizya luyando Iwa Leza?
- Sena kuli bupanduluzi bwa luyando bupedwe aawa bukugambya?
- Sena kuli zyiindi aabona nocikuyumina kuyanda mbuli boobu? Zyiili eezyo zyiindi zyiinda kukatazaya?
- Ino mbuuti mbonga wayanda kwiinda buyanda Leza?
- Mukabunga kenu amubale cibalo eeci alimwi ono kamugusya bbala lya luyando akubikka zyina lyenu.



## Luyando Lwini

Cibalo cibandika kuyanda mumucito amukasimpe, peswi ino luyando lwini ninzi? Cipeto ca mumutwe ca mvwiki iino acaano zytondezya luyando Iwa Leza kuli ndiswe mbuli mboluli lunji cakuti wakalibambila kutula mwanaakwe mucilawo cesu. Eeci catondezya mucaano eelyo John Griffith nakabamba kusala kubi kapati akati ka buumi bwa mwanaakwe ngwakali kuyanda kapati, amaumi amyaanda ya bantu bakali mucitima.

Luyando Iwa Leza lulandeene aluyando oolo ndotumvwa na kutondezya baabo batuzungulukide. Kanji kanji tuyanda baabo

batuyanda: balongwe besu, bamukwasyi, balumi, bakaintu abana. Tacivwuli kucitika kuti tuyande baabo batatubikkili maano naaba kuba kwesu pesi eeci ncencico ncaakatucitila Leza.

Mwiki yakainda twakalanganya kasimpe kakuti twakalengwa mucinkonzya ca Leza; umwi aumwi wesu ulandeene alimwi ulayandwa kuli Leza. Nkaambo ka luyando oolu ncakatumina mwanaakwe kuzya kutufwida, kutegwa tukonzye kwanguluka mubuumi bupya. Bunji bwenu mwakabutambula oobu buumi bupya eelyo mwatalika kumvwa kucinca muli lwenu akaambo ka ceeci. Kumwi kwa kucinca nkwa kuti muya kumvwa mbuli Leza mbwamuyandisya, ambuli mbwayandisya bamwi bantu.

### **Luyando Mumicito**

Luyando lwa Leza lulaindilila akumvwa buyo; nchimwi cintu ncakatondezya akubandika. Eelyo Jesu nakabuziyigwa asicikolo wa mulawo kuti ino mulawo mupati nguuli wakati:

*<sup>37</sup>Wakamwaambila kuti, Yanda Leza Jehova wako amoyo wako woose, amoya wako woose, amumiyeeyo yako yoose. <sup>38</sup>Ngooyu mulazyo mutaanzi mupati. <sup>39</sup>Awabili ulikozyene awalo, ngooyu, Yanda mweenzinyoko mbuli mboliyanda omwini.*

*Matayo 22:37-39*

Leza ulayanda kuti atuyanda aswebo twamuyanda: tubambidwe kuba mucilongwe anguwe, nkaako eelyo notwatambula buumi bupya tulavwula kutambula luzyibo lwa luyando oolu, alimwi aabona akulimwa kuyandwa kwiinda munguzu zya Muuya Uusalala. Tatubambi kuti tumuyande – tulaangulukide kusala – pesi utwaambila kuti tumuyande amoyo omwe, azyizo zyesu zyoonse, mbweena mbwatuyanda.

Pesi tacigoleli aawa pe. Mbweena mbotuyanda Leza, utwaambila kuyanda baabo batuzungulukide. Citobela kuti na watuyanda toonse, waambila bamuccilila kuti abalo bayande muntu oonse. Eeci tacaambi kuti mweelede kubayanda, na kuyanda zyobacita, pele caamba kuti mweelede kubabona kuti baleelede kuyandwa mpoona eeci ciya kumupa kukonzya kubapailila akubalangya kabotu akubalemeka. Ino Jesu wayungizya kutusola. Muciindi cimwi wakaambila basiciiya bakwe:

*Mwakamvwa mbukwakaambwa kuti, Yanda mweenzinyoko,  
pele sinkondonyoko umusule, Mebo ndamwaambila kuti,  
Amuyande basinkondonyoko, amubakombele bamupenzya*

*Matayo 5:43-44*

Leza uyanda kuti tutobele mukonzanyo wakwe akuzwa munzila yesu kutegwa tuyandw baabo mbotusyupigwa akusolwa. Eeci cijatikizya kubapailila, akujana nzila zyakubatondezya luyando lwa Leza kuli mbabo. Eeci tacilangiki mbuli nyika mboibona luyando pesi luyando lwa Leza mumicito ndwa bwini.



## **Mupailo**

Kulipailila jwi lya Leza cilaa nguzu. Amubale 1 Ba-Korinto 13:4-7 alimwi mbuli mupailo:

*<sup>4</sup>Luyandisyo lulakazika moyo akufwa luzyalo, Luyandisyo talukwe ibbivwe, talulikankaizyi, talulisumpuli, <sup>5</sup>talukwe cisapi, talulilangilili cintu, talufwambi kujata bukali, taluyeeyi inkoto yabubi. <sup>6</sup>Talukondelwi zitaluleme pe, lulakondelwa lusinizyo. <sup>7</sup>Lulakolela makani oonse akuba alusyomo lyoonse, lulijisi bulangilizi lyoonse akuba acamba kumapenzi oonse.*

Mupe ciindi cisyoonto kuli umwi aumwi kutegwa mumuipailo

akonzye kuliinza, naaba bobilo bobilo nabalayanda.  
Mumanizye amupailo uccilila, mubaambile boonse kabamuccililizya  
mulongo omwe omwe.

O Mwami, iino mvwiki ndiyiisye ndiyande mbuli nduwe.  
Ndapaila kuti undigwasye ndibe sicamba alimwi asiluse,  
Kutali sikunyonokelwa, sikulimvwa na sikulidunda.  
Ndigwasye ndikonzye kubikka bamwi kutaanguna, kukonzya  
kumuka kunyema alimwi akutabikkilila zyibi.  
Ndigwasye nditakondwi mucibi pele ndikkomanine kasimpe.  
Ndigwasye ndikwabilile, ndisyome, ndangile akubikkilila.  
Ameeni.



### **Cakucita iino mvwiki**

Jesu utwaambila kuti tuyande balwani besu akupailila baabo  
bamupenzya. Nguni ooyo ngomubona kuba mulwani, umupenzya  
na umuyumizyila buumi? Aaba inga kabala baabo mbomuzyi na  
baiminzi babusololi na mbaakani ziyumya buumi bwenu. Iino  
mvwiki mujane ciindi cakubapailila buzuba abuzuba. Mupaile kuti  
Leza alitondezye kuli mbabo. Mupaile kuti amuyungizyile luyando  
kuli baabo mbocimuyumina kuyanda.

Mvwiki iboola mukajane ciindi cisyoonto ca kwaambila kabunga  
mbuli mbomwakeenda.



### **Kamboni**

Musoleke kutondezya luyando mumicito ku muntu uumwi ooyo  
walo ngomutavwuli kubikkila maano; eeci caamba kubatamba ku  
cakulya antoomwe, kubacitila cimwi ca luse, kubatola kumwi na  
kubagwasya kucita cimwi. Mbuli mbomutondezya luyando lwa Leza  
mumicito mupailile coolwe cakukonzya kukanana luyando lwini lwa  
Leza alimwi amboluliko kuli mbabo kuti nabatambula cipego ca

5

# Mucelo wa Muuya

– Bube

'Pele micelo ya-Muuya njeeyi: — luyandano, lukondo, lumuno, busicamba, buuya, bubotu, lusyomo, lubomba, kulyeendelela. Kulibaabo bacitaula zili boobo taakwe Mulao uubalwisya.'

Ba-Galatiya 5:22-23



## Kulibambila

Sena:

- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?



## Kutambula Abwiinguzi

5

tuvwalu-  
vwalu

- Mubalumbe boonse kukuboola ku kabunga.
- Mutalike amupailo mufwaafwi, utakatazyi.
- Mubuzye kabunga na kakacita ‘Cakucita iino mvwiki’ alimwi a milimo ya ‘Bukamboni’ kuzwa ku mvwiki yakainda.
- Mutambe bantu baambe cili coonse ncobakaiya na kuzyiba kuzwa ku ncito eenzyi.



## Muzeezo

Muzeezo wa mvwiki iino ngwa kuzyiba kuti notwazuzyigwa a Muuya Uusalala, ulabeleka kuzyala mucelo mumaumi eesu. Eeyi nje micelo yaku muuya, mbuli luse, lukondo akusyomeka limwi itondezya bube bwa Jesu bwalo bukula muli ndiswe.



## Cipeto Camumutwe

5

tuvwalu-  
vwalu

Mubalisye ku kabunga zyipeto zya mumutwe a bwiiminizi bwa mu Bbaibbele. Muzyibale alimwi mutubeela tусуооnto, mubone kuti kabunga kakonzya kubala kwa kutobelezya. Buce buce amubale muzyibeela zyilamfwu eelyo kabunga kakatobelezya kusikila boonse bakonzye kucaamba cibalo. Mukulwaizye bantu basole kuciindulula lwabo beni.

*Pele micelo ya-Muuya njeeyi:— luyandano, lukondo, luumuno, busicamba, buuya, bubotu, lusyomo, lubomba, kulyeendelela. Kulibaabo bacitaula zili boobo taakwe Mulao uubalwisya.*

*Ba-Galatiya 5:22-23*



## Caano

Mubale caano citobela eeci ku kabunga:

Mutabi wa cisamu wakayandisisya kuzyala mucelo. Mutabi wakasolekesya kuzyala mucelo, pesi nokuba mbuli mbowakasoleka, taakwe cakacitika. Wakasoleka ca nguzu. Nkabela wakasolekesya, pesi taakwe mucelo wakakomena.

Mutabi wakali kuyanda kuti ono utakate buyo mpoona wakamvwa jwi lya cisamu kalipetekezya, ‘Andicicite.’ Mutabi wakaleka kulipenzya, kutonka akukwela eelyo wakasyoma cisamu kuti cibe ncecizyala mucelo. Mukugambya, mucelo wakatalika kulibonya. Kutali buyo omwe pesi minji.<sup>4</sup>

Nekamvwa caano eeci cakandipa kuyeeya abuumi bwangu. Mbweena mbuli mutabi mucaano, ndakali kusoleka kukomezyela mucelo wa Muuya Uusalala, ndakali kuti ujatikizya micito abube bwangu kwiinda mbocijatikizya ooyo uupa.

Muziyiindi zyinji ndakayeeya, ‘Kuti nandasoleka ca nguzu.’ Ndakasoleka ca nguzu. Ndme ooyo ulisolela. Nkunji nkundakali kuyanda kwaamba, ‘Ngooyu mucelo; langa, eeci ndicicita kabotu!’ Pele nkozyili zyimwi zyintu zyotutakonzyi kulicitila kabotu, nokuba kuti twasolekesya.

Kuti keli mbuli mutabi, Jesu uli mbuli cisamu. Ulapetekezya kuli ndiswe, ‘Andicicite. Muuya Uusalala aubeleke muli ndinywe.’ Mucelo ukomena taujatikizyi ndiswe, ujatikizya Muuya Uusalala ubeleka muli ndiswe kutubamba kuba mbuli Jesu, micito yakwe

---

<sup>4</sup> Lost Sheep (taakwe mwezi). *Basil the Branch* [MUKASABWI] Lilajanwa: [www.lostsheep.com.au/stories/basil-the-branch/](http://www.lostsheep.com.au/stories/basil-the-branch/) [Lyakajanwa mu 12 Mukazibaziba 2018]

abube bwakwe.

Cintu ciyandisi ncakuti nokuba kuti tulabulizya, kuti na twabikka kusyoma kwesu muli Jesu akutondezya kuti tulamuyanda kapati, amushishime cinga cacitika? Tuyakutalika kuzyiba ncocaamba kujatikizyigwa ku cisamu. Tuyakulijana katubweza buumi kuzwa ku cisamu ooko kwatakwe ciliko, mpoona cakutayeeyela mucelo walibonya walo uleta kukondwa muli Leza.



### **Luzyibo lwamu Bbaibbele**

Muli Johane 15, Jesu ubelesya mukonzyanyo mbweena mbuli wa mutabi acisamu. Ubelesya mukonzyanyo wa musaansa amitabi iili kuli nguwe. Upandulula kuti walo musaansa mpoona swebo tuli mitabi. Ulacibikka antangalala kuti muli lwesu buyo taakwe ancotunga twacita, pesi kuti twacaala muli nguwe inga twazyala. Notuzwide Muuya Uusalala tulajatilila ku musaansa, eelyo bumboni bwa ceesu mucelo utalika kuzyalwa mumaumi eesu. Mbuli mbotwabona atala aawa, eeyi micelo ijisi luse, lubomba alukondo. Musyobo wa micito itakonzyi kuliboolela kuli ndiswe, pesi Leza uyanda kukomena muli ndiswe nokuba boobo.

Leza uyanda kutondezya buumi bwakwe kwiinda muli ndiswe mukubelesya micelo njotuzyala. Notwakonzya kubona mbotuyanda kujatikizyigwa kuli Jesu, Muuya Uusalala ulaa lwanguluko lwakutondezya buumi oobu muli ndiswe munzila itandabele kutegwa boonse babone maumi eesu.



### **Mubandi**

Mutubunga twa bantu 3 na 4 amubandike mibuzyo itobela:

- Ino zyasamu na zisyango tuzyigwasya buti kuzyala micelo? Bwiinguzi inga kabusangene aboobu kuzyipa cakulya / meenda, kuzyikokola, kuzyikwabilila ku tuuka na banyama,

10  
tuvwalu-  
vwalu

kubona kuti ziyijisi mumuni munji / kukasaalilwa.

- Ncinzi cikonzya kutulesya kuzyala mucelo? Bwiinguzi inga kabusangene a cinyonyoono mumaumi eesu, kutayanda kucinca, kubula cilyo / meenda aku muuya, alimwi akubula bulemu.
- Ino inga twacita nzi kutegwa tubelekele aamwi aMuuya Uusalala kuti tuzyale mucelo? Bwiinguzi inga kusangene a mupailo, kujana cilyo ca ku muuya kwiinda mukubala Ibbaiibbele, kubaa ciindi abamwi basyoma.



Mubale Ba-Galatiya 5:16-26 ku kabunga:

*<sup>16</sup>Ncinjamba nceeci, Inzila niimweendela ibe yamu-Muuya, aboobo mutakaciti zisusi zyanyama. <sup>17</sup>Nkaambo nyama ilijisi zisusi zilwisya Muuya, awalo Muuya ulalwisya nyama, Ezi ziyobile zilasundana, aboobo mulakacilwa kucita mbuli mbwiiyanda myoyo yanu. <sup>18</sup>Pele kuti mulasungulwa a-Muuya, elyo tamuli kungsi a-Mulao.*

*<sup>19</sup>Lino milimo yanyama ilibwenekede, njeeyi: — bwaamu, busofwaazi, zisusi zibi, <sup>20</sup>kukomba mituni, bulozi, inkondo, bulwani, lukazyanyo, inyemo, insulano, mipampo mipampo, impilingano, <sup>21</sup>ibbivwe, inkolwi, injalalando, azimwi zili boobo. Lino ndamwaambila aazintu ezi mbubonya mbundakamwaambila kale, kuti abo bacitaula zintu zili boobo tabakooyookona Bwami bwa-Leza, <sup>22</sup>Pele micelo ya-Muuya njeeyi: — luyandano, lukondo, lumuno, busicamba, buuya, bubotu, lusyomo, <sup>23</sup>lubombo, kulyeendelela. Kulibaabo bacitaula zili boobo taakwe Mulao uubalwisya. <sup>24</sup>Lino abo ibakwe Kristo Jesu, nyama baliibambwide aciingano antoomwe aziciso zyayo azisusi zyayo.*

<sup>25</sup>*Lino nituponena Muuya, inzila njitweendela ayalo ibe ya-Muuya.* <sup>26</sup>*Tutabi basikambotwembotwe, tutakalazyanyi, tutabi abbivwe umwi amweenzinyina.*

*Ba-Galatiya 5:16-26*



Mucipeto cesu camumutwe kuzwa ku lugwalo lwa Paulu ku Ba-Galatiya, Paulu waamba kaanzambwene musyobo wa micelo njotuya kuzyala; ‘luyandano, lukondo, lumuno, busicamba, buuya, bubotu, lusyomo, lubombo, kulyeendelela.’ Masimpe kuti toonse yulakonzya kutondezya iimwi na yoonse micito eeyi nokuba kuti balimuzyi naaba kutamuzyiba Jesunkaambo twakalengwa mucinkozya ca Leza. Pesi, eelyo notukumbatiziyidwe ku musaansa – Jesu – ncubauba kuli Leza kutondezya mucelo mumweelwe munji amubulamfwu kwiinda mu nguzu zya Muuya Uusalala. Mbotubede eelyo Jesu natali andiswe inga ciba buyo cimvwule mumukonzyanyo. Nokuba kuti twabamba milawo yoonse inga titwakonzya kuzyala micelo mubunji alimwi mibotu ulikke Muuya Uusalala ngukonzya buyo kuti wabelekela muli ndiswe.

Kuti katujatikiziyidwe kuli Jesu, musaansa, alimwi buumi bwakwe kabweenda muli ndiswe, cipanga gano bbotu lyakuyeeya kuti bube Jesu mbwakatondezya nakali kweenda akati kesu abasiciiya bakwe bwaba bumboni mumaumi eesu.

Eelyo oobu bube tabujisi buyo mpindu kuli ndiswe; Leza ulabubelesya mumuzeezo wakwe. Muli Johane 15:16 Jesu ulati:

*Endinywe mundisalide, pele ndime emusalide, ndakamusala kuti mukeende akuzyala micelo iitamani, kuti zintu zyoonse nzomuyookumbila kuli-Taata muzina lyangu akamupe.*

Aawa Jesu tambauli kaanzambwene ku mucelo wa Muuya pele

ukanana butebuzi bwa cigaminina kuba bumboni kuti boonse babone.

Sena mwakamvwa kale kacaambwa kuti, naaba kulyaambila lwenu, “Cakandileta kuli ooyu muntu na kabunga aaka nduyando na lukondo na luumuno lwakatondezyegwa?” Na kuli namwakazyiba kale muntu wakali kuyanda Jesu, wakali kulibonya buya kuti uyanda kuzumanana kuya kumbele eelyo umwi nakati nciyumu na cilakatazaya? Na mwakaswaanganya kale uumwi walo, nokuba kuti ulaa buyumu yumu bunji, ulakonzya kutondezaya luse kuli bamwi? Na inga kamuzyi naba omwe walo utazundwi mukukazyanya? Ncotwambaula ncintu cimwi ceendakwiinda muli Jesu kuzya kuli ndiswe akupanga kucinca kuli baabo batuzungulukide.

Amucebuke ku cibalo cesu ca Ba-Galatiya. Cisyoonto ca 24 citugwasyilizya kucizyiba eeci. Kutegwa tukonzye kuzyala mucelo wa Muuya Uusalala tweelede kuzulilwa kuli Jesu Kristu. Nkokuti tatucizulilwi muli lwesu, tatuciliponeni eelyo kulombozoya kwesu kutegwa ‘nyama’ mucisyoonto. Aaba bakajaigwa (kujaigwa) antoomwe a Jesu mpoona ono Jesu wakabuka akupona muli ndiswe. Mumajwi aambi, kuzyala micelo, twacibona kale akuzumizya makanze eesu akulombozoya kwesu kuti tugagailwe aciingano.

Tulapona oobu buumi bupya muli Jesu kwiinda mulusyomo. Mucelo ukomena buyo notwalibambila kupa kusala kwesu kuli nguwe.

Muli Luka 22:42, kataninga unka kukufwa, Jesu wakapaila:

*Wati, ‘Taata, kuti wayanda, gwisya cinywido eci kulindime, nokubaboobo akucitwe kuyanda kwako, kutabi kwangu.’*

Jesu watondezuya mubuuya mbuli ncocaamba kupa. Sena nywebo na mebo muli jisi nguzu zyakucita boobo? Nguzu zyesu tolikke taziyikonzyi kukkwanisya kucita boobo; tuyakusika nkocigolela. Pesi tuliziyi kuti inga twacita zyintu zyoonse kwiinda mukusyoma nguzu zya Jesu. Eeci mbocilembedwe mu lugwalo lwa Paulu kuya ku Ba-Filipi. Mu [Ba-Filipi 4:13](#) ulati:

*I Zintu zyoonse buyo ndazikonzya nkaambo kanguzu nzipedwe kuli Kristo.*

Muzyisyoonto zya 25 a 26 Paulu weenga keengo katondezuya eeco ciyandisi aawa. Kuti na tuyanda kuzyala micelo wa ku Muuya tatweelede kuluba cisyiko. Tweelede kubambana a Muuya akuya cilongwe cesu anguwe.



### **Cakucita**

Mubuzye kabunga nakaciyeeya cipeto ca mumutwe ca mwiki iino? Mubabuzye bacaambe alimwi.

3  
tuvwalu-  
vwalu

Mupandulule kuti ooyu mucelo muyandisi kapati alimwi upa musyomi kuyanda akubelekela umwi aumwi akugwasya baabo babazungulukide cabunkutwe eelyo nobatana tambula cipego ca buumi bupya.



### **Mubandi**

Mutubunga twa bantu 3 na 4 mwaambile kabunga kalnganye [Ba-Galatiya 5:19-21](#). Eeziy zystoonto zytondezuya mucelo wa nyama (kuyandisisya kwesu). Mubuzye kabunga:

10  
tuvwalu-  
vwalu

- Ndwindano nzi ndomubona mumisyobo ya micelo?
- Mbulumbu nzi bwa micelo yaku nyama?

Mwaambile kabunga kaambe cipeto ca mumutwe alimwi. Eeziy

zyisyoonto zyaamba micelo ya ku Muuya.

- Mbulumbu nzi bwa micelo yak u Muuya?
- Sena bulumbu buli konzyenye na buliindene?

Muyandaula bwiinguzi butondezya kuti micelo yaku nyama iletela kuusa na kusinyikilwa. Micelo yaku Muuya ilaampindu alimwi iletela bulumbu bubotu.



Kusala nkukwesu; bukulwaizi bulilondokede. Cibalo ncotwali kubala citalika a Paulu kati, ‘Ngaaya malailile aangu: mweende mu Muuya, eelyo muzumizye Muuya ulete bululami ku buumi bwenu.’ Aumwi wesu weelede kusala kujatilila ku musaansa, Jesu.



### **Cakucita**

Aabona nciyumu kuli ndiswe kubona mucelo waku Muuya mumaumi eesu.

10  
tuvwalu-  
vwalu

Mwaambile kabunga kabe mutubunga twa bantu 2 na 3. Bantu beelede kuba aa bantu mbobazyi kabotu na mbobazyi kwa ciindi cili mbocibede.

Mubuzye boonse baambe mikonzyanyo ya mbuli micelo yaku Muuya njobakabona mumaumi abamwi. Nciyandisi kuti twaba basiluse alimwi basyomeka eelyo notucita ceeci. Eeci ncoolwe cakukulwaizyanya akutugwaysa kubona Jesu muli lwesu.

Muzumizye bantu bacite eeci kwa tuvwalu vwalu 5 na 10.



### **Mupailo**

Kuzwa muli cakucita, mwaambile bantu boonse balumbe Leza ku mukonzyanyo wapegwa mukabunga. Mpoona mubaambile bapaililane mukabunga kabo kwiinda muzyina lya kuti bayakucaala

15  
tuvwalu-

vwalu

muli Jesu, kabazwide Muuya Uusalala eelyo mucelo uya kukomena.



### **Cakucita iino mvwiki**

Buzuba abuzuba iino mvwiki musaangune mwindulule cipeto ca mumutwe mafwumo fwumo alimwi cibe cintu cakucaalizya masiku. Mbuli mbomutelaika buzuba masiku, mubuzye Muuya Uusalala kuti nguuli mucelo ngomujisi (nangomutajisi) utondezyegwe oobo buzuba.

Mupaile alimwi mafwumina accilila kuti Leza akomezwe mucelo uuli muli ndinywekutegwa mukonzye kuba azyoolwe zyakwaabanya nzila momukomezwa buumi bwenu bupya muli nguwe.



### **Kamboni**

Musale mucelo omwe waku Muuya iino mvwiki; mulangisisye ooyo walo ngomujana kuti ulamukatazya (inga kakuli kulyeendelela, luboma, kusyomeka?) Muzwe munzila yenu muyandaule zyoolwe momunga mwakonzya kubelesya akukomezwa cipego eeco. Ambweni inga kakuli ooyo ngomweelede kufwida luse mucooko cenu pesi cilasyupa kuyanda. Ambweni inga mwapa cimwi cintu calo ncomunga mwalisalila kupa uumwi utajisi mbuli mbomujisi.

Mupaile kuti kwiinda mumericito eeyi kuti mube acoolwe cakukonzya kwaabila ooyo muntu ngomwasala kuleleka alimwi ancomwamusalila, ambuli mbwanga awalo watambula buumi bupya oobo mbomubona.



6

## Kuleleka Batuzungulukide

'Jehova akulongezye akukubamba.  
Jehova akumunikile abusyu  
bwakwe akukufwida luzyalo.  
Jehova akubusizye busyu bwakwe  
akukupa luumuno.'

Myeelwe 6:24-26



### **Kulibambila**

Sena:

- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?



### **Kutambula Abwiinguzi**

5

tuvwalu-  
vwalu

- Mubalumbwe boonse kukuboola ku kabunga.
- Mutalike amupailo mufwaafwi, utakatazyi.
- Mubuzye kabunga na kakacita ‘Cakucita iino mvwiki’ alimwi a milimo ya ‘Bukamboni’ kuzwa ku mvwiki yakainda.
- Mutambe bantu baambe cili coonse ncobakaiya na kuzyiba kuzwa ku ncito eenzyi.



### **Muzeezo**

Muzeezo wa cibeela eeci iino mvwiki ngwa kuzyiba kuti mucelo wa Muuya Uusalala taujisi buyo mpindu kuli ndiswe tolikke. Munzila njoona Jesu wakaabanya buumi bwakwe abube bwakwe kuli ndiswe, nkaako andiswe tulaabanya buumi abube bwakwe kuli bamwi batuzungulukide.



### **Cipeto Camumutwe**

5

tuvwalu-  
vwalu

Mubalisye ku kabunga zyipeto zya mumutwe a bwiiminizi bwa mu Bbaibbele. Muzyibale alimwi mutubeela tusyoonto, mubone kuti kabunga kakonzya kubala kwa kutobelezya. Buce buce amubale muzyibeela ziyilamfwu eelyo kabunga kakatobelezya kusikila boonse bakonzye kucaamba cibalo. Mukulwaizye bantu basole kuciindulula lwabo beni.

*Jehova akulongezye akukubamba.*

*Jehova akumunikile abusyu bwakwe akukufwida luzyalo.*

*Jehova akubusizye busyu bwakwe akukupa luumuno.*

*Myeelwe 6:24-26*



## **Caano**

Mubale caano citobela eeci ku kabunga:

Mu 2005 Anthony Walker, sicikolo musongo wa myaka 18 kuzwa Merseyside ku UK, akabunga ka bakubusyi munkondo ijatikizya kusalaulana kwa musyobo. Buce buce bobilo bakali munkondo eeyi bakaangwa akubetekwa ku mulandu wa bujayi. Mukwasyi wakwe wakali munkuta kuti umvwe makni ankondo, akumvwa bumboni boonse bakapedwe. Ku mamano abubetesi baalumi bobile bakazulwa ku mulandu wa bujayi akutumwa muntolongo.

Mukutobelezya bubetesi bina Anthony, Gee Walker, ba Kristu bazuunyene, bakabuziyigwa mbuli mbobakali yeeya abajayi ba mwanaabo. Bakati, ‘Ndeelede kubalekelela. Ndicibalekelela. Mukwasyi wangu andime tuciiimvwi abusyomi bwesu: lulekelelo.’

Mukubuziyigwa kumwi mucizyi wa Anthony wakati, ‘...tweelede kulekelela, mbotwakayiisigwa, mbolyaamba lbaibbele, mbotweelede kucita. Ncintu cakucita buzuba abuzuba. Nciyumu, pesi weelede kucicita. Cubyaubya nyemo abukali kuti kokonzya kubuka mafwumo fwumo akuyeeya “lekelela, lekelela, lekelela.”

Mukwasyi wa Anthony wakabikka wazwa kubikka mali ambali akugwasyilizya baalumi basiya baku Merseyside kuti bakaiye mulawo mbuli Anthony mbwakali kukanza.<sup>5</sup>

---

<sup>5</sup> Evangelical Alliance (2005). *Mrs Walker has drawn on her Christian faith to find forgiveness for the two young men who murdered her son Anthony* [MUKASABWI] Lilajanwa: [www.eauk.org/current-affairs/news/](http://www.eauk.org/current-affairs/news/)



5

tuvwalu-  
vwalu

## Mubandi

Mucaano ca sunu twabala mukwasyi wandeene, ooyo walo nokuba kuti wakanjila mukusinyikilwa kunyandya kapati wakakonzya kutondezya lulekelelo alubomba kuli basikubalubiziyila.

Mubuzye bantu nakulimvwa kwabo kuli buti ku caano eeci mpoona mwiite bantu bape mizeezo yabo.

Muzumizye ciindi cisyoonto kutegwa bantu bape mizeezo yabo mpoona muswiilizye kabotu kabotu ku bwiinguzi oobo uumwi mwaamba kuti uyanda kucita lulekelelo mbweena mbuli mukwasyi uuna Walker. Kuti uumwi aambe boobu, mubone kuti aaka kaambo mwakakananisa.



## Luzyibo lwamu Bbaibbele

Mubale Ba-Filipi 2:1-11 ku kabunga:

*<sup>1</sup>Lino na mulijene lugwasyo muli-Kristo, na muli aluyando lwakutontozya moyo, na mulipedwe caabulo ca-Muuya, alimwi na muli amyoyo yabuuya alweetelelo, <sup>2</sup>ndakumbila kuti mundipe olu lukondo luzulide lwakuziba kuti mulikede abuyanzane bomwe, akuyandana aluyandisyo lomwe, camoyo omwe acakuyeeya comwe. <sup>3</sup>Mutaciti cintu niciba comwe cabbivwe nanka cakulisumpula, pele umwi aumwi akati kanu alibombye mumoyo, akuyeeya kuti mweenzuma mubotu kwiinda ndime, <sup>4</sup>Tamweelede kuyeeya kuligwasya nubeni luzutu, pe, umwi aumwi uleelede kwiingasila kugwasya mweenzinyina.*

*<sup>5</sup>Amube amoyo oyo nguwenya iwakali muli-Kristo Jesu, <sup>6</sup>Walo wakali aciimo ca-Leza, nekubaboobo teewakayeeya kuti ncivuumuko kweelana a-Leza, pe. <sup>7</sup>Wakalilonzya, wakalisalila ciimo cabuzike akuba mbubonya mbuli bantu balya maila. <sup>8</sup>Lino naakabonwa kuti waba acikozyano camuntu, wakalibombya akuzumina nikuba kufwa, nkukuti kufwa kwakubambulwa aciingano. <sup>9</sup>Nciceeco Leza ncaakamusumpula akumupa izina ibotu kwiinda mazina oonse, <sup>10</sup>kuti boonse bafugame mazwi cakulemeka izina lya-Jesu, nibaba baansi nibaba bakujulu nibaba bali kungsi anyika, <sup>11</sup>alimwi kuti indimi zyoonse zizumine kuti Jesu Kristo ngu-Mwami cakulemeka Leza Taateesu.*



Muntu oonse uyanda kukondwa. Kukondwa na kulelekwa munzila ya buntususu. Buzuba abuzuba tulombozya kukondwa akujana kukkutila. Nokuba boobo, bbala lya kulelekwa lyaamba kupati kwiinda buyo kukondwa, nkaambo kukondwa nkulimvwa buyo kwalo kusimininide ali ceeco cicitikila azyintu zyaanze. Kulelekwa caamba kuba kabotu alimwi alukondo luzwide kuli baabo bapa lufwutuko lwa mubwami bwa Leza.

Zyaano zya mulumbe wa Jesu alimwi acibalo cesu ca sunu zytondezya Jesu kuba cileleko caandeene ku bantu bamwi. Muzeezo wakwe wa kuboola cakali kulangilwa kuba cileleko. Sunu Jesu sikubuka ulombozya kumuleleka. Nokuba boobo, mutabi nomugambwa kuti kulelekwa mubusyu bwa Jesu taakwe nokulangika mbuli mbotuyeeya.



### **Mubandi**

Mutubunga twa bantu 3 na 4mulange Matayo 5:3-12, cibalo cizyibidwe kapati kuti 'Bukkomani.' Omwe abalisye cibalo kwa zyiindi zyili mbozyibede kutegwa boonse bacimvwe. Mwaambile

kabunga kabandike mibuzyo iccilila:

- Mubandike mukabunga kenu mbomukonzya kuzyiba kuti uumwi uli lelekedwe (e.g. kubaa nseba mbotu, lwiiyo, mukwasyi, ncito, nkomo ikkalikide etc.)
- Musyobo wa bantu nzi eeci cibalo ngociti ulilelekedwe?
- Ino kuzyiba kwa Jesu kwa kulelekwa kuusola buti muzeezo wesu wa lyoonse?
- Ino eeci cimupa kulimvwa buti?

Muzumizye kusikila ku tuvwalu vwalu tuli 10 mbantu bakanane mpoona mubajosye mutubunga eelyo mupe ciindi ku kabunga akamwi kape cintu comwe na zyobile zyobakanana.



Mu Ba-Filipi 2:1-11 Paulu ulainduluzya kuti bube bwesu bweelede kuba mbuli bwa Kristu bwalo bwakali kutaanguna kuyeeyela bamwi. Kuti natwacikonzya buyo kusaanguna kulanganya akuleleka bamwi notuyookonzya buyo kulelekwa aswebo.

Mvwiki yakainda twakalnganya micelo ya Muuya Uusalala. Inga twaleleka bantu kwiinda mukuba babombe kuli mbabo, nokuba kuti cilakatalisya alimwi nciyumu. Inga twaleleka bantu kwiinda muka aa luse kuli mbabo eelyo bamwi nobatakwe. Inga twaleleka bantu kwiinda mukubaletela lukondo eelyo nobauside akulendelelwa. Ambweni buyo eeci cilelekelo twakacimvwa kale eelyo bamwi nobakatuyanda, nobakatufwida luse, akuba andiswe eelyo zyintu nozyakali ziyiyumu?

Eelyo notumvwa cimwi cintu cili mbuli mulimo wa bwaabi bupati kapati inga twaba amunyono na kunyotokelwa uumwi muntu walo watambula cipego. Nokuba boobo, notwabona muuya wa bwaabi muli uumwitweelede kulombozya kuti ooyo muuya ube muli ndiswe. Ooyo ngo mucelo walo Muuya Uusalala ngoukonzya

kukomezya muli ndiswe eelyo buumi bwesu bupya nobukomena muli nguwe.

Tujisi zyileleko zyiindene mumaumi eesu. Tulakonzya kuba aluyando lwa balongwe amukwasyi, inga katujisi munzi, cakulya ameenda azyakusama. Kwiinda muli Jesu tuli jisi zyileleko zya kulekelela, luumuno, buumi bupya, buumi butamani, muzeezo akasimpe kakuti tubamba lwiindano. Tuli lelekedwe. Tatweelede kunyonyoona zyileleko zytujisi kwiinda mukuzyiyobola kuli lwesu tobamuka beni, pele tweelede kwabila bamwi.

Kuba mbuli Leza cili mu moyo wa mulumbe wa Jesu. Utwaambila kuti tube ‘basiluse’ mbuli Leza mbwabede (Luka 6:36) alimwi buya akubala katongo mbuli Leza (Matayo 5:48). Mulimo wa Muuya uusalala muli ndiswe kutubamba kuti tube mbuli Leza. Ulakomezya mucelo muli ndiswe.

Nzila iimwe njotukomenena mo nkubona micelo kuti ibeleke kwiinda mukuba zyileleko muli bamwi. Jesu wakali kubelesya micito ciindi coonse. Muuya Uusalala uyakututondezya bwakutondezya luyando mumicito kuli bamwi. Nkabela alimwi tweelede kuyeeya kupaila kutegwa abamwi balelekwe a Jesu. Cipeto cesu ca mumutwe mupailo ooyo Leza ngwakaambila Mozesi kuti apaile mbuli cileleko ku bana Izilayeli. Aswebo tulakonzya kuleta cileleko kuzwa kuli Leza mbumbotupailila bamwi mupailo ooyu. Mpoona inga twabeleka kubona kuti ino mupailo wesu inga twaubikka buti mumicito; zybilo zyelede kweendela antoomwe.



### **Cakucita**

Mutubunga twenu twa bantu 3 na 4, mupaille kuti Muuya Uusalala ulete muntu omwe mumizeezo yenu ooyo walo ukatazyigwa na upengede alimwi uuyanda cileleko ca Jesu mubuumi bwakwe.

Mwambilane ayoooy muntu Muuya Uusalala ngoutilete ku mizeezo yenu. Mucenjele kuti taakwe nomwaambaula zyintu zya maseseke; ambweni inga mwakonzya buyo kwaabilana zyintu zyabamwi zyili mbuli zyina na zyibajatikizya zisyooonto zyili mbuli mapenzi ngobabona. Eeco cili kabotu. Ciyandisi kapati nkuyeeya kuti ino nguni ooyo walo ngomuzyi upatide.



5

tuvwalu-  
vwalu

### **Mupailo**

Mutubunga twenu mwinduluzye cipeto ca mumutwe kamwaamba mazyina aa muntu uuli oonse ooyo ngomwali kuyeeya. Mukucita boobu mulomba Jesu kuti amuleleke ooyo muntu.

Mukonzanyano, inga mwapaila:

Mwami aleleke Rute akumubamba;

Mwami amunike busyu bwakwe ali Rute akumufwida luse;

Mwami abikke busyu bwakwe kuli Rute mpoona amupe luumuno.

Mupaile ooyu mupailo kuli umwi aumwi ngomwayeeya mukabunga kenu.



### **Cakucita iino mvwiki**

Mvwiki amvwiki kuli mulimo ngo tweelede kucitila ku maanda. Muyeeye kuti swebo, mbuli Jesu, tweelede kuba zyileleko kuli bamwi. Mulakonzya kuba bwiinguzi ku mupailo alimwi akuba cileleko kuli bamwi mbomwakapailila. Umwi aumwi wenu ayeeye nzila njakonzya kuleleka muntu ngwa kapailila. Njeeyi mizeezo misyoonto:

- Mutondezye luyando ku muntu uulendeleledwe kwiinda mukumuswaya akuba aciindi anguwe.
- Kutondezya luse kwiinda mukutamba uumwi kuzya kulya cakulya ku ng'anda yenu.

- Mutondezye lumuno kwiinda mukugwasya uumwi kukukulusya cilogwe cifwide.

Mwaambile bantu bamwi mutubunga twenu tujisi zyakucita eeco ncomuyanda kuti bacite kutegwa mukulwaizyanye mukati kamwiki. Mpoona mupaile antoomwe kupailila coolwe cakucita eeco ncomwasala.



### **Kamboni**

Nomutana cicita eeco ncomwasala kucita, mulombe Leza amutondezye amupe coolwe amajwi akubelesya mukupandulula ku muntu ngomwayeeya akupailila mbuli Jesu mbwamulelekedede alimwi ancomuyandila kuti aleleke bamwi.

Eelyo nomuli aabo, mulangaule coolwe Leza ncati mupe mpoona mujane ciindi cakupandulula kuti Jesu wakabaleta ku moyo wenu akuti ono muyanda kwaabanya cileleko eeco Jesu ncaamupa ambabo.

# Bulembo

7

# Bulwazi Bujaya

– Cinyonyoono



'Nkaambo boonse  
babisya akulela  
kubulemu bwa-Leza.'

Ba-Roma 3:23



## Kulibambila

Ncomuyandika mu cibeela eeci:

- Kabeela kasyoonto kakapepa ku muntu oonse mukabunga.
- Mulilo musyoonto anze mubusena butakwe ntenda amaanzi akuuzimya mwamanizya.

Sena:

- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?



## Kutambula Abwiinguzi

- Mubalumbe boonse kukuboola ku kabunga.
- Mutalike amupailo mufwaafwi, utakatazi.
- Mubuzye kabunga na kakacita ‘Cakucita iino mvwiki’ alimwi a milimo ya ‘Bukamboni’ kuzwa ku mvwiki yakainda.
- Mutambe bantu baambe cili coonse ncobakaiya na kuzyiba kuzwa ku ncito eenzyi.

5

tuvwalu-  
vwalu



## Muzeezo

Muzeezo wa cibeela eeci iino mvwiki ngwa kuzyiba kuti kufwumbwa eeco cibikka kulombozya kwesu atala amuzeezo wa Leza citegwa ‘ncinyonyoono’ mu Bbaibbele. Mbweena buyo mbuli cifwanikiso ca Leza cini cini mbocakanyonyoonwa muli ndiswe ‘acinyonyoono’, mboobo abwalo buumi bwesu bupya mbobunga bwanyonyoonwa acinyonyoono. Pele kuli kuponezyegwa – kulyaambilila, kuleka kubisya (kucinca mizeezo yesu) akutambula kulekelelwa.



## Cipeto Camumutwe

Mubalisye cipeto ca mumutwe abumboni bwa mu Bbaibbele ku kabunga. Mubale alimwi kutegwa kabunga kakonzye kwiinduluzya mbomubala mane muntu oonse akonzye kucaamba cipeto. Mukulwaizye bamwi bantu kuti basoleke kuciinduluka muli lwabo

5

tuvwalu-  
vwalu

beni.

*Nkaambo boonse babisya akulela kubulemu bwa-Leza.*

*Ba-Roma 3:23*



### **Caano**

Mubale caano citobela eeci ku kabunga:

Kwakali baalumi bobile mudolopo, omwe kali muvwubi omwe kali mucete. Muvwubi wakali jisi mbelele ang'ombe zyinji. Mucete wakajisi buyo kabelele komwe. Wakali kuyandisya, wakali kukabikkila maano akukasanina. Kakali mbuli mwanaakwe musimbi. Mweenzu wakasika ku muvwubi eelyo muvwubi wakayanda kumubambila cakulya. Wakali jisi mbelele ang'ombe zyakwe mwini zyinji. Wakali kukonzya buya kujaya yomwe kutegwa asinine mweenzu. Pesi takacita oobo. Nokuba boobo, wakabweza kabelele ka mucete, wakajaya akubamba cakulya ca mweenzu.

Mwaalumi wakamvwa caano eeci wakanyema. Wakati, 'Ooyo mwaalumi wakacita ceeci weelede kufwa!' Wakayungizya, 'Weelede kubbadela zyiindi zyone atala akabelele, nkaambo wakacita camusyobo ooyu katakwe aluzyalo.'

Wakali mushinshimi, Nataniele wakaambila davida caano eeci. Nkocili mu Bbaibbele ([2 Samuele 12:1-6](#)). Pele Nataniele wakayungizya, 'Ndonduwe ooyo mwaalumi.'

Leza wakasala Davida kuti abe mwami wa bana Izilayeli. Wakali cenjede, kali musongo alimwi kwiindilizya ali zyoonse kayandwa aa Leza. Pesi awalo wakabamba ndibizyo mpati. Davida taakwe nakabba kabelele. Wakabba mukaintu waumwi, nokuba kuti wakali jisi bamakintu bakwe. Wakakwelelezyegwa kuli Batisheba.

Wakamubona eelyo nakali kusamba. Mulumi wakwe Uriah wakali sikalumamba. Wakali ku nkondo mukulwani ankamu ya Davida. Nakamana kumuziyiba ooyu mukaintu ukwelelezya, Davida wakaswaangana anguwe. Mpoona wakazyiba kuti ujisi da lyakwe. Wakabamba makani aakuti Uriah anze ku maanda kuzwa ku nkondo ayeeeye kuti mwana nguwakwe. Alimwi wakakonzya kumutamba Uriah kuti balide aamwi akumunywisya bukoko. Pele Uriah wakali sikalumamba uuzwide bulemu utakonzyi koono amukaintu wakwe. Eelyo muzeezo wa Davida nowatakazwidilila, wakapanya mweendelezi wa nkamu ya basikalumamba kuti Uriah abikkwe kumbela aa nkondo kutegwa ajaigwe.

Uliya wakajaigwa munkondo mpoona Davida wakabweza Batisheba kuti abe mukaintu wakwe. Leza takakondwa ku micito ya Davida eelyo mwana wakamitidwe wakafwa kacili mucece. Nokwakainda kuswaya kwa Natani, Davida wakaibaluba ncakacita eelyo wakausa.



### **Luzyibo lwamu Bbaibbele**

Mubale Intembauzyo 51:1-12 ku kabunga:

*<sup>1</sup>Kondeetelela, O Leza, mbubonya mbuli luzyalo lwako,  
Muluse lwako lupati ziminganya milandu yangu,*

*<sup>2</sup>Undisanzisy kumilandu yangu,  
Akundisalazya kuzibi zyangu.*

*<sup>3</sup>Nkaambo ndaziba milandu yangu,  
Azibi zyangu zili kumeso aangu lyoonse.*

*Nduwe olike ngundabisizya,  
Ndacita zibi kumeso aako,*

*Aboobo uliluleme mumajwi ngoamba,*

*<sup>4</sup>Uliluzi mukubeteka kwako,*

*<sup>5</sup>Ncobeni ndakazyalwa mumilandu,  
Amuzibi bama mobakandiminta.*

<sup>6</sup>*Ulayanda busyomeki bwamukati;  
Kondizibya busongo mumoyo wangu uusidwe.*  
<sup>7</sup>*Undisalazyе amusamu wahisopo, kuti nsalale;  
Undisanzye, nkatube buu kwiinda nyengenge.*  
<sup>8</sup>*Undizuzye lukondo alusekelelo,  
Kuti zifuwa nzowapwaya zikondwe.*  
<sup>9</sup>*Sisa busyu bwako kuzibi zyangu;  
Ziminganya milandu yangu yoonse,*  
<sup>10</sup>*Undipe moyo uusalala, O Leza;  
Ulengulule muuya uululeme mukati kangu.*  
<sup>11</sup>*Utandisowi kuzwa kubusyu bwako;  
Utandinyanzyi Muuya wako Uusalala.*  
<sup>12</sup>*Undiboozezye lukondo lwalufutuko lwako,  
Akundipa moyo wabusungu wakundiyumya.*



Ntembauzyo mupailo wa Mwami Davida nakamana kumvwa caano. Oomu mwaamba kuti wakali uside ku cinyonyoona cakwe. Ulatugwasya kuzyiba kuti ino cinyonyoona ninzi alimwi ambocili mbuli bulwazi.

### **Ino bulwazi ninzi**

Inga kacitali cubauba kuzyiba muzeezo wa cinyonyoona aboobo Mwami Davida ulabelesya mabala manji kupandulula bube bwa cinyonyoona. Tuya kulanga bbala abbala eeli ncolyaamba mbuli mbwatugwasya kuzyiba cinyonyoona, cakutaanguna ali zyoonse, nkubikka kulombozya kwesu azyotuyandisya kunze azya Leza.

### Ndubizyo (cisyoonto ca 1 & 3)

Davida wakatyola milawo ya Leza iccililene eelyo nakabona muka Uriah akumubweza kuti abe wakwe. Leza wakapa milawo eeyi ku bantu bakwe kutegwa abatondezya mbobanga bakkala buumi bubotu akumukkomanisya (kutegwa muzyibisisye amubale Kulonga

20:1-17). Maccililane a Davida akatyola bunji bwa milawo eeyi. Kubona akulombozwa Batisheba eeci cakamuletela kuti ayande kumubamba wakwe, koonu anguwe, kubamba mayale akuti mulumi aakwe apiluke kutegwa asowezezyegwe mwana eelyo mukumaniniza kukanza kuti mulumi aakwe ajaigwe. Notwatyola mulawo wa Leza, tucita cinyonyoono. Oobu mbobupanduluzi bwa ndubizyo. Notwatyola milawo yakatupa Leza inga nkumukaka anzila zyakwe. Caano ca Davida citutondezwa cinyonyoono comwe cilafwambaana kututola kuli cimbi, mbuli bulwazi buyambukila, bwajata cakumaninina.

#### Cibi (cisyoono ca 2 & 9)

Cibi caamba kwaalilwa kuponena munzila ya Leza. Cipeto cesu camumutwe cilakanana ali kaaka kaambo nociti toonse 'twalela.' Cili buyo mbuli muvwimi ujisi buta akasako na ntobolo njaadubula, pesi wainzwa ncaapimide. Nokuba kuti muvwimi waciinzwa asyoono buti tacikwe makani; wainzwa kale. Eeyi njiimwi nzila ya kuzyiba cinyonyoono: nkwiinzwa mukupima eelyo cilatubikka mucilijazyo cipati. Eeco cilijazyo nkwananyizyigwaa aa Leza.

Aabona tulalanga bantu bali muni muni lyesu mpoona kuyeeya kuti tuli kabotu kubainda. Ambweni tatuna bbide, kujaya na kucita mamabbe. Ambweni kunyemya baabo batuzungulukide akupona buyo maumi mabotu. Nokuba boobo Bbaibbele talikwe mbaakani ya buumi bubotu butweelede, naanka bwiinda kutweelela, mbotunga twajana kwiinda munguzu zyesu. Tatweelede kuliindanya aumwi pele buyo a Leza, eelyo ulisetekene kapati cakuti inga taakwe notunga twaba mbuli nguwe, ccita kuti watugwasya, eelyo eeco ncencico ncacita notukomena mumaumi mapya.

#### **Bwakubusilika bulwazi**

Mu Ntembauzyo eeyi Davida alimwi utugwasya kuzyiba nzila zyimwi

oomo Leza mwakonzya kutugwasya kuzunda cinyonyoona akukomena kuba mbuli nguwe.

#### Luzyalo (cisyoono ca 1)

Nakamana kutondezyegwa cinyonyoona cakwe, Davida taakwe nakasola kuzumanana kucisisa. Wakalomba luzyalo. Kulomba luzyalo nkuzumina cinyonyoona cesu. Notwazyiba kuti twalubizya tulalyaambilila kwiinda mukucikanana, kwaamba kuti twausa akulomba kulekelelwa kuzwa kuli ooyo ngotwalubizyila. Davida wakalyaambilila kuli Lezankaambo wakazyiba kuti cinyonyoona cakwe ticakali buyo ali Uriah pele akuli Leza. Tweelede kubona kuti cinyonyoona cili kuli Leza mpoona twalomba luzyalo nkaambo tuyandisya kucinca.

Aabona mwana walubizya ulaambilwa ku muziyali na mwiiyi kuti alilekelele eelyo ulasyupikwa akwaamba, 'Mundijatile', pele mubwini taakwe nalilekelela. Ulakonzya kuti, 'Mundijatile' mukusola buyo kutija cisubulo. Eelyo notwati, 'Mundijatile' akulomba luzyalo lwa Leza tukaka cisubulo citweelede. Tatweelede kugolela aawo pe; tweelede kusoleka mukasimpe kuyandaula kucinca micito yesu akubikka Leza amuzeezo wakwe kumbele aa yesu.

#### Kucapa (cisyoono ca 2 & 7)

Izisani nozyabija tulazyicapa. Davida wakazyiba kuti cinyonyoona cakwe cakamubisya eelyo nzila buyo njakali kukonzya kusala alimwi nkucapwa aa Leza. Eeci cili konzyenye andiswe. Toonse 'twakabisiyigwa' a cinyonyoona eelyo tuyandika kucapwa aa Leza kutegwa tusalale alimwi. Jesu wakazwida ambele akusanzya mauulu abasiciiya bakwe akabijide ooku mukutondezya buuya.

Wakatondezya basiciiya kuti nokuba kuti bakali sambide kale alimwi

bakali botede (mbuli mbotubede eelyo notutambula buumi bupya) bakeelede kusanzya mauulu aabo nkaambo akali kuzumanana kubija. Eeci citondezya eelyo notwatambula buumi bupya tulasalala akwaanguluka kuzwa ku cinyonyoono, pesi muciiindi ncoona kutegwa tucaale katusalala kuli zyizo zyesu zyelela kuzumanana kucapwa (amubone Johane 13:1-11).

Kumwaya (cisyoono ca 9)

limwi nzila yakuzyiba mbotunga twasalala ncifwanikiso cakumwaya. Ino kuti buya zyoonse zinyonyoono ziomwakacita zyaide kulembwe apepa lyomwe. Mpoona zyamwaigwa, na zyazwisyigwa. Ncecicitika eelyo notwalilekelela kuli Leza. Zylazimwa eelyo tazyiciko pe.

Eeci ncecicitika ciindi cakusaanguna notwalilekelela kuli Leza akutambula cipego ca buumi bupya, eelyo twaba bana Kristu. Pele mbuli mbotwaamba kale, bana Kristu balazumanana kubisya akutolelela kuzya kuli Leza kulomba luzyalo alulekelelo lwakwe.



### **Mubandi**

Mutubunga twa bantu 3 na 4, mukanane mibuzyo itobela:

- Mulimvwa buti ku kaambo kakuti Leza waamba kuti boonse buyo tuli babisi eelyo twawa akulela? Sena eeci ciboneka kuba kabotu na cililuzi kuli ndinywe? Ino kayi na nkaambo nzi?
- Inga mwaamba buti ku muntu ucita cimwi ncomuzi kuti Bbaibbele liti ncinyonyoono, uvwiila kuti ceelede kuba kabotu nkaambo bakacipailila alimwi bakalimvwa kuliiba mukucicita?
- Eelyo nomwakwelezyegwa kucita zyimwi zyintu mubuumi bwenu ziomuzi kuti zyizwide cinyonyoono, inga mwakuzunda buti kusunkwa?



## Cakucita

15  
tuvwalu-  
vwalu

Muyakuyanda mapepa, cilembyo alimwi akukonzya kujana mulilo/nkandela yakubelesya. Mweeledede kucitila anze abusena bujukide eeci cakucita. Kuti kakuli bana batola lubazu, mupati weeledede kubagwasylizya kucita cakucita eeci.

Mube aciindi cakuyeeya buumi bwenu azyiindi eelyo nomwakabikka Leza kutaanguna. Mulembe mulongo longo wa zinyonyoono mubuumi bwenu.

Mukulwaizye boonse babe bobilo bobilo mpoona baambe zyintu kuzwa ku mulongo longo mumicito ya kulyaambilila zyibi. Bamwi bantu balakonzya kutayanda kwaamba zyintu zybalemba. Kuti na nkekaambo aaka, mutabasinikizyi kucita boobo. Mwaambile bantu bapaililane kulomba luzyalo Iwa Leza sunu.

Lino amutole mulongo longo wenu ku mulilo mpoona mubikke mumulilo ca kabotu kabotu. Mulangilizye mbocipya.

Zyoonse zyilembo zyamana kupya, mube aciindi ca kulumbaizya Leza akumulumba kuti wabweza zinyonyoono akuusa kwenu koonse. Mupaile akumulumba kuti acincanye cinyonyoono cenu alwakwe mubunji mumaumi eenu.

Mutalubi kuuzima mulilo mwamanizya cakucita eeci.



## Mupailo

10  
tuvwalu-  
vwalu

Mubuzye kabunga na inga kukuliko naba omwe utaninga lilekelelede kuli Leza kwa ciindi cakusaanguna mpoona ono ulimvwa kucita boobo. Nakakuliko omwe mumusolwedede, kwiinda mumupailo utobela:

O Leza ndiuside kuzyinyonyoono zyinji mubuumi bwangu, pele kapati ali zyoonse kutakubikka kutaanguna ali zyoonse eelyo akaambo kakwiide kuccilila nzila yangu. Sunu ndalomba kuzwa ku nzila zyangu zyakaindi, akutaanguna kubikka nduwe, akukuccilila. Ndakomba ndizuye a Muuya wako Uusalala mpoona undisanze ndaisalale. Undigwasye ndipone buumi buli kabotu mbuli mbwekomena muli nduwe. Ameeni.

Mupandulule ku kabunga kuti tuya kuba aciindi ca kaumu umu ca mupailo wa antoomwe. Mubaambile bafwinye eelyo notupaila.

Mutalisye mupailo utasyupi eelyo notucitamba Muuya Uusalala kuti ukanane kuli umwi aumwi wesu mbotupaila.

Lino amubale Intembauzyo 51:1-12 alimwi. Kwaino mubale asyoonto asyoonto ku kabunga. Mwime ime kufwumbwa bobilo bamanizya milongo longo kutegwa muzumizye bantu bateelele ku Muuya Uusalala mpoona bapaile mummyo yabo.



### **Cakucita iino mvwiki**

Mvwiki amvwiki kuli mulimo ngo tweelede kucitila ku maanda. Nomwasunkwa kulipima aa bamwi iino mvwiki akulimvwa kuti zyinyonyoono zyabo zyilainda kulema ali zyenu, mwiinduluke cipeto ca mumutwe.

*Nkaambo boonse babisya akulela kubulemu bwa-Leza.*

*Ba-Roma 3:23*

Lino mupaille kuti Leza amugwasye mutakabi nomulipima aa bamwi pele buyo kuyandaula kuba mbuli nguwe kwiinda mukumubikka kutaanguna mubuumi bwenu.



## **Kamboni**

Aabona ncuubauba kuti 'ndijatile' kuli Leza kwiinda ku muntu ngotwalubiziyila. Sena kuli muntu ngotwakalubiziyila ngotweelede kwaambila kuti 'ndijatile' akutambula lulekelelo lwabo? Na mboobo, mulombe Leza amupe majwi aa luzi aciindi ciluzi mpoona mulipe lwenu kuya kwaamba kujatilwa kuli ooyo muntu iino mwiki.

Mupailile coolwe ca kukonzya kupandulula ncomulombela kujatilwa kuti nkaambo ka buumi bupya mbomwakatambula kuli Leza.

# Bulembo

# Ncocaamba Kulekelela

– Luse

'Amweetelele mbuli Usowanu mbweetelela. Alimwi mutabeteki, nomuti takabetekwe anywebo. Mutazuli bantu, anywebo nomuti takazulwe. Amwaangunune, anywebo nomuyooangununwa.'

Luka 6:36-37



### **Kulibambila**

Sena:

- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?
- Sena mwakalomba bantu 3 na 4 kuleta ma Bbaibbele nabalijisi?



### **Kutambula Abwiinguzi**

5

tuvwalu-  
vwalu

- Mubalumbe boonse kukuboola ku kabunga.
- Mutalike amupailo mufwaafwi, utakatazyi.
- Mubuzye kabunga na kakacita ‘Cakucita iino mvwiki’ alimwi a milimo ya ‘Bukamboni’ kuzwa ku mvwiki yakainda.
- Mutambe bantu baambe cili coonse ncobakaiya na kuzyiba kuzwa ku ncito eenzyi.



### **Muzeezo**

Muzeezo wa cibeela eeci iino mvwiki ngwa kuzyiba kuti zyinyonyoono zyesu tazyilekelelwi akaambo tuleelela pele akaambo kakuti Leza wakatucitila oobo. Akaambo kakuti twakalekelelwa, lino aswebo tulalekelela aabo batulubizyila.



### **Cipeto Camumutwe**

5

tuvwalu-  
vwalu

Mubalisye ku kabunga ziyipeto zya mumutwe a bwiiminizi bwa mu Bbaibbele. Muzyibale alimwi mutubeela tusyoonto, mubone kuti kabunga kakonzya kubala kwa kutobezezya. Buce buce amubale muzyibeela zyilamfwu eelyo kabunga kakatobezezya kusikila boonse bakonzye kucaamba cibalo. Mukulwaizye bantu basole kuciindulula lwabo beni.

*Amweetelele mbuli Uowanu mbweetelela. Alimwi mutabeteki, nomuti takabetekwe anywebo. Mutazuli bantu, anywebo nomuti takazulwe. Amwaangunune, anywebo nomuyooangununwa.*

*Luka 6:36-37*



## **Caano**

Mubale caano citobela eeci ku kabunga

Kwakali mwaalumi wakajisi bana basankwa bobilo. Musyoonto wakati kuli usyi, ‘Taata, ndiyanda ceeco cindeelede ono so.’

Aboobo usyi wakabaabanya lubono. Tukwakainda ciindi eelyo mwana musyoonto wakalonga zyoola zyakwe akuya ku cisi kule. Okuya, mukubula bulemu akuba monausi, wakamwayaula zyoonse zyakajisi. Eelyo nakaamana mali aakwe, kwakaba nzala mpati mucisi coonse eeco eelyo cakatalika kumucisa. Wakalembwa ncito kuli uumwi wa kokuya kuti kamusaninina ngulube. Wakalaa nzala cakuti wakakonzya kulya cakulya ca ngulube mumugolo mozyilida, pele taakwe wakali kukonzya kumupa nokuceya.

Eeco cakamujosya ku maano aakwe. Wakati, ‘Boonse babelesi bataata balaya zyiindi zyoatatwe mubuzuba, mpoona okuno ndaliimya ca lufwu. Ndiijoka buya kuli taata. Ndiya kuti kuli nguwe, Taata, ndakalubizya kuli Leza, ndakalubizya kumbele lyako; tandeedele kwiitwa kuti ndi mwanaako. Ndilange buyo mbuli mubelesi.’ Wakanyamuka mndyoona akuya kuli usyi.

Kacili kule-ale, usyi wakamubona. Moyo wakwe kautwide, wakalunduka, wamukumbata, akumumyonta. Mwana wakatalika mubandi wakwe: ‘Taata, ndakalubizya kuli Leza,

ndakalubizya kumbele lyako; tandeelede kwiitwa kuti ndi mwanaako alimwi.’

Pele usyi taakwe nakali kuteelela. Wakali kwiita babelesi, ‘Amubinde. Mulete zysisani zyili kabotu mumusamike. Amubikke ninga ya mukwasyi ku munwe wakwe ampato ku maulu. Mpoona mujate moombe omwe uulide kabotu maila mumuyoke. Tuyanda kulisamuna! Tuyanda kuba aciindi cibotu kapati! Mwanaangu musankwa ngooyu – ndakali mutakatide kubafwu pele ngooyu wabonwa!’ eelyo bakatalika kuba aciindi cibotu kapati.

Eeci ciindi coonse mupati wakali ku muunda. Eelyo milimo ya buzuba noyakamana wakajoka. Nakaswena ang’anda, wakamvwa nyimbo akuzyana. Wakaita uumwi mubelesi wa mung’anda, wakamubuzya cakali kutola busena. Wakamwaambila, ‘Mwanookwenu wapiluka amunzi. Bauso baita pobwe – nyama ya ng’ombe iyokedwe! – nkaambo bamujana amunzi kali muumbulu.’

Mupati wakwe wakalanga-linga ca kaumuumu anyemo eelyo wakakaka kusangana. Bausyi bakazwida anze kuti basoleke kubandika anguwe, pele taakwe nakakonzya kuteelela. Mwanaakwe mulombe wakati, ‘Amubone yongaye myaka njeekkala aano kemubelekela, taakwe alomwe nakamunyemya, pele taakwe namwakandibambila pobwe abeenzuma? Nkabela ooyu mwanaanu wakamwansaula mali eenu ku mavwuule sunu walaibonya eelyo mwamwiitila pobwe!’

Usyi wakati, ‘Mwanaangu, taakwe namvwa pe. Ulaandime ciindi coonse, eelyo coonse cangu ncicako – pele eeci nciindi

cibotu kapati, aboobo tweelede kusekelela. Ooyu munyoko wakali fwide, eelyo ulapona! Wakali sweekede, eelyo wabonwa!<sup>6</sup>

Eeci caano inga cajanwa mu Bbaibbele muli Luka 15:11-32.



### **Cakucita**

Kutegwa boonse bacimvwe caano ca mwana mutaka ausyi ulekelela tuya kucisobana caano.

15

tuvwalu-  
vwalu

Mwandaanye bantu boonse mutubunga twa bantu 4. Omwe muntu kaamba caano, kakuli bacaala botatwe babweza lubazu lwa usyi, amunyina.

Mupe tubunga tuvwalu-vwalu tuli 5 twakulibambila mpoona, omwe omwe, kabunga akamwi kasobane caano kuli bamwi.



### **Luzyibo lwamu Bbaibbele**

Eeci ncaano cizyibidwe kapati kuzwa mu Bbaibbele. Mwana mulombe wakaunka, wakanyonyoona zyoonse zyakamupede usyi mpoona, eelyo nakabula cilawo akucetaala, wakajokela kuli usyi. Wakalizyi kuti wakali mutukene usyi akunyonyoona coolwe cakwe, pele wakayeeya kuti usyi inga kaya kubaa luse akumuzumizya kuba muzike. Aabona eeci caano ciitwa kuti ncaano ca Mwana Mutaka; nokuba boobo bamwi baciita kuti ncaano Taata Ulekelela, mbokunga ngoujisi mulimo mupati mucaano. Micito ya usyi itutondezya luzyalo alulekelelo ncozyaamba. Tuya kuuyeeya mukwasyi ooyu akuzyiba ncoutuyiisya.

---

<sup>6</sup> Mangwalo azwa ku Mulumbe. Mangwalo azwa ku Mulumbe. Nguzu zya bulembi © 1993, 1994, 1995, 1996, 2000, 2001, 2002. Lyabelesyegwa anguzu zya ba NavPress Publishing Group.

### **Mwana mulombe musyoonto wakelede kulanganyizyigwa cabukali**

Mwana mulombe musyoonto takalilemeka. Kusaanguna, walomba kukona usyi kacipona. Cilikonzyenye akwaamba kuti, 'Ndiyanda mali aangu, ndalombozya kuti nolifwide'. Cabili, waunka wakoononga lubono lwa usyi ali bamakaintu, kunywa akusekelela. Limwi mali amana. Bumwi buzuba waimvwa cibyaabyi nzala eelyo wasoleka kulya cakulya ca ngulube. Ku muntu mu Juuda eeci ticakali kutambulika nkaambo ngulube munyama utasalali, pele wakali patide akukkala anzala. Taakwe kudonaika kuti mwana wakali mutikilide usyi amukwasyi akumwansaula mali oonse ngakapedwe. Wakelede kupegwa cisubulo; bamwi inga bati micito yakwe tiyakali kulekelekeka.

### **Bwiinguzi bwa usyi bututondezya luzyalo ncolwaamba**

Usyi, nokuba boobo, ututondezya luzyalo alulekelelo ncozyaamba. Nokuba kuti mwana weelede cisubulo, nokuba kuti usyi watukilwa, kuyandisisya kwakwe takuli akupa cisubulo cakusinyikilwa andubizyo. Kuyandisisya kwakwe kuli abukkale bwa mwanaakwe. Usyi walunduka kuya kukumbata mwanaakwe ngwaabona kule-ale. Mucilawo cakumulangwanya kwendelanya amicito yakwe, wamutambula akumujosya mucilawo cakwe mumukwasyi. Usyi taibikkila maanu 'nkongole' akaambo kakuyanda mwanaakwe.

### **Leza uli mbuli Uysi, swebo tuli mbuli bana balombe**

Muzeezo wa caano ngwa kuti Leza uli mbuli usyi. Swebo abamwi bantu inga twaba mbuli bana balombe.

Tuli mbuli mwana mulombe musyoonto eelyo notwamukaka Leza, kumuzangila anzala zyakwe. Bunji bwa zyiindi twakaononga eeco ncakatupede mpoona tulalinjizya mumbaakani itali kabotu. Pesi, Leza utatulekelela kakutakwe muulo akututambula eelyo notwajoka

kuli nguwe. Oobu mbolubede luyando lwa Leza. Luzwide luzyalo. Luzyalo nkucikonzya kulekelela uumwi, kupilusya uumwi eelyo nateelede. Usyi takawaya waya kulekelela; taakwe nakali kuyanda kuzulwa. Wakalundukila kuya kuswaanganya mwanaakwe. Eeci ncifwanikiso ca Leza cijisi luyando.

Tulakonzya kuba mbuli mwana mulombe mupati aabona. Kanji kanji tulaluba kuti twakalekelelwa eelyo cilongwe cesu a Leza tulaciyambaalila. Mbuli munyina mupati tufwida bamwi munyono, kubona luzyalo lwa Leza kuli mbabo mbuuti ndwa kusobanya alimwi talweelede. Pele mubwini lulekelelo lwa Leza aluzyalo zynji eelyo taziyili zyakulisalila pesi tatweelede kuba amunyono kuli bamwi bakonzya kuzyitambula na bakazyitambula kale. Cikombelo, bantu ba Leza, tabeelede kuzula nyemo kuli baabo Leza mbayanda kulekelela. Tatweelede kubapa cisubulo. Tweelede kubatondezya luzyalo eelyo akuba mbuli usyi kuleka munyina mupati.

### **Nkaambo ncotweelede kutondezyela luzyalo ku bantu?**

Usyi amunyina bakalitondezya bwandeene kukuboola kwa mwana mutaka amunzi. Usyi wakatondezya luzyalo alulekelelo, munyina mupati taakwe pe. Ncinzi cakaleta lwiindano? Nkwiiimpana kwabo mukubona zyintu. Munyina mupati inga kali wakali kucita kabotu kuli usyi, kukkala aawe akumubamba, pesi wakabona munyina kuba muntu wakalubizyide akweelela cisubulo. Usyi wakabona bwiindene akaambo kakuti wakali siluzyalo, mbuli cipeto cesu ca mumutwe mbocituyeezya. Twakabona kuti mwanaakwe wakali sweekede, wakalifwide kuli nguwe pele ono wapona. Munyina mupati wakabwene buyo cisubulo; usyi wakabona mwanaakwe kapona alimwi.

Luzyalo ndolwakapa kuti eeci cikonyeke. Lulekelelo lwa usyi nokuba kuti mwanaakwe tilwakamweelede, lwakapa kuti

mwanaakwe apone alimwi.

Eelyo Jesu nakayiisya basiciiya bakwe lulekelelo wakabasola kuti balekelele ciindi aciindi. Umwi wabo wakamubuzya kuti ino nkulekelela zyiindi zyangaye, mukusola kuzyiba kuti ambweni kuli mweelwe buyo ku lulekelelo Iwa Leza. Jesu wakaingula kuti tweelede kulekelela ciindi aciindi, kusikila ku zyiindi zyili 77, eeco calo ncakali kwaamba kuti kwiina magolelo. (Kuli zyimwi amubone Matayo 18:21-22.)

### **Inga twajana lulekelelo muli Leza**

Aumwi wesu ulipedwe buumi bupya eelyo notwatambula cipego ca Leza ca luzyalo alulekelelo. Aabo bali kule a Leza inga bajana luzyalo alulekelelo kuzwa kuli Leza. Aumwi wesu omuno mukabunga inga wamuzyiba Leza alulekelelo lwakwe mumaumi eesu. Toonse tweelede kuba mbuli mwana wakazyiba lubazu lwakwe akujokela kuli usyi. Leza ngousyi wa luzyalo eelyo uya kutulekelela.

Mbuli usyi, Leza awalo ulatwiita kuti toonse twabile cipego ca luzyalo alulekelelo kuli baabo mbotujanwa limwi. Nkobali bantu mbotuzyi kuti inga baponezyegwa alimwi kwiinda buyo muluzyalo kuzwa kuli ndiswe.



10  
tuvwalu-  
vwalu

### **Mubandi**

Mutubunga twa bantu 3 na 4 mubandike mibuzyo itobela. Mwamana kubandika, mujane ciindi cakuzyibyamba mbunga mpati eeco ncomwabandika. Nciyandisi kuti muntu oonse waiya kuli umwi.

- Sena tulakonzya kuyeeya zyiindi notwakalubiziyilwa, kweenwa na kucisigwa eelyo twakayanda kuti ooyo wakatulubiziyila apegwe cisubulo?
- Zyiindi zyangaye zytweelede kulekelela uumwi?
- Sena inga kakuli ujisi mukonzanyo wa mbocakabede

kulekelela uumwi uteelede kulekelelwa? Ino eeco cakamucinca buti walo wakalekelelwa?

- Sena usyi wakeelede kumulekelela mwanaakwe? Sena cili luzi kuti mwana mutaka taakwe napegwa cisubulo akaambo ka micito yakwe?
- Ino lulekelelo lwa usyi lwakamujosya buti mwan ku buumi alimwi? Ncinzi cakali kukonzya kucitika kuti usyi nakamupa cisubulo?
- Sena tulavwula kucita mbuli munyina mupati, kukaka baabo batali mbuli ndiswe abaabo batalilemeki? Namboobo, mbaani aabo bantu alimwi inga twacita nzi kutegwa eeci tucincince?

Mubonenesye kuti mwaba aciindi ca kwaabana aumwi.



10

tuvwalu-  
vwalu

### **Mupailo**

Mwabanye kabunga mulu bobilo bobilo. Mukulwaizye bantu boonse bajane kuliyeeya eelyo nomuya kubabuzya mibuzyo yobilo:

- Sena kuli cimwi cintu eeco ncobayanda kulombela luzyalo lwa Leza alulekelelo mumaumi aabo?
- Sena kuli umwi ngobeelede kutondezya luzyalo alulekelelo?

Mwaambile bantu bape baabanye bwiinguzi bwabo bwa mibuzyo eeyi muli bobilo bobilo mpoona bapaililane.



### **Cakucita iino mvwiki**

Mvwiki amvwiki kuli mulimo ngo tweelede kucitila ku maanda. Mukati kamvwiki, mulombe Leza amutondezye aawo mpomucaalilide mukulekelela bantu ambazu mubuumi bwenu.

Buzuba abuzuba mujane ciindi cakulombe Leza amutondezye.

Muyeeye caano ca usyi ulekelela aboobo mbomukonzya kuba mbuli nguwe. Mulombe Leza amugwasye mutalike kulekelelesya.



## **Kamboni**

Mupandulule ku kabunga kuti eelyo nomwakaka kulekelela bantu, cibaletela penzi, pesi alimwi aswebo cituletela penzi. Cilakonzya kuleta penzi kuli uumwi lya kubikkilila anyemo. Cilakonzya alimwi kuleta penzi muzyooko zyesu amabunga aalwanya bantu. Lulekelelo lwangulula bantu kuya mubuumi.

lino mvwiki kuli zyintu zyobilo zytunga twacita kuba kamboni. Kuti kakuli uumwi ngotukakaka kulekelela, tweelede kumutondezya luzyalo, tuleke kunyema mpoona tuunke tukamulekelele. Tweelede kulekelena anguwe, nokuba kuti tacimweelede. Muli ceeci tuya kupa buumi kuli nguwe. Kuti katutacikonzyi kuya kukanana ca kaanzambwene anguwe akaambo kali koonse, inga twamulekelela mummyo yesu.

Kuti nakatuzyi balongwe bobilo mbotukakide kulekelelana aabo, naaba bantu bobilo mucooko, inga twayeeya cakucita kutegwa tubalete antoomwe akubandika. Ambweni micito yesu inga kaiya kuba luzyalo akati kabo alulekelelo.

9

# Tuzulilwa kuli Leza

– Kunununwa



'Mulinguwe mumonya motujana lununuko nkaambo kabulowa bwakwe, lulekelelo lwamilandu yesu, mbubonya mbuli buvubi bwaluzyalo lwakwe, ndwaakatuvuzizya.'

Ba-Efeso 1:7-8a



### **Kulibambila**

Sena:

- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?



### **Kutambula Abwiinguzi**

5

tuvwalu-  
vwalu

- Mubalumbe boonse kukuboola ku kabunga.
- Mutalike amupailo mufwaafwi, utakatazyi.
- Mubuzye kabunga na kakacita ‘Cakucita iino mvwiki’ alimwi a milimo ya ‘Bukamboni’ kuzwa ku mvwiki yakainda.
- Mutambe bantu baambe cili coonse ncobakaiya na kuzyiba kuzwa ku ncito eenzyi.



### **Muzeezo**

Muzeezo wa cibeela eeci iino mvwiki ngwa kuzyiba kuti kwiinda mu luzyalo lwa Leza wakatuula amuulo. Cimwi ciindi twakali bazike bacinyonyoono mumaumi eesu. Ibbaiibbele libelesya cifwanikiso ca musyika wa bazike kutondezya kuti kwiinda mulufwu lwa Jesu Leza wakatwaangulula eelyo tuzulilwa kuli nguwe.



### **Cipeto Camumutwe**

5

tuvwalu-  
vwalu

Mubalisye ku kabunga zyipeto zya mumutwe a bwiiminizi bwa mu Bbaibbele. Muzyibale alimwi mutubeela tusyoonto, mubone kuti kabunga kakonzya kubala kwa kutobelezya. Buce buce amubale muzyibeela ziyilamfwu eelyo kabunga kakatobelezya kusikila boonse bakonzye kucaamba cibalo. Mukulwaizye bantu basole kuciindulula lwabo beni.

*Mulinguwe mumonya motujana lununuko nkaambo kabulowa bwakwe, lulekelelo lwamilandu yesu, mbubonya mbuli buvubi bwaluziyalo lwakwe, ndwaakatuvuzizya.*

*Ba-Efeso 1:7-8a*



5  
tuvwalu-  
vwalu

### **Cakucita**

Mutole bantu boonse anze na kukaanda kajisi busena bupati oomo mwalo boonse mobakonzya kulunduka mukusobana cisobano eeci. Kuti na kuli utakonzyi na utayandi kulunduka, inga beebelezya cisabano akoompola mukukulwaizya.

Umwi muntu abe nguujata. Mulimo wakwe ngwa kusola “akuguma” (kuguma buyo akkuko na ajanza) muntu oonse mukabunga.

Eelyo tatalika cisobano, boonse basole kumutija sikujata mpoona batabi nobalilendekezya kuti bagumwe asikujata. Kuti na sikujata abagume, beelede kukkala ansi eelyo nkokuti bazwa mucisobano. Sikujata asoleke kuguma muntu oonse kusikila limwi boonse bakkale ansi.

Nokuba boobo, muntu omwe ngu sikunununa. Sikujata takonzyi kumujata sikunununa. Kuti na kuli uumwi wagumwa asikujata eelyo ulikkede ansi inga wavwunwa asikunununa akujosyegwa mucisobano asikunununa. Sikunununa weelede kusika kuli mbabo akubaguma. Mpoona beelede kwiimikila akujokela mucisobano, baanguluka kusola kutija kuli sikujata!

Cisobano cilakonzya kutola ciindi cilamfwu eelyo mweelede kucigozya kwainda tuvwalu-vwalu 4 na 5 kuti bunji bwa bantu bagumwa kale asikujata alimwi asikunununa.



## Caano

Mubale caano citobela eeci ku kabunga:

Nicholas Kristof amukaintu wakwe Sheryl WuDunn mbasimubweza twaambo bakazunda kale mukupegwa bulumbu balo bakalembela muteende wa ku New York. Bakeenda kapati ku cooko ca ku Asia, kupa bumboni kuli ceeco ncobakabona.

Mukwiingula kuli ceeco ncobakabona Nicholas a Sheryl bakalemba bbuku likulwaizya, liitwa kuti 'Half the Sky' (Cibeela ca Julu) , eelyo lizwide twaano twalulangilo kuzwa kuli bamakaintu bakafwutuka muzyiindi zyakuyeeyela zyibyaabi. Umwi wabo basimbi ngu Srey Neth. Kajisi myaka ili 14 wakali mukaanda ka mamambe ku Poipet, Cambodia kwa mwezi omwe. Mweeninyina wakamubweza ku munzi akuya kumuulisya ku buvwuule. Busimbi bwakwe bwakayalulwa aumwi mupati pati wa basikuuma njuka wa ku Thai ooyo walo wafwa asikalileke nokwakainda ciindi. Lino wakapegwa kuli basimamambe ba mucooko amuulo uuli mujulu. Kristof wakamuula amuulo wa \$150, kutali kuti amutundulule pesi kutegwa amwngulule. Wakamujosya ku munzi amukwasyi ku lubazu lwa Cambodia eelyo kwiinda mulugwasyo lwa kabunga kagwasya ka ku America wakasoleka kumujosya mucooko.

Srey Neth wakanununwa, kuulwa kuzwa ku buzike kuli Kristof. Nokuba kuti wakanwa abulwazi bwa sikalileke, musamu wakauzumina kabotu eelyo sunu ulikwetwe amwana omwe musankwa. Eelyo Kristof nakamuswaanganya lwa mamanino, wakali kuyanda kujula kaanda kakulukilwa masusu, akukaulika zyina lya Kristof.<sup>7</sup>

---

<sup>7</sup>Kristof, Nicolas D. na WuDunn, Sheryl, (2009) *Half the Sky* New York: Alfred A. Knopf



## Luzyibo lwamu Bbaibbele

Caano ca mu Bbaibbele ncaano ca **lununuko**. Leza ulafwutula bantu bakwe ciindi aciindi. Wakanununa Izilayeli kuzwa ku buzike akumuleta munyika ya Kenani, cikono cakwe. Caano cizyibilwe kuti “Kulonga” caamba kuti kuzwa. Kunununwa mu Cizumunano ca Kaindi cakali kutondezya kumbele kukunununwa kumanizyigwa a Jesu mu Cizumunano Cipywa. Jesu ulatupa nzila yakuzwa ku maumi eesu acinyonyoono, kuya mubuumi bupya oomo mwalo motuzulilwa kuli nguwe.

Eeci cili tondezyedwe mubbuku lya Lute. Mwanakazi utegwa Nomayi wakazwa ku Betelehemu amulumi wakwe abana basankwa bobilo akaambo ka nzala, akuya ku nyika ya Mowabu. Okuya bana bakwe bakakwata bamakaintu bakokuya. Muciindi, mulumi wakwe abana bakwe bakafwa. Nomayi wakayanda kujokela ku nyika yakwe, eelyo muka mwanaakwe Lute wakayanda kuti amutobele. Lute taakwe nakayanda kuunka a Nomayi; mubwini ooyu wakali mulimo wakulimvwa kwiini kuya kukkala mucisi ca bantumbuli muka mufwu. Kumatalikilo cakali ciyumu, kukkala kakutakwe amugwasyi munyika ya bantu. Nokuba boobo Lute a Nomayi bakanununwa aluse lwa micito ya Bowazi, musazyinyina wa Nomayi, ooyo wakakwata Lute akubagwasya boonse bobilo. (Inga mwabala matalikilo aa Bowazi mu Bapaizi 25:25. Amubone Jesu mbwakazuzikizya mulimo wakwe kuli ndiswe mu Ba-Hebrayo 2:14-18.)

Mulembi Leon Morris waamba kuti kunununwa caamba kubdadelela uumwi muntu kutegwa angululwe.<sup>8</sup> Muzyiindi zya Cizuminano Cipywa bbala lya kunununa lyakali kubelesyegwa boobu:

- kulekezyegwa kwa muzike kwiinda mukubbadela.

---

<sup>8</sup> Morris, Leon, (1984) *The Atonement* Westmont: Inter-Varsity Press

- Kuula bakaili alimwi kuzwa munkondo muzyisi zya buzike.
- Kulekezyegwa kwa muntu kuzwa ku mulandu wa kujaigwa.



### Mubandi – Ino nkupaila buti?

5  
tuvwalu-  
vwalu

Mwabanye kabunga mutubunga tuniini 3. Mwaambile akamwi kabunga kalngaule cipeto citobela aawa, bacikanane kwa ciindi mpoona baambile mbunga mpati mbuli mulimo wa Jesu mboulikwelelezya ku kunununwa. (Bwiinguzi mbomuswiilizya buli mutuzekwe.)

- Kabunga 1 – Ba-Roma 6:6-7  
(Jesu ulanununa muzumini kuzwa ku buzike kuya ku cinyonyoono)
- Kabunga 2 – Ba-Kolose 2:15  
(Jesu ulatuzwisya ku buzike kuya ku nguzu zya mubyaabi)
- Kabunga 3 – Ba-Hebrayo 2:14-15  
(Ciingano ca Jesu cilatulekezya kuzya ku mulandu wa lufwu)



Amubale Ba-Efeso 1:1-14 ku kabunga:

<sup>1</sup>*Ndime Paulo, nendakasungulwa abukanze bwa-Leza kuba apostolo wa-Kristo Jesu. Ndamujuzya nobasalali bali ku-Efeso aboonse bazumini bamuli-Kristo Jesu. <sup>2</sup>Amube aluzyalo aluumuno luzwa kwa-Leza Taateesu aku-Mwami wesu Jesu Kristo.*

<sup>3</sup>*Alumbwe Leza Wisi wa-Mwami wesu Jesu Kristo, iwakatulongetya azilongezyo zyoonse zyamuuya munasena aakujulu mutukede muli-Kristo, <sup>4</sup>mbubonya mbuli mbwaakatusala mulinguwe kuzwa kumatalikilo aanyika, kuti tusalale, tutabi akampenda nikaba komwe kumeso aakwe, <sup>5</sup>Nkaambo wakatuyandisya, aboobo wakatukanzila*

*kuti tube bana bakwe mwini kujanza Iya-Jesu Kristo, nkabela ncobeni obu bukanze mbwaakalita <sup>6</sup>bwacitya kuti bulemekwe loko bulemu bwaluzyalo lwakwe ndwaakatufwida mu-Muyandwi wakwe.*

*<sup>7</sup>Mulinguwe mumonya mutujene lunununo nkaambo kabulowa bwakwe, lulekelelo lwamilandu yesu, mbubonya mbuli buvubi bwaluzyalo lwakwe, <sup>8</sup>ndwaakatuvuzizya maanu oonse amancenjela, <sup>9</sup>akutucita kuti tuzibe makani aasisidwe aabukanze bwamoyo wakwe. Lulito lwakwe ndwaakalita kalekale mulinguwe ndoolu. <sup>10</sup>Wakabamba kuti, casika buyo ciindi ceelede, mitwe yazintu zyoonse, niziba zintu zyamujulu niziba zintu zyaansi, ibikwe antoomwe muli-Kristo, <sup>11</sup>Muli-Kristo nguwenya mutupedwe lukono lwesu, mbubonya mbutwaakanzilwa mukulita kwayooyo uubamba makani oonse mbuli miyeeyo yamoyo wakwe, <sup>12</sup>kuti tube lutembauzyo lwabulemu bwakwe, iswe nitwakasaanguna kuzuminina Kristo. <sup>13</sup>Anywebo mwakaswiilila ijwi lyalusinizyo, Makani Mabotu aalufutuko lwanu, elyo nimwakazuminina nguwe mwakabikilwa citondezyo, nkukuti Muuya Uusalala ngutwakasyomezegwa kale. <sup>14</sup>Oyu Muuya nguwenya necitondezyo calukono lwesu ncitwapegwa sunu mane do kusikila kuciindi ncituzoolya lubono loonse akutembaula bulemu bwakwe.*



Kwamana zyipeto zybupanduluzi (cisyoono 1-2) Paulu utalika ntembauzyo zya zyileleko zya Leza ‘muli Kristu’ (cisyoono 3). Kuti muzumi uli ‘muli Kristu’ caamba kuti bazulilwa kuli nguwe, nkekaambo kapati mukuteelela lugwalo. Paulu ulabelesya twaambo tunji tutondezya eeco Kristu ncakatucitila:

- Kusala akutambulwa muli Kristu (cisyoono 3-6) citoleela

kusalwa a Leza akuletwa mumukwasyi wakwe.

- Kunununwa akulekelelana muli Kristu (cisyoonto 7-10) cikwelelezya kujosyegwa na kupegwa nzila a Leza.
- Cisyomyo ca lukono lwesu muli Kristu (cisyoonto 11:14) caamba kuti mbuli bana bakwe tuli jisi coolwe cakusika kuli nguwe, akuli zyoonse zyakwe.

Mucibeela eeci tulanganya kapati lununuko, ncintu calo cicitika lino, cino ciindi, pele alimwi ciyoocitika kumbele. Cisyoonto ca 7caamba kuti, 'tuli jisi lununuko kwiinda mubulowa bwakwe' eelyo cisyoonto ca 14 caamba kuti cisyomyo ca Muuya Uusalala ni, 'ncipo citupa lusyomo lwa cikono cesu kusikila limwi lukabe lununuko lwa baabo bali nimbono zya Leza.' Eeci caamba kuti mbuli bana Kristu tulazyiba lununuko lino pesi nkunji kuciboola! Tuzulilwa kuli Leza ndyoona buyo notwatambula cipego ca buumi bupya, pesi kuli cimwi cicitika oomo mwalo motweelede kuba mbuli nguwe cabwini.

Lugwalo lwa Paulu kuya ku Ba-Efeso lulibonya kuba buyo mbuli lugwalo loonse luya ku zykombelo, kubakulwaizya boonse kuti, mbuli baccilili ba Jesu, lino balengululwa muli Leza (Zyipati zya 1 -3) akubasola kuti bapone mbuli zyilengwa Leza zyipya munyika eeyi (Zyipati zya 4-6). Paulu ulatalika abupanduluzi bwa milimo ya Leza muli mbabo oomo mwatazwa akubala. Ciyandisi kuli nguwe ndibbala lya 'lununuko'.

Mucisyoonto ca 7 Paulu ulati, 'muli nguwe tuli jisi lununuko kwiinda mubulowa bwakwe'. Kuzwa kuli ceeci inga twabona kuti lununuko lujanwa muli Jesu Kristu, kutli muli uumbi. Bulowa bwa Jesu ngo muulo wa lununuko, cipo cipati cabbadelwa.

Mucisyoonto ncicona Paulu waamba kuti lununuko lwesu lujatikizya, 'lulekelelo lwa zinyonyoona'. Kwiinda mu lufwu lwa

kulyaaba kwa Jesu, zinyonyoona zyilagwisyigwa akusindulwa. Eeci, 'kweendelana abuvwubi bwa luzyalo lwa Leza,' nkokuti, luse lwakwe, lweengelelo lwakwe. Mbuli zisyoonto zya 4 a 5 mbozyaamba, oolu luzyalo luzwa ku luyando lwa Leza kutali kuti swebo twalijanina.

Mbuli mbotwaamba, cisyoonto ca 14 cilatutondezya kuti kuli lununuko buya alimwi kumbele: lukono lwesu mujulu anyika zyipya. Muuya Uusalala, wapegwa lino kuli ndiswe, nce 'cisyomyo' ca lukono oolo, akusyomezyegwa kwa kuboola kwa zymwi zinji.



10  
tuvwalu-  
vwalu

### Mubandi

Mutubunga twa bantu 3 na 4 amubandike mibuzyo iccilila:

- Ino 'lununuko' caamba nzi?
- Kutu na Leza wakamubbadelela muulo ooyo, ino eeco cimumvwisya buti?
- Mu 1 Ba-Korinto 6:19-20: Paulu ulati, 'Tamuli lwenu pe; mwakaulwa amuulo. Aboobo amulemeke Leza amibili yenu.' Ino twiingula buti ku luyando lwa Leza kuli ndiswe? Cakaambwa kuli baabo bali kunze aa Kristu: "Ooyo umujisi (Satani) tamuli bakwe, eelyo ulaandinywe (Leza) tamujisi.' Ino weenda buti kuzwa ku musinze kuya mu mumuni?



10  
tuvwalu-  
vwalu

### Mupailo

Mupaille antoomwe kutegwa Leza amugwasye musyome mulununuko lwakwe eelyo muciiindi muya kwiiya kuziyiba bwa kukkala mu mumuni wa ceeco coonse ncamucitila.

Mube aciindi a kupaila kaumu-umu kulomba Muuya Uusalala kuti umutondezye zyibeela mu buumi bwenu oomo momutasyomi lununuko lwa Leza.



### **Cakucita iino mwiki**

Mwiki amwiki kuli mulimo ngo tweelede kucitila ku maanda. Cakutamuka kufwaumbwa buyo cainda eeci cibeela mubale Ba-Roma 6:6-7 ambweni lweni nyolikke na amweenzyinyoko. Mulombe Leza kuti alete mulongwe omwe na bobilo na bamukwasyi ku mizeezo yenu aabo bali mubuzike bwa cinyonyoona. Mubapailile aabo bantu buzuba abuzuba kutegwa baangululwe muli Jesu Kristu.



### **Kamboni**

Sena mulizyi muntu walo upezyegwa ankongole na penzi lyalo ndyatakonzyi kumana lwakwe mwini? Nkaambo nzi ncomutakonzyi kujana nzila ya kumugwasyiliza kwiinda mukumupa mali na cimwi ciindi cenu kumugwasya kutondezuya luyando lwa Leza lwa lununuko mumucito.

### **Cakubala Cakulisalila**

Zyinji zyibalo zyikanana lununuko lwa Leza. Kuti kakuli ciindi na kabunga kalakonzya kulibalila ku ng'anda, zyeenzi zyimwi ziomwasalilwa zya kubala.

Azymwi zyibalo zyakubala zyeenzi:

- Bube bwa lununuko caino: Mako 10:45, Ba-Roma 3:24, 1 Ba-Korinto 1:30, Ba-Kolose 1:14, Ba-Galatiya 3:13 a 4:4-5, Ba-Hebrayo 9:12, 1Petro 1:18-19.
- Bube bwa lununuko kumbele: Ba-Efeso 4:30, Ba-Roma 8:23.

10

# Tulasalala Kumbele Lya Leza – Kululamikwa

'Lino mbuli mbutulamikwa  
kulusyomo, atube aluumuno a-Leza  
muli Jesu Kristo Mwami wesu.'

Ba-Roma 5:1



## Kulibambila

Ncomuyandika mu cibeela eeci:

- Nswiiti zisyooonto na tubeela twa micelo. Kuti kacikonzyeka, mulete komwe ku muntu oonse mukabunga.
- Mupika miyumu misyooonto na zisani azyintu zyalo zykonzya kubelesyegwa kusalazya mbuli nsipa ameenda.

Sena:

- Mubale zyibeela 5 a 9 alimwi kutegwa mugwasye bantu bayeeye zyaano azyipeto zya mumutwe?
- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?



## Kutambula Abwiinguzi

- Mubalumbwe boonse kukuboola ku kabunga.
- Mutalike amupailo mufwaafwi, utakatazyi.
- Mubuzye kabunga na kakacita ‘Cakucita iino mvwiki’ alimwi a milimo ya ‘Bukamboni’ kuzwa ku mvwiki yakainda.
- Mutambe bantu baambe cili coonse ncobakaiya na kuzyiba kuzwa ku ncito eenzyi.

5

tuvwalu-  
vwalu



## Muzeezo

Muzeezo wa cibeela eeci iino mvwiki ngwa kuzyiba kuti tulasalazyigwa kuzwa ku zinyonyoono zyesu akubikkwa kabotu a Leza (kululamikwa) kutali mumucito yesu pele kwiinda mu lusyomo muli Jesu akuli ceeco ncakatucitila aciingano. Eelyo notwazulilwa kuli Leza, ulakonzya kuzumanana kutubamba mbuli Jesu.



## Cipeto Camumutwe

Mubalisye cipeto ca mumutwe abumboni bwa mu Bbaibbele ku kabunga. Mubale alimwi mutubunga tuniini niin, mubone kuti kabunga kalaindulula kubala. Buce buce mubale ku tubunga tupati

5

tuvwalu-

vwalu pati antoomwe akabunga kakainduluzya mane boonse bakonzye kwaamba cipeto ca mumutwe coonse. Mukulwaizye bantu basole kwiinduluka muli lwabo.

*Lino mbuli mbutululamikwa kulusyomo, atube aluumuno a-  
Leza muli Jesu Kristo Mwami wesu.*

*Ba-Roma 5:1*



### **Caano**

Mubale caano citobela eeci ku kabunga:

Kwakali Mwami uumwi singuzu wakali kuyanda Leza. Wakali kukkala amunzi wa bwami mubotu. Mudolopo lya Mwami ooyo, kwakali sikulombelela simatombe wakali kukkala mumigwagwa. Bantu bamudolopo bakali kuvwula kumufwubaazya, kumwiita mazyina mabi akumuuma. Bantu tibakali kuyanda kumubona. Ooyu skilombelela wakakatala kutundululwa aboobo wakayeeya, ‘Ndilaunka nkabone Mwami, eelyo nkalombe luzyalo. Ndiya kumulomba Mwami akandizumizye kuna kulombelela mumigwagwa mpoona ambweni bantu baya kuleka kunditundulula.’

Sikulombelela wakaunka ku wami kuya kulomba luzyalo lwakuna kulombelela mumigwagwa. Wakasamide zyatombe, takakwe mabbusu, wakavwumbidwe tombe eelyo wakali kununka cibyaabi. Sikulombelela wakalizyi kuti wakali kununka cakuti Mwami takali kulangilwa kumulanga alimwi wakali kulangilwa kumucimwa.

Mwami wakali jisi mwana musankwa, walo wakali kuyanda Leza. Mwanaa Mwami, wakamubona sikulombelela watombe kaboola ku munzi wa bwami. Wakamubuzya, ‘Utyani?’

Sikulombelela wakapandulula kuti wakali kuya kubona Mwami kutegwa alombe luzyalo, lwakuti kakonzya kulomba lugwasyo mumigwagwa kakwiina akutabauzyigwa. Mwanaa Mwami wakaingula, 'Tokonzyi kulibonya kumbele lya Mwami pe!' Ulaatombe alimwi tosamide kabotu!'

Mwanaa Mwami taakwe nakamubuzya cakamupesyede kuba sikulombelela. Mwanaa Mwami wakamufwida luse. Wakautola ku munzi wa bwami, mukaanda kakwe. Wakamusanzya sikulombelela, kugusya tombe lyoonse. Wakamusanzya ku mauulu akumubamba zylonda zyakwe. Wakamugela masusu aakwe akumunanika mafwuta anunkilila. Mwana Mwami, Mwanaa Mwami wini, wakamupa cibaki cakwe kuti asame. Kumamanino aceeci, sikulomelela wakaboneka mbuli mwanaa Mwami!

Mwanaa Mwami wakamweenzya silkulombelela, lino mbuli mwanaa Mwami, kuya mung'anda ya usyi. Mwanaa Mwami wakamutondezya sikulomelela kuli usyi, Mwami. Mwanaa Mwami wakati, O Mwami wangu, taata, ooyu mweenzuma, walo uuli buyo mbuli mwanookwesu. Umufwide luzyalo.'

Lino Mwami wakamvwa cakali kucita mwanaakwe eelyo moyo awalo moyo wakwe wakazula luzyalo aluyando kuli sikulombelela.

Mwami wakati, 'Akaambo kakuti wamutondezya kuli ndime mbuli munyoko, andime ndamwiita kuti munyoko! Mupe eeco ncayanda.'

Aboobo Mwanaa Mwami wakamuyiisya sikulombelela bwakuba mwanaa Mwami eelyo wakamutambula kuti akkale mumunzi wa bwami. Sikulombelela taakwe nakajokela kuya kukkala mumigwagwa.



## Luzyibo lwamu Bbaibbele

Amubale Ba-Roma 3:22-26 ku kabunga:

*<sup>22</sup>Obu bululami bwa-Leza mbubwakusyoma Jesu Kristo, mbubwabo boonse buyo basyoma, taakwe bwaanka. <sup>23</sup>Nkaambo boonse babisya akulela kubulemu bwa-Leza, <sup>24</sup>pele balalulamikwa buyo kuluzyalo lwakwe kubununu bwamuli-Jesu Kristo, <sup>25</sup>Walo nguwe ngwaakabika Leza kuti abe mulungo, cakulusyomo lwamubulowa bwakwe. Ncitondezyo cabululami bwakwe, nkaambo kakuleka kwazibi ezyo izyakacitwa kalekale kuciindi cacambacilemu ca-Leza. <sup>26</sup>Alimwi ncicitondezyo cabululami bwakwe kuciindi casunu, citondezya kuti Leza uliluleme, alimwi ulalulamika oyo muntu uumusyoma Jesu.*



Kuli zyipaanzi zyatatwe ku cibeela eeci:

1. Kuliyezya tobeni kuti tulasumpulwa kumbele aa Leza, kwiinda buyo mulusyomo.
2. Kwiiya mbuli Jesu mbwatusalazya.
3. Kwiiya mbuli Jesu mbwazumanana kutusalazya, akutubambulula, kutubamba kuba mbuli nguwe.

### **1. Kuliyezya tobeni kuti tulasumpulwa kumbele aa Leza, kwiinda buyo mulusyomo**

Mu Cibeela 7 (Bulwazi Bujaya – Cinyonyoono) twakalanganya Intembauzyo 51 akwiiya kuti Leza ulilibambilide kutulekelela zyinyonyoono zyesu, nokuba kuti tatweelede.

Mu cibeela 9 (Tuzulilwa kuli Leza – Lununuko) twakaiya kuti Leza waukabbadela muulo wa zyinyonyoono zyesu kwiinda mulufwu abubuke bwa Jesu. Tulavwunwa akunununwa kwiinda muli nguwe.



## Cakucita

Mwaambile kabunga kaambe cipeto ca mumutwe kuzwa mu cibeela 9 (Tuzulilwa kuli Leza).

3  
tuvwalu-  
vwalu

*Muli nguwe mumonya motujana lununuko nkaambo ka bulowa bwakwe, lulekelelo lwa milandu yesu, mbubonya mbuli buvubi bwaluzyalo lwakwe, ndwaakatuvuzizya maanuo onse amancenjela.*

*Ba-Efeso 1:7-8a*



Eeci cipeto citutondeziza kuti tuli angulukide kuzwa ku muulo abulumbu bwa cinyonyoona cesu akaambo buyo ka lufwu lwa Jesu. Nkwiinda mu bulowa bwakwe notulekelelwa eelyo luse lwakwe lulavwuziyigwa kuli ndiswe; lulapegwa kakutakwe muulo, mubunji kakutakwe cipimo.

Mulimo weelede kutusalaziza kumbele aa Leza eelyo kutegwa tutambulike kuli nguwe, wakacitwa a Jesu aciingano. Jesu wakafwa ncobeni aciingano; cakali cintu ncobeni cakaindi. Taakwe cikonziza kujokolosiza mulimo wakacita Jesu buya buzuba. Aboobo cibeela cesu, na bube bwesu, ‘Muli Kristu’ tuli kabotu, nkaambo cakalengwa a Jesu, eelyo aandiswe.

Eeci ciimo cakuba muli ‘Kristu’, kubikkwa kabotu akusalaziyigwa kumbele lyakwe ncipego kuli ndiswe kuzwa kuli Leza. Ncipego ncotutakonziyi kujana buyo eelyo tacitwelede. Nkabela, Leza muluse lwakwe ulatupa cipego eeci, kutuzumiziza kuba muli ‘Kristu’. Ncotweelede buyo kucita nkucitambula. Tutambula cipego eeci kwiinda mukusyoma kuti ncakasimpe, akucitambula mummyoyo amizeezo yesu.

Cipeto ca mumutwe cesu sunu, Ba – Roma 5:1, ipandulula ciimo

cesu ‘muli Kristu.’



### **Cakucita**

Mwaambile kabunga kaindulule cipeto cea mumutwe ca sunu, Ba – Roma 5:1.



### **2. Kwiiya mbuli Jesu mbwatusalazya**

Kuba basalazyi kumbele a Jesu caamba kutambulika kuli nguwe. Nkaambo Leza ulisetekene kapati (takwe bubi) takonzyi kututambula mubube buzwide cinyonyoono. Nokuba boobo, ulatusanzya tusalale kwiinda mulufwu abubuke bwa Jesu. Kwiinda mukubikka lusyomo lwesu muli Jesu zinyonyoono zyesu zyilasalazyigwa eelyo mukutondezya ceeci, akutugwasya kucimvwa eeci, Leza watulenga kuba basalali (basumpwidwe). Ulatupa ciimo cipya, ulatusalazya.



### **Mubandi**

Mubuzye kabunga kaambe cili coonse ncokayeeya kuzwa mucaano casunu. Mubakulwaizye boonse baambe ncobayeeya.

5  
tuvwalu-  
vwalu

Inga mwabuzya mibuzyo mbuli yeeyi:

- Mbaani bantu bali mucaano?
- Ino aumwi muntu ncinzi ncakaamba na kucita?
- Ncinzi cakamugambya mucaano?

Amubale cibalo ca mu Bbaibbele (Ba – Roma 3:22 – 26) alimwi.



Mucaano cesu mwanaa Mwami wakasalazya sikulombelela akumutondezya kuli usyi, Mwami, mbuli munyina. Nokuba kuti Mwami wakalazyi kuti mwaalumi wakali sikulombelela, wakamubona buyo kusalala mbweena mbuli mwanaa Mwami.

Jesu ulatusalazya kutegwa tweelele kwiima kumbele aa Leza, mbweenya mbuli sikulombelela mbwakakonzya kwiimikila kumbele lya Mwami mucaano. Leza utubona kusalala eelyo notwatambula Jesu alimwi Leza uyanda kutugwasya kuti tukkale oobu mbweenya.

### **3. Kwiiya mbuli Jesu mbwazumanana kutusalazya, akutubambulula, kutubamba kuba mbuli nguwe**

Lino tuli ‘muli Kristu’ tulasalazyigwa akutambulika kuli Leza, kakuli tucili ndiswena to bantu bawide. Tucibisya. Mukonzyanyo, 1 Ba – Korinto 1:26 ilatucenjezya kuti tuleke kulimvwa akaambo ka ciimo cesu ‘muli Kristu’ akudyakaizya bamwi akaambo kaako. Ilatuyeezya kuti tweelede kulumba akaambo ka ceeco nca katucitila:

*Amubone, bakwesu, mbwiibede inkamu yabaite iili  
kulindinywe nubeni. Akati kanu taakwe bantu banji  
beelegwa kuti mbasongo kumeso aabantu, alimwi tabali  
banji basibwami, alimwi tabali banji bana babaami.*

*1 Ba-Korinto 1:26*

Makani mabotu nga kuti Leza kwiina natusiya tolikke kuti tupezyanye tolikke acinyonyoono cesu. Leza ujisi bubi kubeleka mumaumi eesu kutucinculula kuti tube bantu beelede ciimo ca ‘muli Kristu’. Muuya Usalala ubeleka kutusalazya akutubamba kuba mbuli Jesu.

Lino nciindi cesu ca kuti tubambe ceeco citweelede ku maumi eesu buzuba abuzuba. Eeyi nzila ya kubelekela aamwi a Leza, kutubamba bapya akutusalazya iitwa kuti nkusalazyigwa. Caamba nzila ya kutupa bululami.

Kucaala ‘muli Kristu’ caamba kubjana ciindi anguwe mumupailo akwiiya, kuteelelela kuli nguwe akumulemeka. Caamba kujana ciindi

abamwi bana Kristu, kupaililana, kubala Bbaibbele antoomwe alimwi akutondezyana luyando alulekelelo kuli umwi aumwi.



### Cakucita

Mubuzye kabunga na kuli uumwi uciyeeya caano ca mutabi wakali kusola kulizyalila mucelo kuzwa mucibeela 5 (Mucelo wa Muuya – Bube)?

- Ncinzi ncobayeeya acaano?
- Zyiiyo nzi zytwakaiya?

Muteelezya bwiinguzi bwaamba kuti mutabi taukonzyi kuzyala mucelo ulikke pele uyandika kujatilila ku cisamu. Cisamu ncecakapanga kuti uzyale mucelo.

Muyeezye kabunga kuti eeci caano citondezya cifwanikiso ca Jesu mbuli mbwatusalazya. Tatukonzyi kuli salazya tobamuka beni; tweelede kukkala mumsi mumsi a Jesu, ‘muli Kristu’ eelyo uya kucita mulimo wa kuti tusalale kwiinda mu Muuya Usalala upona muli ndiswe.

Mwaambile kabunga kaambe cipeto ca mumutwe kuzwa ku cibeela 5.

*Pele micelo ya-Muuya njeeyi:— luyandano, lukondo, luumuno, busicamba, buuya, bubotu, lusyomo, lubombo, kulyeendelela. Kulibaabo bacitaula zili boobo taakwe Mulao ubalwisya.*

*Ba-Galatiya 5:22-23*



Notwapa maumi eesu kuli Leza eelyo akuyandaula cilongwe a Jesu alimwi akutobela nzila yakwe ya maumi eesu, nkokuti tuya kuzyala micelo mibotu iiletwa a Muuya Usalala muli ndiswe. Abamwi bantu baya kwiibona micelo eeyo muli ndiswe!



10  
tuvwalu-  
vwalu

## **Cakucita**

Muyakuyanda nswiiti, mupika ya tombe na ziyisani, nsipa ameenda eezyo ziomwakaletela.

### **Cakucita 1 – Tulasalazyigwa kumbele Iya Leza (kusumpulwa)**

- Mubaambile boonse kuti mwabeetela nswiiti na kabeela ka mucelo.
- Mupandulule kuti taakwe ancobaciti kuti bajane eeci; ncipego kuzwa kuli ndinywe.
- Tacili cintu cibeelede.
- Ncipego ca samba ulye kuzwa kuli ndinywe.
- Ncobeede buyo kucita nkutambika maanza aabo, akuti ndalumba eelyo batambule bapegwa.
- Lino mubape boonse nswiiti eelyo mupandulule kuti mukonzyanyo wambuli Leza mbwatupa cipego ca kuba ‘muli Kristu’.

### **Cakucita 2 – Tuli munzila ya kubelekela aamwi a Leza mukutubamba kuba mbuli Jesu (kusalazyigwa)**

Lino mubweze mipika ya tombe na ziyisani. Mubweze nsipa ameenda eelyo mulombe bamwi basikulyaaba baboole bazyisalazye.

Kufwumbwa buyo bamana kuzyisalazya, mubabuzye kuti ino ncinzi cali kuyandika kuti zyalale.

Muyandaula bwiinguzi mbuli boobu:

- Meenda
- Nsipa
- Kucumba
- Nguzu
- Ciindi

Mupandulule kuti nokuba kuti twakapegwa cipego ca samba ulye ca Kristu, eelyo Lza utubona kusalala, uceelede kubeleka muli ndiswe kutusetekanya. Citole ciindi kutegwa swebo tube kapati mbuli Jesu.



10  
tuvwalu-  
vwalu

### **Mubandi**

Mubaambile boonse babe mutubunga 4 tusyoono. Mubone kuli kuli muntu uukonzya kubala eelyo kuli Bbaibbele mukabunga akamwi. Akamwi kabunga kalanganye zzybalo zzyitobela akwiingula mibuzyo iipedwe aawa.

- Kabunga 1: Ba – Efeso 4:22 – 32  
Eeci cibalo citutondezya ncocaamba kusalazyigwa (kusetekanyizyigwa). Ino Leza utubuzya nzi mu cibalo eeci?
- Kabunga 2: Ba – Efeso 4:11 – 16  
Ino zzyitondezyo nzi zya muna Kristu usikene? Ino Leza mbuuti mbwaleta kusikana? Mbuuti mbomwakabona kukomena mubuumi bwenu?
- Kabunga 3: 1 Ba – Korinto 15:50 – 55  
Ino eeci cibalo citusyomezya nzi? Ncinzi ncotunga twasyoma?
- Kabunga 4: 1 Johane 3:2  
Ino eeci cibalo citusyomezya nzi? Ncinzi ncotunga twasyoma?

Mupe kabunga tuvwalu vwalu tuli 5 kutegwa kalange cibalo cako mpoona mubaambile baambile mbunga yoonse eeco ncobaiya mu kavwalu vwalu komwe.



10  
tuvwalu-  
vwalu

### **Mupailo**

Musanzyanne ku maanza mbuli citondezyo cakuti zyintu zzyoonse zzyotwakalubizya zyasanzzyigwa kwiinda mukufwa akubuka kwa Jesu. Mwaambe kasimpe aaka kuli umwi aumwi eelyo mupaile mupailo wa cileleko kuti Leza azumananne kubamba muntu aumwi kuba

mbuli Jesu.



### **Cakucita iino mwiki**

Mwiki amwiki kuli mulimo ngo tweelede kucitila ku maanda.

Eelyo nowacapa zysisani zyenu akuzyisama kazyitakwe tombe, muliyeezye kuti oobo mbwamubona Leza.

Mulombe Leza amutondezye ooyo ngomweelede kulekelela, mumulekelele. Mwaambisye, ‘Ndakulekelela.’

Mupe kulumba kuli Leza kuti ulamusalazya kuzwa ku cinyonyoono cenu lyoonse nomwacapa na kusamba. Muyeeye kuti tamukwe katombe kumbele Iya Leza.



### **Kamboni**

Eelyo nomukanana abalongwe na bantu mbomubona ciindi ca syikati, mwaambile omwe muntu cimupede kuba bana Kristu eelyo akuti kuba muna Kristu caamba kubula akatombe kumbele Iya Leza. Mubone kuti mwapandulula kuti tamuli babotu kwiinda uuli oonse pele nkaambo buyo ka ceeco Jesu ncakacita.

Kuti kamuli mwakalekelela muntu ono mulombe Leza amwaambile na inga mwaunka kuya kubandika aawe. Kuti kamuyeeya kuti ulamuzumizya kuunka, na kacikonzyeka, muunke mukacite oobo.

Na mulimvwide kwaanguluka amuunke mukasalazye ng’anda ya mulongwe naaba zysisani, naaba kubwezelela tombe mucooko cenu. Kuti umwi muntu amubuzye ncomucitila eeco mumwaambile mbuli Jesu mbwakamusalazya.

# Kutambulwa mumukwasyi wa Leza



'Tutabi basikambotwembotwe,  
tutakalazyanyi, tutabi abbivwe  
umwi amweenzinyina.'

Ba-Galatiya 3:26



### **Kulibambila**

Sena:

- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?
- Sena mwakacebuka kulanga zyibeela 1 – 2 kutegwa muliyeeye ncotwakaiya kujatikizya Muuya Uusalala?



### **Kutambula Abwiinguzi**

5

tuvwalu-  
vwalu

- Mubalumbe boonse kukuboola ku kabunga.
- Mutalike amupailo mufwaafwi, utakatazyi.
- Mubuzye kabunga na kakacita ‘Cakucita iino mvwiki’ alimwi a milimo ya ‘Bukamboni’ kuzwa ku mvwiki yakainda.
- Mutambe bantu baambe cili coonse ncobakaiya na kuzyiba kuzwa ku ncito eenzyi.



### **Muzeezo**

Muzeezo wa wa cibeela eeci iino mvwiki ngwa kuzyiba kuti twakatambulwa mumukwasyi wa Leza. Tumwiita kuti Abba, taateesu. Tuli babunyina a Jesu abamwi. Tuli mumpidu ya mukwasyi.



### **Cipeto Camumutwe**

5

tuvwalu-  
vwalu

Mubalisye cipeto ca mumutwe abumboni bwa mu Bbaibbele ku kabunga. Mubale alimwi kutegwa kabunga kakonzye kwiinduluzya mbomubala mane muntu oonse akonzye kucaamba cipeto. Mukulwaizye bamwi bantu kuti basoleke kuciinduluka muli lwabo beni.

*Tutabi basikambotwembotwe, tutakalazyanyi, tutabi abbivwe umwi amweenzinyina.*

*Ba-Galatiya 3:26*



## **Caano**

Mubale caano citobela eeci ku kabunga:

Kwakali mwana mulombe utegwa Ben. Bina Ben bakaunka kacili muvwanda eelyo Ben nakakubuka wakazyiba kuti ani mwaalumi ngwakali kuti nguusyi wakakwete buyo banyina. Mubuumi bwa bwana bwakwe boonse Ben wakazingulukidwe zyintu zyibi. Aabo bausyi bakali kunywa kapati, kubelesya micelo iikola akuuma njuka. Ben wakazwisyigwa ku cikolo akusungilizyigwa kujana ncito kutegwa kakonzya kugwasyilizya mukwasyi.

Mbuli mbwakakomena, Ben wakatalika kubuzya na zyintu zyakali kabotu na pe mumukwasyi wakwe. Eelyo Ben nakali amyaka iili 16 bausyi bakamwaambila kuti inga wazwa amunzi na takkomanini bweende bwa zyintu. Ben wakazumina kweenda.

Ben wakakonzya kujana ncito yalo yakali kuboola abusena bwa kukkala. Cakali ciyumu nkaambo taakwe wakamuyiiside bwakubamba ng'anda naaba kubelesya mali aakwe. Wakatalika kuyaka buumi bwakwe pesi kwakali cimwi cintu cakabulilide.

Ben wakayeeya kuti kwakali muntu ngwakazyi wakamutambide kuya ku cikombela myaka 3 yakali kunze. Wakayeeya na tikwakali kumuka kuzumina bwiite, pele wakayeeya kuti aunke ku cikombelo akabone. Mukwasyi uumwi ku cikombelo wakamutambula akutalika kumuzyiba mbiccaana mbiccana. Buce buce bakakonzya kumuzyiba kabotu akuzyiba ani wakali kupengana buyo alikke. Bakatalika kumwiita akumweenzyeezya ku ng'anda eelyo akumusanganya

mumukwasyi wabo.

Nokwakainda ciindi, mukwasyi wakabuzya Ben na inga wayanda kuzulilwa mumukwasyi kwiinda mumulawo, kusangana mumukwasyi wabo akucinca zyina Iya bausyi kuya kuli Iyabo. Ben wakacyanda eeci elyo sunu uzulilwa mumukwasyi wabo.

Mukwasyi wakwe uupya wakamutondezya nzila yandeene kuli yeeyo njakakomenede aayo. Bakali kuyandana akubikkilana maano. Kuti na bakazyanya, bakali kubelekesya kutegwa balekelelane.

Taakwe nocakali cubauba kuli Ben naaba mukwasyi wakwe uupya. Mukwasyi wakwe wakali jisi milawo yalo njakali kweelede kwiiya kukkala aayo akutambula bulelo bwa bazyali bapya. Aabona wakali kubalubizyila mumericito na mukutabeleka kabotu. Aabona mukwasyi wakwe wakali kumuyoosya. Wakaiya kulilekelela, kulekelelwa akulekelela.

Mubweende bwa ciindi wakatalika kuzyiba kuti luyando Iwa mukwasyi wakwe uupya Iwakali Iwini. Tilwakali mukuti ambweni mubotu na mubi, nkabela bakali kumuyanda akaambo kakuti wakali mwanaabo.

Ben wakali kulangilizya mbuli mukwasyi wakwe uupya mbowakali kucita zyintu eelyo wakaiya kuli mbabo. Sunu, Ben ulangika mbuli mukwasyi wakwe uupya nokuba kuti takazyalilwa mumo. Uliji zyintu zyintu zyibotu, kusyoma atulengwa twa mukwasyi. Ben uli masimpe alubazu Iwakwe mumukwasyi alimwi ulizyi buya kuti ulayandwa mbweena mbuli bana bakazyalilwa mumo.



### **Luzyibo lwamu Bbaibbele**

Bala Ba-Roma 8:14-17 ku kabunga:

*<sup>14</sup>Nkaambo boonse beenzegwa ku-Muuya wa-Leza mbabonya mbibana ba-Leza. <sup>15</sup>Nkaambo teemwatambula muuya wabuzike buboozeyya buyoofu pe, mwatambula muuya wabwana, mulinguwo mutuompolola kuti, Abba, Ta. <sup>16</sup>Muuya mwini ulazuminana amyuyya yesu tubeni kuti tuli bana ba-Leza. <sup>17</sup>Lino kuti tuli bana, alimwi tuli baswaana, nkukuti baswaana ba-Leza, baswaana bakwe antoomwe a-Kristo, ikuti tuli bapenzinyina kuti tukabe balemunyina.*



Muzyibeela z'yobilo z'yakainda twakazyiba kuti twakanununwa (kuulwa alimwi a Leza) akusalazyigwa aceeco Jesu ncakatucitila. Tujisi matalikilo mapya abuumi bupya.

Tacigoleli aawo pe. Tuli jisi alimwi aciimo cipya. Cibalo cesu sunu citwaambila kuti, 'Muuya ngomwakatambula wakaleta kutambulwa kwenu ku buna Leza. Eelyo muli nguwe tulalila, "Abba, Taata." Twaambo ntunji tubikkidwe mumabala masyoonto buyo aayo, ono tuyanda kwalanganya antoomwe muzyibeela 4.

### **'Muuya ngomwakatambula'**

Eelyo notwaba bana Kristu, Leza ulatuvwuzya a Muuya Uusalala. Twakaiya a Muuya Uusalala muzyibeela zyili kunze.



### **Mubandi**

Mubuzye kabunga ncokayeeya kujatikizya Muuya Uusalala. Mupe ciindi kuli umwi aumwi aambe cimwi.

(Inga kauli muzeezo mubotu kucebuka ku zyibeela 1 – 2 zya mubbuku eeli mbuli mbomulibambila ciyyo eeci kutegwa mugwasye bantu eelyo nobapengana kuyeeya.)

5  
tuvwalu-  
vwalu



### **‘wakaleta kutambulwa kwenu’**

Cibalo caamba kuti Muuya ngotwakatambula wakaletwa akaambo ka kutambulwa kwesu.

Kutambula mwana caamba kubweza mulimo wa muzyali wa mwana ooyo kwiinda mumulawo. Mwana wa kutambula uli jisi nguzu mbweena mbuli wakulizyalila. Bazyali bapya tabakonzayi kwiide kucinca maano aabo akuti, “Tatu cikuyandi.” Taakwe ncanga waamba nokuba kucita mwana cikonzaya kumupa kucesyegwa mumukwasyi uupya. Kutambulwa nkucinca kwa ciimo, kutamani.

Aboobo mbocibede kuli ndiswe. Eelyo notwaba bana Kristu akuatambula buumi bwesu bupya tulatambulwa mumukwasyi wa Leza. Twakanununwa akusalazyigwa kumbele lya Leza akaambo ka ncakatucitila Jesu. Tuli zuzyidwe a Muuya Uusalala akuba bana ba Leza, cibeela ca mukwasyi wakwe. Leza takonzayi kucinca mizeezo yakwe naaba cimwi kutucesya mbuli bana bakwe. Tuli lubazu lwa mukwasyi wakwe.

Cimwi cintu ciyandisi kuzyiba ncakuti mwana wa kutambula ujisi buumi bwandeene eelyo natana tambulwa. Mulamuyeeya Ben mucaano cesu? Wakali jisi mukwasyi kataninga tambulwa. Wakaiya nzila ya buumi kuli mbabo pele wakatalika kubuzya na yakali mbotu na pe. Eelyo Ben nakamana kutambulwa mumukwasyi uupya buumi bwakwe azyintu zyakali kwiiya zyakacinca. Sunu Ben muntu waandeene kapati kuli yooyo ngwakali kulangilwa kuba kuti natakatambulwa.

Aboobo mbocibede kuli ndiswe eelyo notwaba bana Kristu. Nokuba kuti inga twabwezelezya atumpenda twesu abube bumwi bwa buumi bwesu ba kaindi, lino tuli lubazu lwa mukwasyi uupya, mukwasyi wa Leza, tujisi buumi bupya. Mubweende bwa ciindi,

tuba bantu baimpene kapati ku bantu mbotwakali kukonzya kuba kuti notwatakatambulwa mumukwasyi wa Leza. Zyimwi zyintu zyilabinda kucinca, zyimwi zyilamuka mbuli Muuya Uusalala mboubeleka muli ndiswe kutubamba mbuli Jesu alimwi ambuli mbotwiiya kuli bamwi ba mumkwasyi wesu uupya.



### **Mubandi**

Mutubunga twa bantu 3 na 4 mukanane mibuzyo itobela:

- Kutambulwa ninzi?
- Ino kutambulwa caamba nzi ku mwana watambulwa?

Caamba nzi kuli ndiswe kuti twakatambulwa mumukwasyi wa Leza?

5  
tuvwalu-  
vwalu



### **'ku ba basankwa'**

Kaambo kapati nkotweelede kuzyiba nka kuti muciiindi Bbaibbele nolyakali kulembwa, bana basankwa bakali kubonwa kuba bayandisi kwiinda bana basimbi. Bakali kukonzya kukona lubono lwa mukwasyi akutola zyina lya mukwasyi kumbele. Kuzulilwa ku basankwa cakali kupa ciimo cisumpukide. Mumazuba aayo bana basimbi tibakajisi ciimo ceelene.

Eelyo cibalo cesu nociti tulipedwe busankwa, tacaambi buyo kuti balikke baalumi mbobakonzya kucitambula eeci. Tacaambi kuti banakazi tabakwe kapati mulimo. Ncoacaamba ncakuti bantu boonse, baalumi abanakazi, balakonzya kupegwa ciimo cipati kapti mumukwasyi wa Leza calo, eliya ciindi Bbaibbele nolyakali kulembwa, bakeelede kuba basankwa. Eeci caamba kuti kwiinda mukutambulwa kwesu mumukwasyi wa Leza, lino tulipedwe ciimo cipya, bulemu busumpukide. Tuba baabo bakonzya kukona mbono zyakwe. Tubweza zyina lyakwe.

Eeci ncoolwe cipati. Tulabweza bulumbu boonse mumukwasyi: taata siluyando utulanga antoomwe abukwabilizi bwa taata

aluyando lwa mumama uubikkila maano (amubone [Matayo 6:26](#), [Izaya 66:13](#) alimwi a [Matayao 23:37](#)). Kwamana tulajana bakwesu abacizyi banji – aabo boonse basyoma muli Jesu eelyo bakatambula Muuya Uusalala.

Mbweena mbuli Ben mucaano cesu, aabona inga catuyumina kuba lubazu lwa mukwasyi uupya. Inga twasyupikwa kupona mumukwasyi uupya; inga bamwi bamukwasyi batulubizyila. Mbuli Ben, tweeleda kwiiya kulilekelela kuli Leza akuli umwi aumwi, kulekelelwa akulekelela.

### **‘eelyo muli nguwe tulalila, “Abba, Taata.”’**

Bbala lya ‘Abba’ ndibbala lya ci Aramaic (eeci nceciyobo cakali kukananwa muciiindi ca Jesu). Cakataangunwa kulembwa mu Bbaibbele eelyo Jesu nakali kupaila, kataninga abwa akujaigwa. (Inga mwabala mupailo wakwe muli [Marko 14:32-42](#).) Jesu wakali kulilila Leza mbuli usyi. Wakali mupailo kuzwa kungsi aa moyo wakwe.

Ndilyona bbala lilibelesyedwe zyiindi zyobilo mu Bbaibbele, ciindi comwe mucibalo ncotwabala sunu ([Ba-Roma 8:15](#)) alimwi amu [Ba-Galatiya 4:6](#). Mumasena oonse aaya obilo, Ibbaiibbele lyaamba kuti utupa kuti tukonzye kulila kuti ‘Abba, Taata’. Tulakonzya kulilila Leza kuzwa kungsi amoyo wesu, mukuzyiba kuti ulatubikkila maano nkaambo tuli bana bakwe.



### **Cakucita**

Eeci cakucita ciya kulanganyancocaamba kuba lubazu lwa mukwasyi.

- Omwe omwe, mubuzye bantu boonse baambe mbuli mbobakozyenye abausyi na banyina naaba nzila yomwe mwanaabo mbwabakonzya.

10  
tuvwalu-  
vwalu

- Citobela, mubuzye bantu boonse baambe cintu comwe ciyandisi mumukwasyi wabo. Eeci inga kacili cimwi cintu ncobacita, mbobabona na mbobasyoma na nsesyo yalo njobateelela!

Eelyo boonse baingula mweenge bwiinguzi bujaticizya mbotuzyalwa (ambweni tulakonzyanya) zyimwi ziyatikizya zyintu zytowiya (tuyanza twesu azyintu zytuyanda). Muyezye kabunga kuti eelyo notwaba lubazu lwa mukwasyi wa Leza Muuya Uusalala ukkala muli ndiswe uya kutugwasya kuba, kulanga, akumvwika mbuli bamukwasyi.

Mubuzye ambweni mukaanda muli omwe wakabweza mwana na wakabwezegwa ulalimvwa kuti inga waamba caano cakwe. Nciyandisi kubona kuti taakwe nomwapa kuti bamwi batalikwayi naaba kufwundilila, aboobo mwaambe kuti bantu inga baamba buyo nabalayanda.



15

tuvwalu-  
vwalu

### **Mupailo**

Mubayeezye boonse kuti tuli lubazu lwa mukwasyi omwe, aboobo ncibotu kuba antoomwe akubandika kuli taateesu wa kujulu antoomwe.

### **Kusangana mukwasyi**

Cakusaanguna mubuzye na kuli uumwi utanaba mulubazu lwa mukwasyi eelyo uyanda kucita boobo sunu. Na kwiina wiingula, inga mwaunka ku mupailo utobela (Kwaanzya mukwasyi). Na kuli uumwi uyanda kusangana mukwasyi sunu, inga mwamusolwedela mumupailo utasyupi ono. Mulombe bantu 2 bakkede mumsi mumsi lyabo kuti babikke maanza aabo alimbabo mbuli citondezyo cakutambulwa mumukwasyi, mpoona mwaambile muntu aindulule mupailo utasyupi, muzila 1, kumuccililizya.

Taata, ndalumba kunditumina mwanaako Jesu kuzya kundifwidakutegwa nditambulwe mumukwasyi wako. Sunu ndiyanda kuba lubazu lwa mukwasyi wako. Ndazwa ku buumi bwangu bwa kaindi akukulomba kuti unditumine Muuya Uusalala ukkale muli ndime kutegwa kuti ndibe mwanaako, kundigwasyilizya kuba mbuli nduwe. Ameeni.

Mubaambile boonse basekelele eelyo mwamanizya mupailo kutegwa batambule bantu bapya mumukwasyi!

### **Kwaanzia mukwasyi**

Lino tuya kwaanzia bakwesu abacizyi mumukwasyi wa Leza – umwi aumwi – akulumba Leza kuli aumwi aumwi. Pandulula kuti na kuli uumwi wakajisi kwiimpana aumwi mukabunga ono, nciindi cibotu cakulilekelela ku muntu ooyo akulekelelana.

Mwaambile bantu baanzanye ku maanza abantu banji mbobakonzya oomo mukaanda, kulumba Leza ku muntu oonse. Muzumizye kusikila ku tuvwalu vwalu 5 kutegwa bantu bacite eeci mpoona mubaite boonse antoomwe.

### **Kukanana kuli Taateesu**

Mwaambile boonse baimikile mucikweya akujatana maanza eelyo mupandulule kuti tuya toonse tuya kupaila ca koompolola aciindi comwe. Mubaambile boonse babelesye majwi aabo kulumba Leza mukubatambula mumukwasyi wakwe. Na kakuli cimwi ncobeelede kulilekelela kuli Leza, lino nceciindi cibotu cakucita oobo. Inga balomba Leza azumanane kubabamba kuba mbuli nguwe kwiinda mu Muuya Uusalala.



### **Cakucita iino mvwiki**

Mvwiki amvwiki kuli mulimo ngo tweelede kucitila ku maanda. Iino mvwiki tuya kutambana ku maanda eesu akwaabana cilyo.

Cisela ca kabunga ciya kuyandika kutamba mpoona cimwi cisela ca kabunga ciya kuyandika kuswaya! Mubone kuti taakwe wasiigwa anze alimwi muntu oonse uli jisi mweenzu na busena bwa kuswaya. Bantu inga babamba makanze abeelede.

Cakulya ncibeela ciyandisi mubuumi bwa mukwasyi alimwi nciindi cibotu cakuyeeya ncocaamba kuba lubazu lwa mukwasyi. Eelyo nomwaswaangana, mweelede kubuzanyanya mibuzyo itobela:

- Ino caamba nzi kutambulwa mumukwasyi wa Leza?
- Inga twatambula buti bantu mumikwasyi yesu amumukwasyi wa Leza?



### **Kamboni**

Munzila njoona Leza njatutambula mumukwasyi wakwe, inga twatambula bamwi mumikwasyi yesu, mbubwena bwakacita bazyali ba Ben. Kutambulwa mbumbonibubotu kuli baabo batambulwa abaabo batuzungulukide.

Kutambulwa tacili cintu cikonzya kucitwa mukubinda na mubuubauba. Iino mvwiki mube aciindi cakuyandaula kuzyiba kutambulwa akupailila kuti ambweni inga mwatambula bana mumukwasyi wenu na kugwasya mukwasyi uutambula.

# Bulembo

## Kubaa Luzyalo kuli Bamwi

'Amuboole kulindime nyoonse nomukatede nomulemenwa, ndime enti kamulemunune. Amulikulike ijokwe lyangu, mwiiye kwangu, nkaambo ndilibombede, ndi mutete moyo, lino mulakatulukwa mummyoyo yanu, nkaambo ijokwe lyangu lilibulungusene, awalo mukuli wangu muuba.'

Matayo 3:11



### **Kulibambila**

Sena:

- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?



### **Kutambula Abwiinguzi**

5

tuvwalu-  
vwalu

- Mubalumbe boonse kukuboola ku kabunga.
- Mutalike amupailo mufwaafwi, utakatazyi.
- Mubuzye kabunga na kakacita ‘Cakucita iino mvwiki’ alimwi a milimo ya ‘Bukamboni’ kuzwa ku mvwiki yakainda.
- Mutambe bantu baambe cili coonse ncobakaiya na kuzyiba kuzwa ku ncito eenzyi.



### **Muzeezo**

Muzeezo wa cibeela eeci iino mvwiki ngwa kwiiya kuti lulekelelo lwesu luboola akaambo ka luzyalo lwa Leza kuli ndiswe. Mbuli mbotukomena mubulongwe bwesu tutalika kulimvwa kuti tatubi buyo aa luse, pele tulatalika kulucita luse.



### **Cipeto Camumutwe**

5

tuvwalu-  
vwalu

Mubalisye ku kabunga zyipeto zya mumutwe a bwiiminizi bwa mu Bbaibbele. Muzyibale alimwi mutubeela tusyoonto, mubone kuti kabunga kakonzya kubala kwa kutobelezya. Buce buce amubale muzyibeela zyilamfwu eelyo kabunga kakatobelezya kusikila boonse bakonzye kucaamba cibalo. Mukulwaizye bantu basole kuciindulula lwabo beni.

*Amuboole kulindime nyoonse nomukatede nomulemenwa, ndime enti kamulemunune. Amulikulike ijokwe lyangu, mwiiye kwangu, nkaambo ndilibombede, ndi mutete moyo, lino mulakatulukwa mummyo yanu, nkaambo ijokwe lyangu lilibulungusene, awalo mukuli wangu muuba.*

*Matayo 11:28-30*



### **Caano**

Mubale caano citobela eeci ku kabunga:

Mumunzi utegwa Katuba kwakali kukkali mulombe utegwa Jack. Jack wakali kukkala abazyali bakwe balo bakali kubeleka ca nguzu akusolekesya kubona kuti cakulya ca Jack abana bokwabo nkocili lyoonse.

Jack wakali mulongwenyina a Bright wakali simukobonyina. Wakalizyi kuti buumi bwakali buyumu kuli Bright nkaambo banyina bakafwa nakacili muniini. Bausyi Bright abalo bakali kubelekesya, pesi cakali kubapenzya kubamba akuyandawida mukwasyi. Bright wakali kutola ciindi cinji kuteka meenda, kubamba cakulya akulanganya muce wakwe munyina amucizyi.

Cimwi ciindi ku mazuba eelyo Jack nakali kulya cibusulo amukwasyi wakwe, wakabona Bright wakali kkede amulyango wakwabo ulabalangilila.

Eeci alimwi cakacitika buzuba bwakatobela.

Jack wakabona kuti eeci ticakali kabotu nkaambo Bright wakali kuvwula kujata bubi kubamba cakulya akulya muciiindi abalo nobakali kulya.

Jack wakaunka kuya kubandika a Bright akujana kuti bausyi bakali

cisidwe aboobo tibakali kukonzya kuya ku ncito, kujana mali akuula cakulya. Mukwasyi wakaina cakulya eelyo boonse bakafwide nzala.

Jack wakalimvwa buumba kuli ceeci eelyo wakakonzya kukulwaizya Bright mbuli mbwakali kukonzya. Bright wakamwetula akumulumba eelyo Jack wakaunka ku ng'anda.

Mafwumo fwumo akatobela mbuli mukwasyi wa Jack mbowakakkala kulya kulya kalimba bula Jack wakayeeya Bright eelyo wakeenzeenzya mbuli mbwakafwide nzala aaya mafwumo fwumo. Wakabuzya bausyi abanyina na bakalikukonzya kwabanya cakulya a Bright a Mukwasyi wakwe, kupandulula kuti bakaina cakulya eeyi mvwiki.

Bamukwasyi wa Jack bakazumina akwiita Bright amunyina amucizyi kuti babasangane ku kalimba bula. Alimwi bakatola mutiba wa ceele kuli bausyi Bright bakacili kuciswa.

Mukwasyi wa Jack wakazumanana kwaabila cakulya ku mukwasyi wa Bright kwa mvwiki 2 zyakacilila kusikila limwi bausyi Bright bakalimvwa kabotu akukonzya kujokela ancito.

Boonse bamukwasyi wa Jack bakaba acakulya cisyoono eeyo mvwiki eelyo bakafwa nzala, pesi akaambo kakuti bakafwa luse kuli Bright amukwasyi wakwe tibakali kukonzya kubasiya anzala.

Kuzwa ciindi eeco, mukwasyi wa Bright awa Jack yakaswenana akugwasyanya munzila zyiimpene.



### **Cakucita**

Mwandaanye kabunga mutubunga 2 tusyoono mpoona mwambile kabunga akabunga kabambe kasobano katondezya caano ncomana

tuvwalu-  
vwalu kubala.

Umwi weelede kusobana lubazu lwa Jack eelyo umwi weelede kuba Bright. Bamwi inga baba bamukwasyi wabo.

Muzumizye tuvwalu vwalu 5 kutegwa bantu balibambile, mubakulwaizye batugwasye kututondezya luse mboluboneka.

Kwiinda tuvwalu vwalu tuli 5, mwambile akamwi kabunga kasobane musyobo wako wa cisobano.

Mubakambilile boonse.



### Mubandi

Mubuzye kabunga na kayeeya kuti eeci caano cituyiisya nzi. Muzumizye ciindi ku bantu kutegwa bape mizeezo yabo.

5

tuvwalu-  
vwalu



### Luzyibo lwamu Bbaibbele

Mubale Marko 6:30-34 ku kabunga:

*<sup>30</sup>Lino baapostolo bakabungana kuli-Jesu, bakamwaambila zintu zyoonse nzibakacita anzibakaiisya. <sup>31</sup>Mpawo wakabaambila kuti, Amuboole nywebo nubeni kumbali kunkanda, mukalyokezye buniini. Nkaambo abo abakali kuza akuya kabali banji, nkabela bakabula ciindi niciba cakulya. <sup>32</sup>Mpoonya bakainka mubwaato kumbali kunkanda. <sup>33</sup>Pele bantu banji bakababona nibakali kuya, babaziba, elyo bakabazuzaanina ansi kuzwa kuminzi yoonse, bakababeelela kusika. <sup>34</sup>Lino naakazwa wakabona makamu manji aabantu, elyo wakabafwida luzyalo, nkaambo bakabaanga nimbelele zitakwe mweembezi, nkabela*

*wakatalika kubaiisya makani manji.*



Mucaano eeci kuzwa ku buumi bwa Jesu tumvwa kuti ba Apostolo bakali kuyandaula busena buumwine kutegwa bapumune. Nokuba boobo eelyo Jesu nakabona nkamu ya bantu kaimuccilila wakabafwida luzyalo akutalika kubayiisya. Wakalikukonzya kusala buyo kutababikkila maanu kuli zyeeyo nkamu zyoyakali kuyanda pesi wakasala kuti azyibikke kutaanguna.

Ooku kulimvwa kwa luzyalo Jesu nkwakalimvwa kwakamupa kuti acite cimwi bwandeene. Cakamupa luzyibo ndwatakajisi; wakatalika kubamvwa kapati bantu. Cibalo citondezya nkamu ya bantu kuba mbelele eelyo Jesu ngo mweembezi. Mbuli mweembezi Jesu wakali kubayiisya bantu zybakeelede kuzyiba akubanyona kuti batazwi kuli Leza. Wakabagwasya kutantamuna cilijazyo eelyo wakabayiisya kujatikizya bwami bwa Leza, abuumi bupya mbwakali kubapa.

Nokuba kuti luzyalo lusalika buyo mukulimvwa, Jesu watondezya kuti ooko kulimvwa kulacinca akuba mucito. Ciindi aciindi ulabona bantu kabasoleka, kupenga na kuba mumapenzi eelyo luzyalo ndwabamvwida ndolupesya kuti abagwasye. Ciindi aciindi lugwasyo luliimpene eelyo luleendelene apenzi mboliboneka.

Tootu atumwi twaano totatwe tutondezya luzyalo lwa Jesu:

- Jesu wakabona nkamu ya bantu mpati kaimulindila mbuli luse lwakwe kuli mbabo wakaponya baabo bakaciswidwe akati kabo ([Matayo 14:14](#)).
- Jesu wakali kuyiisya iimwi nkamu ya bantu kwa mazuba otatwe eelyo wakazyiba kuti bafwide nzala, aboobo wakabafwida luzyalo akulailila basiciiya bakwe kuti babajanine cakulya. Mpoona mumaleele wakacivwuzya cakulya eeci kutegwa kutabi naba omwe utiyende anzala

(Matayo 15:32).

- Jesu uleenda eelyo boofwu bobilo bamoompolola. Wababuzya ncobayanda eelyo bati abaponye babone alimwi. Kuzwa muluzyalo kuli mbabo wabaponya eelyo bakonzya kubona alimwi (Matayo 20:34).

Mucaano cesu sunu, eelyo Jack nakabona Bright amukwasyi wakwe kabatakwe cakulya wakabafwida luzyalo. Oolu luzyalo lwakamweenzya kuti paka acite cimwi, kukulwaizya mukwasyi wakwe kuti waabile cakulya ncobakajisi kuli Bright amukwasyi wakweakuba aciindi ambabo. Mukubapa cakulya akuba aciindi ambabo mukwasyi wa Jack awalo wakatambula kunji kuzwa kuli Bright amukwasyi wakwe mbuli bulongwe. Jack taakwe nakamusulaika Bright, kumutongooka na kutamubikkila maano akaambo ka mapenzi nga kajisi. Biyo wakamupa ncakali kukonzya eelyo bakaabana ncobakajisi, nokuba kuti cakaambilizya kuti Jack amukwasyi wakwe bafwe nzala!

### **Ino luzyalo ninzi?**

Luzyalo nkulimvwa ku nyamuka eelyo nomwatalika kubona baabo bapenga, bamvwa kucisa alimwi akukatazyigwa. Nkulimvwa kwalo kuleta bukulwaizi ku cizo akugusya mapenzi. Kulacinca muntu kwiinda mukugwasya kuti azyibe bamwi mbobalimvwa; eeci buya inga cakucima mbonjila mukuciswa na kusolwa kwabo. Nokuba boobo, cilapa mafuta akuti mukonzye kucinca nyika imuzungulukide kwiinda mukucita cimwi cakugwasya kugusya kucisa na makatazyo ngomwatalika kubona.

Leza ngu siluzyalo mubube bwakwe; upandululwa boobu:

*Jehova wakainda kubusyu bwakwe, waamba, wati, Jehova!  
Jehova! Leza siluzyalo asibuuya uutaftwambi kukalala, uuzwide*

Mbuli mbotukomena mumaumi eesu mapya akuba mbuli nguwe, aluzyalo lwesu mboluyungizyigwa.

Leza ulaleta luzyalo mummyoyo yesu kwiinda mu Muuya Uusalala; ulatupa bweende abukulwaizi kweendelanya aluzyalo lwesu. Mbweenya mbuli Jack amukwasyi wakwe, tatweelede kuvwuba kutegwa tube aluzyalo. Tatweelede kuba azyintu zyoonse ziyobutu mumaumi eesu naaba kubula makatazyo kutegwa tube aluzyalo. Kufwumbwa muntu inga wafwida uumwi luzyalo eelyo Leza uya kumupa muzeezo wakubelesya luzyalo oolu.



5

tuvwalu-  
vwalu

### **Mubandi**

Mutubunga twa 2 na 3 mubaambile boonse bakanane mibuzyo itobela. Kwamana mupe ciindi kuli boonse bape bwiinguzi amizeezo yabo.

- Ndilili nomwaali aaluzyalo na eelyo umwi nakali aluzyalo kuli ndinywe?
- Ndwiindano nzi luzyalo ndolwa kapanga muzyiindi eezyi?



### **Muzeezo wa kubamba luzyalo**

- Namuyanda bamwi kuti bakkomane, amucite luzyalo.
- Namuyanda kukkomana, amucite luzyalo.

Inga mwati kubikkila maano kukukkomana kwa umwi mbuli kuti nkukwenu nduzyalo. Jesu ulacitondezya eeci eelyo nabikka kuyandisya kwa bamwi kumbele akwakwe. Eelyo nakabuzyigwa amulawo wiinda kukomena, Jesu ulayiisya:

*Wakamwaambila kuti, Yanda Leza Jehova wako amoyo wako*

*woonse, amoya wako woose, amumiyeeyo yako  
yoonse. Ngooyu mulazyo mutaanzi mupati. Awabili ulikozyene  
awalo, ngooyu, Yanda mweenzinyoko mbuli mboliyanda  
omwini.*

*Matayo 22:37-39*

Kuti natwataanguna kuyanda leza mpoona twayanda simukoboma mbuli mbotuliyanda lwesu, inga ticatuyumina kufwida baabo mbotu swaana luzyalo.

### **Kaambo kapati mukukomezya luzyalo**

Kutegwa mukomezye luzyalo mweelede kunacitica buzuba abuzuba. Mucitelaike mafwumo fwumo. Inga mwacita oobo eelyo nomubeleka milimo ya buzuba abuzuba, kulimina muunda wenu na kusalazyana ng'anda yenu. Amuciyeeye eelyo nomwiizya aabamwi. Muciibaluke masiku. Tacaambi kuti mube mucikombelo kutegwa mutelaike aluzyalo – Leza inga wakanana kuli ndiswe kufwumbwa mpotubede. Tacyandi twaambo tusyupide: luse nkekaambo.

Mbuli mbotwiiya kukomezya luzyalo tweelede kutalika kusanganya abaabo batuzungulukide. Luzyalo talubeleki kwiinda mukuluyeeeya, tweelede kuba mumsi mumsi abantu kutegwa tubone cicitika mumaumi aabo eelyo tutole lubazu mukubagwasya. Eeci ciya kuleta makatazyo alimwi ciya kutupa muulo pesi nje nzila buyo njotunga twakomezya luzyalo mukasimpe.

### **Ino caamba nzi kubaa luzyalo?**

Inga titwacimvwa ncoocaamba kubaa luzyalo:

- Sena nkupa mali ku bacet kwiinda mutubunga twalo tugwasya? No!
- Sena nkwetezyegwa? No!
- Sena nkwaambila uumwi penzi mukuyeeeyela kuti

bakugwayse? No!

Mubuumi bwesu bwa lyoonse, luzyalo nkuba amoyo ujukide kuzyituzungulukide. Eeci caamba kuswiilila ku bayandwa besu abamwi batuzungulukide. Muli Matayo 13:15 Jesu ulayiisya mucibalo cizwa muli Izaya 6:9-10 buyandisi bwa kubona, kumvwa akuteelela cicitika kutegwa tukonzye kunyonena kuli Leza kuti tuponezyegwe akugwasyigwa. Luzyalo caamba kuzyiba ceeco ncotunga twacita eelyo akucita ncotunga twacita. Lujatikizya kubona, kumvwa alimwi akuzyiba, kweendelanya akulimvwa kwesu kuli Leza eelyo akubelekela aamwi anguwe mukugwasya bantu akuleta lulangilo akuponya.

Kulimvwa kulikke takuli kunji.



5

tuvwalu-  
vwalu

### Mubandi

Mutubunga twa 2 na 3 mwaambile bantu boonse alimwi bakanane mibuzyo itobela. Kwamana mupe ciindi kuli boonse bape bwiinguzi amizeezo yabo.

- Ncinzi citulesya kuba aluzyalo?
- Inga twaba buti aluzyalo?
- Ino luzyalo lucita nzi kuli ndiswe akuzyooko zyesu?

Luzyalo talukonzyi kubalwa. Lweelede buyo kumvwugwa akwaabilana.



15

tuvwalu-  
vwalu

### Mupailo

Tuya kulomba Leza kuti atupe myoyo izwide luzyalo.

Mwaambile boonse bapaile muli bobilo bobilo.

- Kusaanguna, bantu beelede kulumba Leza kuti ngu siluzyalo kuli ndiswe toonse.
- Cabili, beelede kulomba Leza kuti alete ku myoyo yabo

kufwumbwa ciindi nobatakakwe luzyalo kuli uumwieelyo balombe lulekelelo kuli ceeci. Abalo inga bapaila kwa ciindi akulilekelela kuli ooyo muntu.

- Citobela beelede kulomba Leza abagwasye kuba aluzyalo munzila njoona Jesu njakatufwida luzyalo.
- Beelede kulomba Leza abatondezye ooyo weelede luzyalo lwabo ancobeelede kucitila bantu aaba mukubabikkila maano.



### **Cakucita iino mvwiki**

Ino mulimvwa buti mwabona uumwi kapenga?

Ino muliyeyela buti eelyo nomwalanga maumi aabamwi bantu?

Iino mvwiki, tuyanda kusola kwiingula ku luzyalo lwesu akutola ntaamu mukugwasya bamwi bapenga.

Na Leza waleta uumwi mumizeezo yenu eelyo notwali kupaila, mumuyeeye ooyo muntu eelyo mupaile alimwi. Nakwiina waboola mumizeezo, muzumanane kulomba Leza amutondezye ooyo ngomweelede kutondezya luzyalo iino mvwiki.



### **Kamboni**

Amuunke mukaswaye ooyo Leza ngwa leta mumizeezo yenu.


Musoleke kuziyiba ciimo cakwe eelyo mulombe Leza amutondezye ncomweelede kucita mukugwasya.

Mpoona mweende mukabacitile cimwi.

Eelyo nomubagwasya eeco ncobayanda, mubaambile luzyalo lwa Leza ambwababikkila maanu antoomwe abuumi bupya mbwanga waleta muciiimo cabo.

# Bulembo

## Cibeela Cakumamanino

A black and white photograph of several wheat stalks. The stalks are in various stages of maturity, with some showing the grain heads clearly. The background is blurred, creating a sense of depth. The lighting is soft, highlighting the texture of the wheat.

'Mbubo, sikuzikila taakwe makani,  
alakwe sikutililila taakwe makani, pele  
Leza uumenya nguujisi makani.'

1 Ba-Korinto 3:7



### Kulibambila

Ncomuyandika mu cibeela eeci:

- Mbuto abulongo mutukopo mwalo momunga mwaswanga mbuto.

Sena:

- Mwakabuzya uumwi mukabunga kuti abale caano?
- Mwakabuzya uumwi mukabunga kuti abalo cibalo ca mu Bbaibbele?



5

tuvwalu-  
vwalu

### Kutambula Abwiinguzi

- Mubalumbe boonse kukuboola ku kabunga.
- Mutalike amupailo mufwaafwi, utakatazyi.
- Mubuzye kabunga na kakacita ‘Cakucita iino mvwiki’ alimwi a milimo ya ‘Bukamboni’ kuzwa ku mvwiki yakainda.
- Mutambe bantu baambe cili coonse ncobakaiya na kuzyiba kuzwa ku ncito eenzyi.



### Muzeezo

Muzeezo wa cibeela eeci iino mvwiki ngwakuliyeezya twaambo tupati totwalanganya mu ***Mutalikilo 2: Buumi Bulakomena***. Tuya kulanganya alimwi aceeco ciya kuboola mu ***Matalikilo 3: Buumi Bulabamba***.



5

tuvwalu-  
vwalu

### Cipeto Camumutwe

Mubaliseye cipeto ca mumutwe abumboni bwa mu Bbaibbele ku kabunga. Mubale alimwi mutubunga tuniini niin, mubone kuti kabunga kalaindulula kubala. Buce buce mubale ku tubunga tupati pati antoomwe akabunga kakainduluzya mane boonse bakonzye kwaamba cipeto ca mumutwe coonse. Mukulwaizye bantu basole kwiinduluka muli lwabo.

*Mbubo, sikuzikila taakwe makani, alakwe sikutililila taakwe makani, pele Leza uumenya nguujisi makani.*

*1 Ba-Korinto 3:7*



### **Caano**

Mwami Josiya wakalela cisi ca Juda kwa myaka iinda ku 2500 kaindi. Wakazwa mumundando wa bami, bamwi babo bakali kabotu, bamwi taakwe nobakali kabotu. Cakali kukkomanisya a Mwami Josiya ncakuti wakaba mwami kajisi myaka 8. Wakacili mwana musankwa eelyo bausyi nobakajaigwa eelyo wakasiilwa mulimo wa kulela cisi.

Kutalangnya ciimo cakwe, luzyibo lwa Josiya lwa kulela cisi lwakakomena akukula. Nakajisi myaka 16 wakatalika kuyandaula kuzyiba Leza. Nakaba amyaka 20, wakatalika kubamba milawo ya Leza akugusya zyibumbwa mucisi cakwe. Nakaba amyaka 26, wakabelesya akutela kuti ayakulule cikombeloakukulwaizya bantu kukomba Leza. Eelyo nkamu ya basikuyaka noyakaunka kukuyaka cikombelo bakajana musyobo wa mabuuku a Bbaibbele mataanzi. Eeci cakabalwa kuli Josiya eelyo cakacinsa buumi bwakwe. Kutaanguna, wakali kutobela Leza kwiinda mutunsiya-nsiya twa bazyali bakwe, pele ono wakajana mangwalo eelyo wakatalika kutobela Leza muni muni. Lusyomo lwakwe lwakakomena akukula eelyo wakatalika kwaabanya lusyomo lwakwe kuli baabo boonse mbakali kulela, kupa coolwe cakuzyiba Leza akumukomba.

Eelyo Josiya nakjaigwa munkondo cisi cakalila kwa ciindi cilamfwu, mpoona cakatolwa mubuzike kayi ticakacijisi musololi sintanze alimwi muna Leza.

(Inga mwacibala caano eeci mu Bbaibbele mu 2 Makani 34:35.)



## Luzyibo lwamu Bbaibbele

Mubale Marko 4:26-29 ku kabunga:

*<sup>26</sup>Lino wakati, Bwami bwa-Leza buli mbuli muntu uuminza imbuto ansi. <sup>27</sup>Walo uloona akubuka lyoonse masiku asikati nkabela imbuto zilamena akukomena, pele walo tazi naazikomena buti. <sup>28</sup>Insi ilazyala micelo ini, kutaanguna busonga, nkokuya makunka, nkokuya maila aatuba mumakunka. <sup>29</sup>Lino maila naabizwa, mpoonya mpoonya ulatuma cigonsyo, nkaambo casika ciindi cakutebula.*



Mutumpango ootu twali kwiiya mbuli buumi bwesu bupya muli Leza mbobukomena. Mbuli cibalo cesu ca mu Bbaibbele acipeto cesu ca mumutwe mbozyitwambila, tatuli ndiswe tuleta kukomena ooku, ngu Leza buyo alikke ukonzya kucita boobo. Mbubwena zyisyango mbozyikomona notwasyanga mbuto mubulongo, abuumi bwesu bupya muli Leza mbobukomena. Mbweena Leza mbwali nguwe ukomezya, aswebo tujisi mulimo wakubona kuti busena buli kabotu, buyo eeci cilamusya akupa kuti kukomena kusyupe.



## Cakucita

(Kuli ceeci cakucita muya kuyandika mbuto abulongo mutukopo kutegwa musyange mbuto.)

15  
tuvwalu-  
vwalu

Kutegwa tuliyeenze kukomena mbokuboola eelyo buumi nobwatalika tuya kusyanga mbuto akulangilizya mbozyiya kukomena kwa mwiki zyiboola.

Muntu oonse weelede kubweza kakopo akukazuya bulongo / mamvwu, mbuto mpoona nkwiida. Inga bakatola kakopo ku ng'anda akuya kulangilizya kasyango.

Mbuli mbomulanganya tusyango twenu, mulangilizye tukomene ambweni inga mwalya na kubotelwa kulangilizya micelo njotuzyala (cili buyo ali ncomwasyanga), muyeeye kuti Leza ukomezya cimwi cipya muli ndinywe anywebo.



## **Kucebuka ku Bbuku 2: Buumi Bulakomena**

Mubbuku eeli lya bili mutubeela, **Buumi Bulakomena**, twaleta matalikilo aamwi mwalo lusyomo lwesu molunga lwakula akukomena. Twaleta twaambo twa mizeezo yalo ijililide bwa kubelesya Bbaibbele eelyo amupailo zyalo zyatugwasya kumvwa akubikka buumi bupya mbotwatambula mumicito.

Mubbuku eeli twabaa ciindi cinji cakulanganya kuti ino Muuya Uusalala ambouboola kuzya kukkala muli ndiswe eelyo notwatambula cipego ca Leza. Mukuboola kuzya kukkala muli ndiswe, twabona kuti utupa zyipego alimwi ulabeleka kuleta bube bwa Leza bwa luyando muli ndiswe. Muuya Uusalala ulagwasya kubamba buumi bwesu bupya akubukomezya.

Twakalanganya ca mumsi mumsi eeco cinyonyoono ncocicita kuli ndiswe, eelyo alimwi acipego ca luse lwa Leza lwalo lupegwa samba ulye mboluzunda cinyonyoono mumaumi eesu. Twakaangululwa, kuulwa alimwi, kusalazyigwa eelyo akupegwa busena bupya mumukwasyi akaambo ka luse lwa Leza. Eeci cakatugwasya kuleta njiisyo zya Bbaibbele zya lununuko, kusumpulwa akutambulwa, eelyo acimwi citutondezya ncocaamba kutambula buumi bupya alimwi aceeco cicitika eelyo buumi bupya nobwazuminwa. Buumi bwesu bupya bulatucincila limwi, mpoona maumi eesu alaba akukula akukomena kutegwa tube mbuli Jesu.

Mukumanizya, twakatalika kubona buumi bupya muli ndiswe, mbobukula, taili buyo mpindu yesu, pesi nimpundu ya mikwasyi

yesu azyooko zyesu. Buumi bwesu bupya tabweelede buyo kuba bwesu pele, mbuli mucaano ca Josiya, ooko kucinca muli ndiswe kweelede kuleta kucinca kwa nyika ituzungulukide.

### **Kulangila Matalikilo 3: Buumi Bulalenga**

Mubbuku litobela, **Buumi Bulalenga**, tulangisisya mbuli buumi bupya muli ndiswe mbobulilengulula munyika ituzungulukide. Muna Kristu ujisi nseba mbotu ulasangana mukuleta buumi bupya kuli bamwi bali mumsi mumsi antoomwe akubukomezya muli nguwe. Tuya kulanganya zyipego zya Muuya Uusalala akukanana mbuli basiciiya ba Jesu mbobasangana mukuleta bubotu aano ansi. Tuya kwiiya bwa kupailila zyooko zyesu, akusangana munzila zyiindene zyakukonzya kusika kuli mbabo akutondezya luyando lwa Leza kuli mbabo mumicito amumajwi.



### **Mubandi**

Mbuli mbotucebuka ku zyibeela 12 mu **Matalikilo 2: Buumi Bulakomena**, mube aciindi ca kubandika mutubunga twa 3 na 4 zyiyo zyipati pati zynomwaiya. Mwaambe zyakamucitikila abumboni kuli baabo mbomwaka swaya mucooko cenu kusanganya azyakamucitikila zyakali kukatazya.

Mukumanizya, mbuli nkamu mpati yomwe, musunkane mu zyipeto zyamumutwe zyili 13 eelyo mubone nainga mwagwasyanya kuyeeya mangwalo ngotwalanganya.

Na kuli ciindi, mubakanane zypet zynomwajana kuti zyilagwasya na zyaambaula kuli ndinywe munzila njoona iili muzyibeela 12 zyili kunze.



### **Mupailo**

Mbuli mbotujala cibeela eeci mube aciindi mukabunga. Eeci ciya

kuba ciindi cibotu cakuti mubone ambweni mukabunga kuli omwe utaninga tambula cipego ca buumi bupya eelyo ulayanda ono, nabalayanda amubasolwedele mumupailo ooyu:

O Leza,

Ndalumba kuli zyoonse zyeziya muciiindi ca zyiiyo zya Matalikilo. Sunu ndiyanda kutambula cipego ca buumi bupya mboondipa. Ndacizumina coonse ncoondicitila kwiinda mulufwu abubuke bwa mwaneenu, Jesu, eelyo ndiyanda kupona buumi bupya, kuliiba kukula akukomena muli ndinywe. Mundilekelele ku buumi mbundati sole kupona buumi bwangu munsu oomu eelyo ndalumba mundigwasye nditalike cipya sunu, eelyo ndikomene kukabe kutamani. Ameeni.

Mukutobela ceeci, mube aciindi cakubuzya ba mukabunga nabalijisi zyo bayanda kupaililwa nakupaililana, kukulwaizyanya mumapenzi, kukanana luyando lwa Leza kuli umwi aumwi.



### **Cakucita iino mwiki**

Mubambile cisyango kenu akubona nzila momunga mwagwasya kubamba busena bubotu kuti cikomene kabotu (e.g. kucipa meenda, kucibikka mubusena bubotu, kucikwabilila kuntenda). Eelyo nomucebuka mbomukonzya kukwabilila cisyango cenu, mupaile akucebuka nzila zyoumuzya kukwabilila cisyango, mupaile akucebuka nzila zyoumuzya kukomezya lusyomo eelyo ambomunga mwabamba masena mabotu kutegwa Leza amukomezye (oomu inga mwaba azyintu mbuli zyezyi kuba aciindi cakubala Bbaibbele, kupaila akuteela Leza, kulibombya ku zyintu zyamutuma kucita.)



## **Kamboni**

Mujane coolwe ca kuba aciindi amuntu 1 na 2 aabo mbomuzyi kabotu iino mwwiki balangilwa kuti inga kabatamuccilili Leza. Mubabuzye baambe kucinca nkobabona muli ndinywe kuzwa nomwakatambula cipego ca buumi bupya. Kuti kamuli basongo inga mwababuzya baambe masimpe zyintu zytana cinca!

Eelyo nobabona kucinca muli ndinywe, mubabuzye na inga bayanda kuzyiba Leza uupa buumi bupya akutucinca mukati kuzya anze.

# Zya Mumutwe

‘Mwanoondiyanda, kamubamba milao yangu. Amebo ndiyookumbila Taata, uyoomupa Mugwasyi umbi kuti akale anywebo lyoonse. Ngonguwe Muuya wabwini, oyo inyika ngwiitakonzya kutambula, nkaambo tiimuboni nekuba kumuziba. Nywebo mulimuzi, nkaambo ulikedede anywebo, alimwi unokede mulindinywe.’

*Johane 14:15-17*

‘Aboobo tamweelede kufubaala, muleelede kumvwisya mbulubede luyando lwa-Mwami. Mutakolwi bukoko buleta budakwi, pele amuzule Muuya.’

*Ba-Efeso 5:17-18*

‘Pele swebo toonse mbutuli amasyu mavumbulule, tuli mbuli ciboniboni, tulabonya bulemu bwa-Leza, aboobo tuli mukuya busanduka akuba mbubonya mbwabede mwini. Tuli mukuya butabukila mubulemu, nkaambo bulemu bwesu bulazwa ku-Mwami Muuya.’

*2 Ba-Korinto 3:18*

‘Nkaambo obuya Leza mbwaakayandisya nyika, wakapa Mwanaakwe simuzyalwa alike, kuti umwi umwi uumusyoma atafwidilili, pele abe abuumi ubutamani.’

*Johane 3:16*

‘Pele micelo ya-Muuya njeeyi: — luyandano, lukondo, luumuno, busicamba, buuya, bubotu, lusyomo, lubomba, kulyeendelela. Kulibaabo bacitaula zili boobo taakwe Mulao uubalwisya.’

*Ba-Galatiya 5:22-23*

‘Jehova akulongezye akukubamba.  
Jehova akumunikile abusyu bwakwe akukufwida luzyalo.  
Jehova akubusizye busyu bwakwe akukupa luumuno.’

*Myeelwe 6:24-26*

‘Nkaambo boonse babisya akulela kubulemu bwa-Leza.’

*Ba-Roma 3:23*

‘Amweetelele mbuli Uowanu mbweetelela. Alimwi mutabeteki, nomuti takabetekwe anywebo. Mutazuli bantu, anywebo nomuti takazulwe. Amwaangunune, anywebo nomuyooangununwa.’

*Luka 6:36-37*

‘Mulinguwe mumonya motujana lununuko nkaambo kabulowa bwakwe, lulekelelo lwamilandu yesu, mbubonya mbuli buvubi bwaluzyalo lwakwe, ndwaakatuvuzizya.’

*Ba-Efeso 1:7-8a*

‘Lino mbuli mbutululamikwa kulusyomo, atube aluumuno a-Leza muli Jesu Kristo Mwami wesu.’

*Ba-Roma 5:1*

‘Tutabi basikambotwembotwe, tutakalazyanyi, tutabi abbivwe umwi amweenzinyina.’

*Ba-Galatiya 3:26*

‘Amuboole kulindime nyoonse nomukatede nomulemenwa, ndime enti kamulemunune. Amulikulike ijokwe lyangu, mwiiye kwangu, nkaambo ndilibombede, ndi mutete moyo, lino mulakatulukwa mummyo yanu, nkaambo ijokwe lyangu lilibulungusene, awalo mukuli wangu muuba.’

*Matayo 11:28-30*

‘Mbubo, sikuzikila taakwe makani, alakwe sikutililila taakwe makani, pele Leza uumenya nguujisi makani.’

*1 Ba-Korinto 3:7*

# Mulongo wa Zifwanikiso

## Cifwanikiso

Peeji lya kumbele

Cibeela 1 mutwe wa  
peeji

Cibeela 2 mutwe wa  
peeji

Cibeela 3 mutwe wa  
peeji

Cibeela 4 mutwe wa  
peeji

Cibeela 5 mutwe wa  
peeji

Cibeela 6 mutwe wa  
peeji

Cibeela 7 mutwe wa  
peeji

Cibeela 8 mutwe wa  
peeji

Cibeela 9 mutwe wa  
peeji

Cibeela 10 mutwe  
wa peeji

Cibeela 11 mutwe  
wa peeji

Cibeela 12 mutwe  
wa peeji

Cibeela 13 mutwe  
wa peeji

## Zyijakizya Cifwanikiso

Cifwanikiso aba Erol Ahmed buzuba Unsplash

Cifwanikiso aba Ian Dooley buzuba Unsplash

Cifwanikiso aba Scott Rodgerson buzuba Unsplash

Cifwanikiso aba Jeremy Pagden buzuba Unsplash

Cifwanikiso aba Jayakumar Ananthan buzuba  
Unsplash

Cifwanikiso aba Samuel Zeller buzuba Unsplash

Cifwanikiso aba Abigail Keenan buzuba Unsplash

Cifwanikiso aba Nadia Supertino buzuba Unsplash

Cifwanikiso aba Beth Tate buzuba Unsplash

Cifwanikiso aba Aaron Burden buzuba Unsplash

Cifwanikiso aba Monkgori Samson buzuba  
Unsplash

Cifwanikiso aba Sebastian Leon Prado buzuba  
Unsplash

Cifwanikiso aba Wilco van Meppelen buzuba  
Unsplash

Cifwanikiso aba Dikshit Mundra buzuba Unsplash



MATALIKILO 2:

# Buumi Bulalenga

**Matalikilo** nciyo cigwasya bantu kuzyiba akukomena mu bulongwe bwabo a Leza alimwi cilabakulwaizya kubamba cooko cabo. Cakalembelwa kupa zyibelesyo zyiumpukide zyikonzya kubelesyegwa mumasena aindene indene amutubunga twazyianza munyika. Matalikilo ajisi mabbuku one, alimwi kalijisi zyiiyo zyambunga zyakukwabana zyili kkumi azyotatwe.

**Matalikilo** akalembwa abalembi beenzu basikulyaaba kuzwa munyika alimwi akubikkwa antoomwe akulembululwa aba Dignity.

**Matalikilo 2: Buumi Bulakula** ciyaka matalikilo aawo lusyomo mpolunga lwakomena akupa luzyibo lwa njiisyo zygwasyilizya bubelesi bwa Bbaibbele amupailo.

**Amutukwabe ali [hello@dignityonline.org.uk](mailto:hello@dignityonline.org.uk) na  
+44(0)7340573937. Ku mitwe ya makani eesu  
amyuulo amuswaye kasabwi kesu:  
[www.dignityonline.org.uk/publications](http://www.dignityonline.org.uk/publications).**

Tonga 1st Edition  
Pepa lyaatala: The Message Trust  
Bubambe bwa pepa lyaatala: Erol Ahmed/Unsplash



[www.dignityonline.org.uk](http://www.dignityonline.org.uk)